

# O Le Liahona

**Perisitua:**  
**O Le Mana**  
**i le Amioatua,**  
**i. 14, 16, 19**

**Aoaoga: O Lo'u Ala**  
**e Aluese ai mai**  
**le Mativa, i. 42**

**Aoaoina o Tamaiti**  
**i le Saogalemu o**  
**le Initoneti, i. 64**

**75 Tausaga o Auaunaga**  
**ma le Ola Faalagolago**  
**o le Tagata la Te**  
**la Lava, i. 81**





ELE MAFA'ONA KOPINA

### O Le Susquehanna Paia, saunia e Glen S. Hopkinson

O le aso 15 o Me, 1829, e lata i Haremoni, Penisilevania, na faaalia ai Ioane le Papatiso ia Iosefa Samita ma Oliva Kaotui. I lalo o le taitaiga a Aposetolo anamua o Peteru, Iakopo, ma Ioane, na faaee atu ai ona lima i luga o ao o Iosefa ma Oliva ma faaee atu i ai le Perisitua Arona.

Ona faatonuina lea e Ioane le Papatiso ia Iosefa e papatiso Oliva ma papatiso e Oliva ia Iosefa i le Vaitafe o Susquehanna.

Ona faauu lea e le tasi o le isi i le Perisitua Arona. (Tagai i le Talafaa solopito—Iosefa Samita 2:68–72; MFF 13:1.)

I ni nai vaiaso mulimuli ane, na oo mai ai Peteru, Iakopo, ma Ioane ia Iosefa ma Oliva e latalata i Haremoni, ma faaee atu ia i laua le Perisitua Mekisateko paia, ma faauuina i laua e avea o ni Aposetolo (tagai i le MFF 27:12; 128:20).



14

## O Le Liahona, Iuni 2011

### SAVALI

**4** **Savali a le Au Peresitene Sili: O Faamanuiaga o le Sefuluai**  
Saunia e Peresitene  
Henry B. Eyring

**7** **Savali a Faiaoga Asiasi: Faamalolosia o Aiga e ala i le Faalagolago o le Tagata ia te ia Lava i le Faaletino**

### TALA FAAALIA

**16** **Faamanuiaga o le Perisitua: Aoao e Faalagolago i le Atua**  
Saunia e Mark L. Grover

*Ou te lei maua se lagona lelei e tuuina atu ai ni faamanuiaga, ae ina ua ma'i lo'u toalua i le kanesa, sa ou iloa ai o au o se mefaigaluega e mafai ai ona ia maua se fesoasoani faalelagi.*

**24** **Sa Ou Matuai Manao lava e Taofi**

Taofia le igoa  
*O le auala sa ou faatoilaloina ai la'u tauiviga umi ma ponokalafi.*

### 28 O Le Ala Moni i le Fiafia

Saunia e Elder Quentin L. Cook  
*O ki e lima i le fiafia.*

### 34 Folau Saogalemu i le Aiga

Saunia e Richard M. Romney  
*Maua e le autalavou i Visakhapatnam, Initia, se taula saogalemu i le aiga.*

### 81 O Le Fuafuaga o le Uelefea a le Ekalesia

*Faamanatuina o le 75 tausaga o le ola faalagaolago o le tagata ia te ia lava ma le auauana atu.*

### MATAGALUEGA

#### 8 O Mea Faatauvaa ma Faavalea

#### 11 Auaunaga i le Ekalesia: Faamanuiaina e ala i Aufono

Saunia e Elder M. Russell Ballard

#### 12 Tatou te Talanoa ia Keriso:

**Na la Tauaveina O'u Faanoanoaga**  
Saunia e Jane Bleak

**14** **O Le Mea Tatou Te Talitonu i Ai: O Le Perisitua O Le Pule lea e Galue ai i le Suafa o le Atua**

**19** **O Tatou Aiga, O Tatou Auaiga: O Le Mana o se Faataitaiga Amiotonu**  
Saunia e Jerry Stringam

**20** **Tala Faamamai o le Talalelei: O Le Manatu Faavae o le Au Paia o Aso e Gata Ai i le Faaipoipoga**

Saunia e Peresitene  
Hugh B. Brown

**38** **O Leo o le Au Paia o Aso e Gata Ai**

**74** **Tala Fou o le Ekalesia**

**79** **Manatu mo Afiafi Faaleaiga**

**80** **Seia Tatou Toe Feiloai: Fausia i luga o se Faavae Mautu**  
Saunia e Joshua J. Perkey

#### I LE FAAVAA

Luma: *Toefuataiga o le Perisitua Mekisateko*,  
saunia e Walter Rane. Tua: ata na tusia e Matthew Reier.

## AUTALAVOU MATUTUA



42

### 42 O Le Mana o Aoaoga

Saunia e Suzy Taggy Coelho  
Caldas Nelsen

*Fai mai lo'u tina o se tasi lea  
o mea e mafai ona siitia ese ai  
au mai le mativa.*



*Vaai pe mafai  
ona e mauaina  
le Liahona o loo  
natia i le lomiga  
lenei. Faaitite:  
fesili ia Nicole.*



54

### 58 O Mea na Aoao ai Au e le Aau

Saunia e Marissa Thompson

*E le o uunaiga uma  
a taaga a tupulaga e  
leaga.*

### 54 Aoao se Tagata e Fagota

Saunia e Adam C. Olson

*Ina ua maliu lona tama, sa i ai  
iina le Tama Faalelagi o Ezra e  
fesoasoani ia te ia.*

### 48 E Taua Au Faataitaiga

Saunia e Elder Joseph W. Sitati

*Ua aoaoina e le autalavou  
i Kenya, Aferika, o le ola i le  
talalelei e faamalolosia ai i  
latou faapea ma isi.*

### 51 O Lea Mataupu ma Lea Mataupu: Mataupu Faavae ma Feagaiga 121:41–43

### 52 Pepa Lautele o I Ai se Savali: O Le Vao Paia

### 53 Mai le Misiona: Faailoga o le Agaga

Saunia e Pedro Ovalles

### 46 Fesili ma Tali

*Pe faapefea ona ou iloa pe afai o  
ou huitau ua fuafuaina e fesoasoani  
ia avea au ma se tagata e  
sili atu po o se auala a le Tama  
Faalelagi e lapatai ai au o loo  
sese le auala o loo ou agai i ai?*

## AUTALAVOU

## TAMAITI



68

### 60 Faalagolago i le Alii

Saunia e Elaine S. Dalton  
*Aisea na maliu ai lo'u tama?  
Na aumai ia te au le tali mai  
se mau o le Feagaiga Tuai.*

### 61 Molimau Faapitoa: O A Ni Faamanuiaga Tatou Te Maua e ala mai i le Eklesia Toefuataiina?

Saunia e Elder L. Tom Perry

### 62 Aumaia o le Peraimeri i le Fale: O Muai Mataupu Faavae ma Sauniga o le Talalelei o le a Mafai ai ona Ou Toe Mau faatasi ma le Atua

Saunia e Ana Maria Coburn ma  
Cristina Franco

### 64 Tapē ma Ta'u Mai


Saunia e Danielle Kennington  
*Ua iloa e Connor le mea e fai pe  
a vaai o ia i se uepisait e le lelei.*

### 67 O La Tatou Itulau

### 68 O La'u Faaiuga Tele

Saunia e Rebecca Shaw  
*Na tatalo Nicole pe tatau  
ona papatiso o ia.*

### 70 Mo Tamaiti Laiti



O Le Lomiga Faamaonia Faa-Samoa a le Eklesia a Iesu Keriso o le Au Paia o Aso e Gata Ai

**Susuga a le Au Peresitene Sili:** Thomas S. Monson,  
Henry B. Eyring, Dieter F. Uchtdorf

O Le Korama a Apostolo e Toasatefulua:  
Boyd K. Packer, L. Tom Perry, Russell M. Nelson,  
Dallin H. Oaks, M. Russell Ballard, Richard G. Scott,  
Robert D. Hales, Jeffrey R. Holland, David A. Bednar,  
Quentin L. Cook, D. Todd Christofferson, Neil L. Andersen

**Faatonu:** Paul B. Pieper

**Fautua:** Stanley G. Ellis, Christoffel Golden Jr.,  
Yoshihiko Kikuchi

**Pule Faatonu:** David L. Frischknecht

**Faatonuili e Fuafuaina ma Faatonutonu:**

Vincent A. Vaughn

**Faatonu o Karafi:** Allan R. Loyborg

**Pule Faatonutonu:** R. Val Johnson

**Pule Faatonutonu Lagolago:** Jenifer L. Greenwood,  
Adam C. Olson

**Faatonutonu Fesoasoani:** Ryan Carr

**Faatonu Fesoasoani:** Susan Barrett

**Aufaigaluega Faatonutonu:** David A. Edwards, Matthew  
D. Flitton, LaRene Porter Gaunt, Carrie Kasten, Larry Hiller,  
Jennifer Maddy, Melissa Merrill, Michael R. Morris, Sally J.  
Odekirik, Joshua J. Perkey, Chad E. Phares, Jan Pinborough,  
Richard M. Romney, Janet Thomas, Paul VanDenBerghe,  
Melissa Zenteno

**Pule Faatonuili o Faatufugaga:** J. Scott Knudsen

**Faatonuili Tusiata:** Scott Van Kampen

**Pule i le Gaosiga:** Jane Ann Peters

**Au Mamanu Sinia:** C. Kimball Bott, Thomas S. Child,

Colleen Hinckley, Eric P. Johnsen, Scott M. Mooy

**Aufaigaluega e Mamanuina ma Gaosia:** Cali R. Arroyo,  
Collette Nebeker Aune, Howard G. Brown, Julie Burdett,  
Reginald J. Christensen, Kim Fenstermaker, Kathleen

Howard, Denise Kirby, Ginny J. Nilson

**Tailolomi:** Jeff L. Martin

**Faatonuili Lolumiga:** Craig K. Sedgwick

**Faatonuili o le Tufatufaga:** Evan Larsen

Mo O le okaina o mekasini, ia faafesootai le Faletusi  
Tutotonu i Pesega. Telefoni 64127. Totogi o le Mekasini: \$0.55 (Samoa) i le kopi. Totogi mo le Tausaga Atoa \$6.60  
(Samoa).

**Auina atu tusitusiga ma faafesili i le Liahona,  
Rm. 2420, 50 E. North Temple, Salt Lake City, UT  
84150-0024, USA; po o le i-meli: liahona@ldschurch.org.**

O Le Liahona (o lona uiga i le Tusi a Mamona o le "tapasa" po o se "faatonuala") e lomia i le faa-Alepania, Aminia (Sasae), Pisilama, Palekeria, Kemupotia, Sepuano, Saina, Kalaotia, Siekisolovakia, Tenimaka, Take, Igilisi, Esitonira, Fiti, Finelani, Farani, Sihamani, Eleni, Hanikeri, Initu, Iselani, Initonesia, Italia, Iapani, Kiripati, Korea, Latvia, Litunia, Malakasa, Masela, Monokolia, Nouei, Polani, Potukale, Romania, Rusia, Samoa, Silovenia, Sipaniolo, Suetena, Tagaloka, Tahiti, Tai, Toga, Iukureini, ma Urutu, ma Viatename. (E eseese lava gagana.)

© 2011 Puletaofia e le Intellectual Reserve, Inc. Ua taofia aia tatau uma. Lomia i le lunaite Setete o Amerika.

E mafai ona kopu tala ma ata o le Liahona mo le toe faaaogaina i lotu po o le aiga ae ia le faia ai ni pisini. E le tatau ona kopu ni tala po o ni ata pe afai o faasa mai i le laina o loo ta'au ai le e ona lea faatufugaga. Auina atu fesili e uiga i le puletaofia i le Intellectual Property Office, 50 East North Temple Street, Salt Lake City, UT 84150, USA; i-meli: cor-intellectualproperty@ldschurch.org.

**For Readers in the United States and Canada:**

June 2011 Vol. 35 No. 6. O LE LIAHONA (USPS 311)  
Samoa (ISSN 1045-0947) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address must be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Post Information: Publication Agreement #40017431)

POSTMASTER: Send address changes to Salt Lake Distribution Center, Church Magazines, PO Box 26368, Salt Lake City, UT 84126-0368.

# Faaopoopoga o loo maua i le Initoneti

Liahona.lds.org



## MO TAGATA MATUTUA

**"Sa Ou Matuai Manao lava e Taofi"** (itulau

24) o loo tau mai ai le auala na foia ai e se tasi tamalii lana vaisu o ponokalafi. Ua uma ona matou tuuafaatasia se lisi o tusiga e faatatau i lena autu i le www.liahona.lds.org.

## MO LE AUTALAVOU



**Ua maua e le autalavou i Visakhapatnam, Initia, le faamlosiau mai o latou aiga (tagai itulau 34). E maua nisi ata o nei autalavou i le www.liahona.lds.org.**

## MO TAMAITI



E le o uepisaite uma e saogalemu e asiasi i ai (tagai itulau 64). Ae saogalemu lea: **saili taaloga ma gaoioiga** i le www.liahona.lds.org.

## I LAU GAGANA

O loo maua le Liahona ma isi tusi a le Eklesia i le tele o gagana i le www.languages.lds.org.

## AUTU I LENEI LOMIGA

*E ta'u mai e numera le itulau muamua o le tusiga.*

**Agaga Paia**, 62, 64, 68

**Agalelei**, 70

**Aiga**, 19, 20, 28, 34, 54, 70

**Ala o Faasalalauga**, 64

**Aoaoga**, 42

**Aualofa**, 7

**Aufono**, 11

**Faipoipoga**, 20

**Faalagolago**, 60

**Faalagolago o le tagata ia te ia lava**,  
7, 81

**Faamanuiaga**, 16, 38, 39, 41

**Faataitaiga**, 19, 28, 48, 54

**Faatuatua**, 60, 62

**Faauo**, 34, 58

**Faigata**, 12, 16, 39, 46

**Fiafia**, 20, 28

**Galuega faafaifeatalai**, 53

**Iesu Keriso**, 12

**Lotonutimomoia**, 12

**Maliu**, 12, 54, 60

**Molimau**, 53, 80

**Musumusuga**, 40

**Papatisoga**, 62, 68, 73

**Perisitura**, 14, 16, 19, 38, 39,  
41, 48, 51

**Ponokalafi**, 24

**Salamo**, 19, 62, 64

**Sefuluai**, 4

**Suesue i tusitusiga paia**, 34

**Tafaoga faamasani**, 19

**Tatalo**, 67, 68

**Toefuataiga**, 52, 61

**Tulaga faamatua**, 20


**Tulaga faatonuina**, 28, 48, 58, 64

**Uelefea**, 81

**Vaisu**, 24

Saunia e Peresitene  
Henry B. Eyring

Fesoasoani Muamua  
i le Au Peresitene Sili



O  
FAAMANUIAGA  
OLE

# Sefuluai

**O**le faamoemoega o le Atua i le tuuina mai o poloaiga, ia faamanuia ai i tatou. E finalo o Ia e tuuina mai ia i tatou le ola e faavavau, o le meaalofa silisili o Ana meaalofa uma (tagai i le MFF 14:7). Ina ia maua le meaalofa o le nonofo faatasi ma Ia e faavavau i ni aiga i le malo selesitila, e tatau ona tatou ola i tulafono o lena malo (tagai i le MFF 88:22).

Ua Ia tuuina mai ia i tatou ni poloaiga i lenei olaga e fesoasoani ia i tatou e atiina ae ai lena agavaa. O le tulafono o le sefuluai o se tasi lea o na poloaiga sauniuni. O le tulafono tatou te tuuina atu ai i le Alii le tasi vae-sefulu o a tatou tupe maua uma. E faigofie lava e oo a i se tamaitiiti e mafai ona malamalama ai. Na ou vaai i tamaiti o tuuina atu i se epikopo se teutusi o le sefuluai o loo i ai ni tipe siliva, o le tasi vae-sefulu lea o a latou tupe na maua.

O se tasi o faamanuiaga e maua mai i le totogiina atoa o se sefuluai o le atiina ae lea o le faatuatua e ola i se tulafono maualuga atu. Ina ia nofo ai i le malo selesitilia, e tatau ona tatou



ola i le tulafono o le faapaiaga. O iina e tatau ona tatou lagona ai o i tatou uma ma mea uma ua tatou maua e a le Atua lea.

E le itiiti ifo ma le tolu ni auala e saunia ai i tatou i lenei olaga e ala i le totogiina o se sefuluai atoa ia *lagonaina* mea e manaomia ona tatou lagona, e maua ai le meaalofa o le ola e faavavau.

**Muamua**, pe a totogiina a tatou sefuluai i le Ekalesia, e liligi mai e le Tama Faalelagi ia faamanuiaga i o tatou luga. Soo se tasi lava o loo totogiina atoa e le aunoa le sefuluai na te iloa e moni lenei mea. O nisi taimi o faamanuiaga e faaleagaga a o nisi taimi e faaletino. E tuuina mai i le taimi o le Alii ma e tusa ai ma mea e Na te silafia e sili ona lelei mo i tatou.

Pe a oo mai na faamanuiaga, o le a faateleina lo tatou faatuatua o le Atua, o le puna lea o mea uma e lelei i o tatou olaga. O le a faigofie ona iloa o le faapaiaina e iloagofie ai le upu moni o foaoaga uma a le Atua o Ana lava. Tatou te *lagona ai* le agaga faafetai ona ua na o le 10 pasene o mea ua ia tuuina mai ia i tatou, ua poloai mai ai. O lea la ua tatou saunia lelei ai e ola i le tulafono o le faapaiaga pe a poloaiina ai i tatou.

**Lona lua**, o i tatou uma lava o e na totogiina atoa e le aunoa le sefuluai e *lagonaina* le faamautinoaga maoae i le ole atu i le Atua mo mea e manaomia e i tatou ma o tatou aiga. Ua Ia folafola mai faamanuiaga e silisili atu nai lo mea ua tatou maua pe a tatou faamaoni i a tatou feagaiga e totogi a tatou sefuluai (tagai Malaki 3:10). O lea la, o se tasi o faamanuiaga sili o le sefuluai o le talitonu i mea o le a tutupu i le lumanai. Po o

le a lava o tatou tulaga, o le a galulue mea uma mo lo tatou lelei. Pe a tausia a tatou folafolaga, o le a Ia tausia foi Lana vaega. O se tasi o faamanuiaga sili o le totogiina atoa o le sefuluai o le lagonaina lea o le filemu. E mafai e i latou o e na tausia le poloaiga o le sefuluai ona molimau mai i le moni ma le taua o le faamanuiaga o le filemu.

**Lona tolu**, e lagonaina e i latou o e na totogiina le *sefuluai* le faateleina o lo latou alofa i le Atua ma fanau uma a le Atua. O lena faateleina o le alofa e sau mai le iloaina lea o le auala e faaaoga ai e le Tama ia sefuluai lea tatou te ofoina atu ina ia faamanuiaina ai tagata i lenei lalolagi ma le faavavau.

E ala atu i Ana auauna ua faatagina, e Na te taulimaina ai ia sefuluai ma le faaeteetega tele. E fesoasoani le tagata totogi sefuluai i le Alii i le fausiaina o malumalum, lea e mafai ona faamau ai e faavavau ia aiga. E fesoasoani ia te Ia le tagata totogi sefuluai i le auina atu o le talalelei i tagata i soo se nofoaga. E fesoasoani ia te Ia le tagata totogi sefuluai i le faaitiitia o le fiaai ma le puapuagatia i Lana lava ala e ala atu i Ana auauna. E mafai ona tau atu e soo se tasi o na auauna ia te oe le auala na faateleina ai le alofa ona sa faaaogaina le sefuluai e faamanui a tagata. Ma e faapea foi i le tagata totogi sefuluai ma le faamaoni.

O le faatalanoaga o le sefuluai e faia i ni masina i le lumanai. Ou te tatalo atu ina ia outou amata nei ona fuafua ma saunia ma o outou aiga ina ia agavaa mo faamanuiaga e liligi mai e le Atua ia i latou uma o e tau-tino atu ia te Ia, o i latou o ni tagata e totogi atoa le sefuluai. ■

## AOAO ATU MAI LENEI SAVALI

- O nisi taimi o le auala sili e aoao atu ai se mataupu faavae patino o le faatinoina lea (tagai i le *O Le Aoao Atu, E Leai Se Isi Valaauga E Sili Ai* [1999], 173). Mafaufau e talosagaina se tasi o le aiga e faatino le mea e ta'ua o le tasi-vae-sefulu. E mafai ona ia faatinoina e ala i le tuueseina mai o se mea se tasi mai ni mea e 10. I le faaiuga, valaaulia se tagata o le aiga e faaali mai le auala e faatumu ai se lisiti o le sefuluai.
- "O i latou e te aoaoina o le a faamanuiaina mai le faatinoga a isi" ( *O Le Aoao Atu, E Leai Se Isi Valaauga E Sili Ai*, 67). Valaaulia tagata o le aiga e faasoai mai o latou talitonuga e uiga i le saunoaga a Peresitene Eyring "ia lagona le mea e tatau ona tatou lagonaina ina ia maua ai le meaalofa o le ola e faavavau." Mafaufau e talanoaina auala e tolu e mafai ai e le totogiina o le sefuluai ona saunia i tatou e lagona le mea e tatau ona tatou lagonaina ina ia maua ai faamanuiaga a le Atua.

# AUTALAVOU

## E Lava Tupe

Saunia e Fabiano dos Santos da Silva

**S**a ou feiloi i faifeautalai i le 17 o ou tausaga. I lena taimi sa ma nonofo faatasi ai ma lou uso matua. Na maliu lo ma tina i le tausaga ua mavae, ma sa faigata le olaga. Ina ua aoaoina au e faifeautalai, sa ou iloa ai o le Ekalesia lea ua leva ona ou sailia. Ae o faatosinaga a au uo na taofia mai ai au i le alu i le lotu i Aso Sa.

I se tasi taimi sa ou alu ai i se gaoioiga a le Ekalesia i se aso o le vaiaso. Sa aumaia ia te au le fiafia sili i le vaavaai atu i le autalavou atoa o loo talitalie ma taaalo. Sa faaaogaina e faifeautalai, ma le autalavou, lena avanoa e aoao mai ai ia te au se lesona o le talalelei, ma sa ou matua lagonaina le fiafia ma tonu ai loa ou te papatiso.

Ae e ui ina ou auai i le Ekalesia, sa ou feagai lava ma luitau. Sa na o au le tagata o le Ekalesia i lena vaega o le taulaga ma sa mamao le mea ou te nofo ai mai le falesa. E le i toe fia talanoa au uo le lolotu ia te au. Pe a tuua na o au, sa ou tatalo ma lagonaina le alofa o le Alii.



O masina taitasi, ou te mauaina ai se vaega tupe laitiiti mai se tupe na tuua e lo'u tina. Sa faigata le tausia o au lava i se tupe ititi. Ae sa ou naunautai lava ina ia usiusitai. Sa ou totogiina le sefuluai ma le pasese e alu ai i le seminare ma sauniga lotu i Aso Sa. Ou te le i malamalamama pe na faapefea, ae e oo atu i le faaiuga o le masina, sa lava le tupe e faia ai nei mea uma.

Ou te iloa sa faamanuiaina au i le totogiina o le sefuluai. O le tausia o lenei poloiga na fesoasoani lea ia te au i le mauaina o se molimau malosi, auauna atu i se misiona, ma iloa faamanuiaga ina ia mafai ai ona ou faamalosia tagata fou o le eklesia o loo fetaiai ma luitau.


## TAMAITI

### E Mafai Ona Ou Totogiina le Sefuluai

**O**le totogiina o le sefuluai o lona uiga o le **tuuina atu o le 10 pasene** o mea tatou te maua i le Alii. Tagai i nei tamaiti e toatolu o loo faia ni galuega. Tusi i le avanoa muamua i talaane o ata taitasi, pe fia tupe e te manatu e maua e tamaiti taitasi mo le galuega. I le laina lona lua, tusi ai pe fia le aofai o le sefuluai.



**Fesili faaopoopo:** O fea o nei tagata totogi sefuluai o le a maua faamanuiaga e sili ona tele? (Faiteite: Tagai i le parakalafa mulimuli o le savali a Peresitene Eyring.)



# Faamalolosia o Aiga e ala i le Faalagolago o le Tagata ia te la Lava i le Faaletino

**O**le atiina ae o le faalagolago o le tagata ia te ia lava—o le gafatia e tausia ai i tatou lava ma o tatou aiga—o le tiutetauave lea o uso uma. E mafai ona tatou faalagolago ia i tatou lava pe a tatou aoao e fafia e galuelue, a o tatou sailia musumusuga e sue ai auala aupito sili e saunia ai mea mo i tatou lava, ma a o tatou galuelue ma tagata o le aiga e taulima o tatou manaoga autu.

A oo ina tatou faalagolago ia i tatou lava, tatou te faaaogaina o tatou faamanuiaga ma punaoa e sauniuni ai ma taumamao ai mai faafitauli. Peitai, o le ola faalagolago o le tagata ia te ia lava, e faalau-teleina pe a tatou tatalo mo le lototoa e taulima ai ma le faatuatua ia luitau o le a oo mai. O le ola faalagolago o le tagata ia te ia lava e mafai ai foi ona tatou faataunu a tatou feagaiga e tausia isi tagata.

I le Aualofa, ua aoaoina ai i tatou i mataupu faavae ma tomai o le ola faalagolago o le tagata ia te ia lava. E mafai e uso ona aoao i le faiga o paketi, toomaga mai aitalafu, agavaa mo galuega, o tusutisiga paia ma le talalelei, aoao atu o isi ia faitau ma aoao, tekinolosi, soifua maloloina faaletino, malosi atoatoa, puipuiga ma le toe faaleleia mai mea ua fai ma vaisu, soifua manuia faagafesootai ma faalelagona, puipuiga mai ma'i, faiga o togalaau, gaosiga ma le teuina o meaai, tapenaga mo faalavellave faafuasei, ma le tele o isi mea o le a fesoasoani tatou te ola faalagolago ai ia i tatou lava.<sup>1</sup>

Na faamatala e Julie B. Beck, le peresitene aoao o le Aualofa e faapea, “o le saunia o mea mo i tatou lava ma isi, o se faamaoniga lea o i tatou o soo o le Alii o Iesu Keriso. . . Ina ua maliu faafuasei [le tina o lo'u toalua] i le tausaga ua tuanai atu nei, sa ia tuua ni faamaoniga o lona ola faalagolago ia te ia lava. Sa i ai sana pepa malumalu na aoga pea ma ni tusitusiga paia ua tuai i le faaaoga soo ma ni tusi lesona na suesue ai i le talalelei. Sa matou vaevaina ma le alofa ana ulo, apa, ma ipu ia sa ia saunia ai le faitau afe o taumafataga. Sa ia tuua mo i matou ni ie soosoo na ia faia mai lavalava tuai. Sa talitonu o ia i le alagaupu anamua ‘Faaoga ia uma le aoga, ofu seiā masaesae, faaaoga le mea ua e maua, po o le ola foi e aunoa ma lena mea.’ Na matou vaaia le sapalai o meaai na ia totoina, tuufaguina, ma teuina. Na sili ona matou ootia i ana tamai tusitupe lea sa ia faamaumauina ai ma le faamaoni ana tupe faaalu i le tele o tausaga. Ona sa ola faautauta o ia o lea na ia tuua ai sina tupe, lea na ia sefeina mo mea e tutupu faafuasei ma na leai foi ni aitalafu na ia tuua! Ae o le mea aupito taua, sa ia aoaoina ma musuia le toatele o isi uso i tomai na ia maua i lona soifuaga faamaoni.<sup>2</sup>

Suesue i mea nei, ma pe a talafeagai ai, ia talamoaina faatasi ai ma uso e te asia. Faaoga fesili e fesoasoani ai ia te oe e faamalosia ai ou uso ma avea ai le Aulofa ma se vaega ola o lou lava olaga.



Faatuatua • Aiga • Toomaga

## O Le a se Mea e Mafai ona Ou Faia?

**1. E mafai faapefea ona ou fesoasoani i o'u uso ma o latou aiga ia faaleleia atili le ola faalagolago o le tagata ia te ia lava?**

**2. E mafai faapefea ona ou faaleleia atili lo'u lava faalagolago ia te au?**

Mo nisi faamatala-laga, alu i le [www.religionsociety\\_lds.org](http://www.religionsociety_lds.org).

### FAAMATALAGA

1. *Tusitalima 2: Taitatina o le Ekalesia* (2010), 9:4.2.

2. Julie B. Beck  
“O Tiutetauave Faale-Uelefea o le Peresitene o le Aualofa,” *Mataupu Faavae Autu o le Uelefea ma le Ola Faalagolago o le Tagata ia te ia Lava* (2009), 5.3. *Aoaoga a Peresitene o le Ekalesia: Polika Iaga* (1997), 195.

## Mai lo Tatou Talafaasolopito

E galulue pea lava uso o le Aualofa i le galuega o le laveaiina o agaga i le faaletino ma le faaleagaga. O vaiaso taitasi pe a potopoto le Aualofa a Tamaitai o Navu, e lipoti atu e uso ia tagata e manaomia le fesoasoani. Sa faasafua atu foai o tupe, oloa, taleni, ma taimi e toomaga i ai ē le tagolima. O lea galuega faavae o le faamama avega i e puapuagatia ua faaauau pea e avea ma galuega a le Aualofa i augatupulaga.

Ina ua taunu le Au Paia i le Vanu o Sate Leki, sa fautuaina e Peresitene Polika Iaga (1801–77) ia tuafafine ina ia fesoasoani ia i latou o loo manaomia le fesoasoani ma ia aoaoina tomai o le a mafai ai e i latou ona tausia i latou lava. Na ia saunoa, “Aoao ina ia iloa ona tausia outou lava; ia teuina falaoamata ma araisa, ma faasaoina mo aso leaga.”<sup>3</sup> I lalo o le taitaiga a le perisitua, e faaauau pea e le Aualofa ona aoao atu le ola faalagolago o le tagata ia te ia lava, ia malupuipua le aiga, ma ia unaia le amiontonu o le tagata lava ia ma galuega o le alofa moni, o le alofa mama lea o Keriso.

## Mai Tusitusiga Paia

Ioane 13:34–35; Iakopo 1:27; Mosaea 4:26; Mataupu Faavae ma Feagaiga 29:34–35; 38:30; 44:6



# O Mea Faatauvaa ma Faavalea

"O mea iti foi e tutupu mai ai mea tetele"  
(MFF 64:33).

## TALAFASOLOPITO O LE EKALESIA I LE SALAFA O LE LALOLAGI

### Siamani

Ui lava na amata le galuega faafaiseautalai i Siamani i le vaitau o le 1840, ae o le 1851 na papatisina ai tagata e toalua na foliga mai o uluai tagata liliu mai ia. I lena lava tausaga, na malaga ai i Hamburg ia Peresitene Ioane Teila, o le sa avea ma se tasi o le Korama a Apostolo e Toasefululua i lena taimi, e fesoasoani i le faatonutonuina o le faaliliuga o le Tusi a Mamona i le gagana Siamani. Sa faatulagaina se paranesi i Hamburg i le 1852, a e o le toatele o tagata na muai liliu mai na malaga atu i Iuta ona o sauaga. Na aofia ai ia Karl G. Maeser, lea na mulimuli ane avea ma peresitene o le Brigham Young Academy i Provo, Iuta.

Ina ua mavae le Taua Muamua a



Luga: O se vaaiga i Munich, Siamani. Lalo: O le Malumalu o Frankfurt Siamani, na faapaiaaina i le 1987.




le Lalolagi, na matuai toatele tagata na liliu mai o le Ekalesia i Siamani, aemaisa lava mai le 1921 i le 1925. Na vaeluaina le Misiona a Siamani i le Misiona a Siamani-Auseteria ma le Misiona a Suisi-Siamani. Na faatulagaina le Misiona a Siamani Sasae i le 1937. Na aveesea mai faifeautalai mai Siamani i le taimi o le Taua Lona Lua a le Lalolagi. Ina ua latou toe foi atu i le 1947,

ua vaeluaina le atunu u e avea ma Siamani Sasae ma Siamani Sisifo. Ae ui i lea, na faaaauau pea le galuega faafaiseautalai, ma o le aso 19 o Iuni, 1985, na faapaiaaina ai le Malumalu o Freiberg Siamani i Siamani Sasae—o le uluai malumalu i se atunu u komensi. Na faapaiaaina le isi malumalu i le lua tausaga mulimuli ane, i Frankfurt, Siamani Sisifo. Na tuufaatasi le atunu u i le 1990.



Na tuua e Karl G. Maeser lona atunu u moni o Siamani mo Iuta, ma taunu u ai i le 1860.

O le Malumalu o Freiberg Siamani, na faapaiaaina i le 1985.



## E Faamuamua le Talalelei

**S**a mauaina e faifeautalai ma aoaoina le tamā o lo'u tamamatua i Samoa. O le auai i le Eklesia, na manaomia ai le lafaoi e lo'u tamamatua o nisi o talitonguga faaleatunu ma faiga faalelotu a ona tagata. E mitamita lo matou aiga i lo matou tupuaga Samoa, ae ona o le faataitaiga a lo'u tamamatua, ua matou aoao ai e faamuamua le talalelei.

A o avea au ma se alii talavou, sa talanoa mai lo'u tama ia te au e uiga i le tataina o pe'a o se mea e masani ai faapea foi ma nisi o meaai iloga e ono le talafeagai ma aoaoga a le Eklesia. Fai mai lo'u tama, "Aua nei e faia sose tasi o na mea. O oe o se atalii o le Atua a e e te lei avea ma se Samoa, a e te lei avea ma se tama tino tele, ma malosi mai atumotu." O se mea lena ou te manatua pea lava.

O loo ma nonofo nei ma lo'u toalua i Costa Rica. O loo i ai foi tu ma aga faaleaganuu iinei, e pei foi o isi nofoaga, e le ogatasi ma aoaoga a le Eklesia. O nisi taimi e tatau ona tatou lotototoa e liliu ese mai nei faiga ae liliu atu i aoaoga o le talalelei a lesu Keriso.

Morgan Sa Mataalii, Costa Rica

## Mamanu se Talaaga Otooto i le Mormon.org

**E**mafai e tagata o le Eklesia i le lalolagi atoa ona fetufaa atu le talalelei e ala i le mamanuina o se talaaga otooto i le Mormon.org. E faaaogaina e tagata e asiiasi i le saite nei talaaga otooto e aoao tuusa'o ai i le Eklesia mai tagata o le au paia. Mamanu se talaaga otooto ma faasoa atu lau molimau e ala i le mulimuli i lasaga nei:

1. Asiiasi i le **mormon.org/create**. Saini e alu i totonu i le faaaogaina lea o lau faitotoa a le AAG. Afai e le o i ai sau faitotoa a le AAG, lesitala mo se igoa faaaoga ma se upu tatala e ala i le tuuina atu o le numera o lou pepa faamaumau ma lou aso fanau. E maua le numera o lou pepa faamaumau i luga o lau pepa faataga o le malumalupo o le fesootai atu i le failautusi o lau uarota po o le paranesi e nafa ma pepa faamaumau.
2. Tuu mai ni faatamatalaga e uiga i vaega nei: "E Uiga ia te Au," "Aisea ua Avea ai Au ma se Mamona," "O Faapefea ona Ou Ola i Lo'u Faatatuuga," "Fesili and Masani on Fesiliglia," "Tala Patino," ma le "Faamatalaga Faaopoopo."

3. Pe a mamanuina lou talaaga otooto, ia manatua o loo e talanoa atu i tagata e le auai i le Eklesia. Aloese mai faaupuga latou te le masani ai. Mo se faataitaiga, e te ono faapea mai, "E tasi i le masina ona ou fai-aoga i le vasega a tamaitai matutua mai upu a perofeta soifua," nai lo o le faapea, "Ou te galue o se faiaoga o le Aoaoga o o Tatou Taimi i le Aualofa."

4. Ia i ai sou ata, igoa muamua, ma se folasaga puupuu. E mafai foi ona fesootai lou talaaga otooto i lau lava lautusi i le initoneti, faitotoa o le Facebook, po o le faitotoa o le Twitter, e ui e le manaomia lea tulaga. Aloese mai le aofia ai o faamatalaga auiili patino, e pei o lou faaiu po o le nuu o loo e nofo ai.

A maea loa lou talaaga otooto, o le a auina atu i isi sui mo le faamaoniaina. A faamaonia loa lou talaaga otooto, o le a mafai e tagata asiiasi i le saite ona fatauina lau molimau ma faafesootaia oe mo nisi faamatalaga e uiga i le Eklesia.



# O Le Suega a Peresitene o le Ekalesia



Faafetaui mea taitasi nei i le Peresitene o le Ekalesia e fetaui i ai.

- 1.** Matatioata. Sa faaaoga e le Peresitene lenei o le Ekalesia pe a faimalaga e asiiasi i nuu o le teritori o Iuta.
- 2.** Pulou. O lenei mea e iloagofie ai le perofeta lenei ua laulioa i ona foliga vaia ma amioaga tauleleia.
- 3.** Pine o le Auaunaga Maoae. Na maua e lenei Peresitene o le Ekalesia lenei taui mo lana auaunaga o se Failautusi o Faatoaga i le kapaneta a le peresitene o le I.S. o Dwight D. Eisenhower.
- 4.** Faailoga o oloa o le uelefea. Na amatalia ma taitaiina e le Peresitene lenei le polokalama o le uelefea a le Ekalesia i le taimi o le Pau Tele o le Tamaoaiga.
- 5.** Nofoa tietie soloфануа. E alofa le perofeta lenei i lana soloфануа e igoa ia Sonny Boy.
- 6.** Api o Talaaga. Na matua faamaoni lenei perofeta i le teuina o talafaasolopito o le Ekalesia, ma o ana faamaumauga o nisi ia o talafaasolopito e sili ona ttau o le Ekalesia.
- 7.** Ata o le Nofoaga Autu o le BYU i Ierusalem. Na faia e le Peresitene lenei o le Ekalesia ia feutagaiga ia maua se fanua i Ierusalem e fausia ai le nofoaga autu.



- A. Iosefa Samita le Itiiti (1805–44)**
- E. Polika Iaga (1801–77)**
- I. Ioane Teila (1808–87)**
- O. Uilifoti Utilafi (1807–98)**
- U. Lorenzo Snow (1814–1901)**
- F. Iosefa F. Samita (1838–1918)**
- G. Heber J. Grant (1856–1945)**
- L. Siaosi Alapati Samita (1870–1951)**
- M. Tavita O. MaKei (1873–1970)**
- N. Iosefa Filitia Samita (1876–1972)**
- P. Harold B. Lee (1899–1973)**
- S. Spencer W. Kimball (1895–1985)**
- T. Ezra Taft Benson (1899–1994)**
- V. Howard W. Hunter (1907–95)**
- H. Gordon B. Hinckley (1910–2008)**
- K. Thomas S. Monson (1927–)**



**8.** Tamai masini faaleotele leo. Na faaaoga e le Peresitene lenei mea, sa faapipii i lana matatioata, ona sa aafia lona siuofoga ona o ni taotoga sa togafitia ai le kanesa.

**9.** Tootoo. Na faaaoga e lenei Peresitene se tootoo i tausaga mulimuli o lona soifua, lea e talotalo faamama'i atu ai e faafeiloai i faalapotopotoga o tagata o le Au Paia o Aso e Gatai Ai.

**10.** Lisiti o le sefuluai. Na faamamafaina e lenei Peresitene ia aoaoga a Iosefa Samita e uiga i le sefuluai.

**11.** Talaau'ili i le Tauahuga. E fiafie le Peresitene lenei i tala tusitusia ma sa ia ta'ua lenei tala faamama'i i le tele o taimi.

**12.** Masini lomitusi. Sa avea lenei Peresitene ma se tasi o tusitala sili ona fatufatua'i a le Ekalesia.



**13.** Pelu. Na avea lenei Peresitene o le Ekalesia o se taitaiau i le Autau a Navu.

**14.** Ula fugalaau. Na malaga le perofeta lenei i Hawaii i le 15 o ona tausaga o se tasi o uluau faifeautalai a le Au Paia o Aso e Gata Ai iina.



**15.** Uati taga. Na faaaoga e le perofeta lenei mea i le aso o le Tagatavaleina i le Falepuipui i Karesasi.

**16.** Faailoga o le Pafalo Siliva a le Sikauti. Na avea lenei Peresitene ma se tasi na muai faalauiloaina le Sikauti i le Ekalesia.



# FAAMANUIAINA E ALAI Aufono

**Saunia e Elder M. Russell Ballard**

O Le Korama a Apostolo e Toasefululua



**L**ni nai tausaga ua mavae atu a o ou galue o se epikopo, sa feagai ai se aiga o la matou uarota ma se mafatiaga ina ua leai se galuga a le tama. Sa ou popole mo lo latou soifua manuia, ma sa ou asia lo latou aiga e faufautua ia i latou ma ofo atu se fesoasoani a le Ekalesia. O le tulaga mataina, latou te le i tali mai i la'u ofo mo se fesoasoani mo sina taimi, ma sa ou aveina atu loa le mataupu i le aufono a le uarota. I le agaga o le alofa e le faalau-aiteleina, sa ou faasoa atu ai lo'u popolega e uiga i lenei aiga lelei ma talosagaina ni o latou manatu i se auala e mafai ai ona matou faamanuiaina i latou.

Sa ofo mai le peresitene o la matou Aufona e asiiasi i le tina ma vaai po o a ni mea latou te manaomia faaletino ma galulue ma i latou i le mauaina o nisi mea latou te manaomia—e moni lava, o lona tiutetauave lea e tusa ai ma le polokalama a le Ekalesia. Na mavae ni nai aso, sa ia faataunuina mea sa lei mafai ona ou faia, ma na taliaina ma le lotomaualalo ma le agaga faafetai e le aiga le fesoasoani e ala i oloa. Na talanoa le peresitene o le korama a toeaina ma le tama o le aiga—e moni foi, o lana aia ma lona tiute lea—ma galulue faatasi ma ia i le sailia o se galuega. Na matauina e le peresitene o Alii Talavou e matua manaomia lava le valiina o le fare o le aiga, ma sa ia faatulagaina ana ositaulaga e galulue faatasi ma le vaega a fiaitalaga sili e vali le fare.

I le taimi o la matou talanoaga ma matua, sa ou iloaina ai le matuai tele lava o le aitalafu

## FAAMALOLOSIA O I LATOU O E MANAOOMIA LE FESOASOANI

"E taumafai sui auai o le aufono a le uarota ia latou iloa e uiga i manaoga, soifua manuia, ma le alualu i luma faaleagaga o tagata i a latou faalapotopoto-ga. Ia latou iloa foi tagata o loo feagai ma ni luitau faapitoa po o tulaga fesuiai. O nei faamatalaga o le a mafai ai e i latou ona faamalolosia i latou e sili atu ona manaomia la latou fesoasoani."

*Tusitalima 2: Taitaiina o le Ekalesia (2010), 4.5.1.*

*O loo maua le Tusitalima 2 ma faasa-lalauga o aoaoga mo taitai i le lalolagi atoa na faia ia Novema 2010 ma Fepuari 2011 i le LDS.org. Kiliki le "Menu" ona [kiliki] lea o le "Serving in the Church."*

o loo i ai ma o loo fai sina faaletonu o le totogiina o le latou mokesi. I le mulimulitai ai i taiala o le uelefea, sa ou fesilisili ai pe mafai e o la aiga lautele ona fesoasoani mai, peitai e itiiti se faamatalaga na maua mai. Ae ui i lea, na mafai ona iloa e lo matou peresitene o le Aualofa e i ai se tuagane maumea o le tina.

"E leai se uiga e faafesootai ai o ia," o le tala lea a le tina. "Ua tele tausaga ma te le o toe talanoa."

Sa ou malamalamā i lona faafitauli, ae na ou lagona le taua o le mulimuli i faatulagaga a le Ekalesia. Ma sa ma talanoa ai ma ia ma na iu lava ina maua mai lana faatagaga e faafesootai ai lona tuagane, sa nofo i se nuu mamao lava. Sa ou telefonu atu i ai ma faamatala i ai le tulaga faigata na i ai lona tuafafine laitiiti. I totonus o le tolu o aso ae taunu mai o ia i le Aai o Sate Leki ma fesoasoani i le faatulagaga o mea tautupe a lona tuafafine. I lea lava taimi, na fesoasoani ai le peresitene o le matou korama a toeaina e saili se galuga tumau ma lelei le totogi a lona toalua.

Ae ui i lea, o le mea e sili ona taua, ua sili lo latou vavalalata ma faatasia o se aiga. Ou te le iloa pe galo ia te au lena taimi faamomoiloto o le toe faatasia o le tina ma lona tuagane ina ua mavae le tele o tausaga o valavala. E ui ina sa aluese mai le Ekalesia lona tuagane, ae sa vave ona pipii atu le agaga o le tasi i le isi. O le mea na tupu, na iu ina toe malosi mai lona tuagane i le Ekalesia ma toe faafou ai lana sootaga ma lona aiga.

Na tupu nei mea uma ona o le galuega musuia a se aufono faatuatuaina a le uarota o loo galulue e tusa ai ma polokalama ua faatulagaina e le Atua mo Ana fanau e ala i Ana auauna. ■

*Mai le Counseling with Our Councils (1997), 15–17.*

# Na Ia Tauaveina O'u Faanoanoaga

*“E moni, ua na tauave o tatou tiga, na tauave foi o tatou faanoanoa” (Mosaea 14:4).*



## O MAFATIAGA E MAFAI ONA TAITAIINA ATU AI I LE ATUA

“E i ai i latou na aafia i ni mala, lea sa toetoe ina le mafai ona foia, ua foliga mai ua ilitata o latou uiga; ae afai e nonofo ma mafaufau, e oo lava i le mafatiaga na oo atu ia i latou e mafai ona faamaonia o se auala e siitia ai faaleagaga. O le mafatiaga lava ia e mafai ona taitai atu ai ae lē aveesea ai mai le Atua ma le malamala-maaga faaleagaga.”

Peresitene Tavita O. MaKei (1873–1970), *Treasures of Life*, comp. Clare Middlemiss (1962), 107–8.

## Saunia e Jane Bleak

**E**le gallo lava ia te au le taumafanafana ma le tautoulu o le 2009. O le aso 9 o Iuni na maliu ai lo'u tama, i le silia ma le 10 tausaga o mafatia i le gasegase o le mafaufau. O le aso 25 o Iuni sa faafusei ona maliu ai le ma tama tama e 22 tausaga le matua, ma e itiiti ifo ma le masina mulimuli ane ae maliu foi lo'u tausoga. O le aso 13 o Aokuso na faia ai se taotoga o le fatu o lo'u tina ua 82 tausaga ma amata ai se faagasologa umi o lona toe malosi ai. O le aso 18 o Oketopa na maliu ai lo'u tuagane e 41 tausaga. O le aso 31 o Oketopa na oso ai le ma'i fatu a lo'u toalua ma sa lei tata mo le valu minute. O le aufuimu, fomai feoai fesoasoani, ma se faamanuiaga faaleperisitu na toe manuia ai o ia.

E masani lava ona fesiliglia au e tagata pe faapefea ona matou taulimaina nei mea e tutupu. O la'u tali tumau o lo matou liliu atu lea i le Faaola, ma sa Ia tusia i matou. Na te le i tuulafoaiina i matou i o matou tofotofoga. Sa ou lagona le auauna mai ma le tauaveina o a'u e le lagi. E moni, na Ia “tauave [o'u] tiga” (Mosaea 14:4).

Na oo mai foi le faamafanafanaga mai aiga, uo, tagata o le uarota ma le siteki. Sa latou tusia ma le alolofa i matou i auala e le mafaitaulia. Sa tusi mai e le tama teine a le ma fanau e 13 tausaga o, Krystal, se tusi ina ua mavae le maliu o le ma tama tama o Michael. Sa ia toe faamanatu mai ia i maua le le tuulafoaiina

o i maua ina ua ia tusia faapea, “O loo tauaveina oulua e le Atua.” Sa toe faamanatu mai ia te au e lana tusi se mau i le Mataupu Faavae ma Feagaiga 84:88: “Ou te muamua atu i o outou luma. Ou te i ai foi i lo outou itu taumatau ma lo outou itu tauagavale, a o lo'u Agaga o le a i o outou loto, e siomia foi outou e a'u agelu, e lagolagoina outou.”

Sa ou maua le malosi i le faitauina o se saunoaga mai ia Elder Richard G. Scott o le Korama a Aposetolo e Toasefululua e faaautuina faapea, “Faalagolago i le Alii.” Na ia saunoa: “E masani ona saputu le oo mai o lui eseese ia i tatou i le taimi e tasi, i le taimi tonu lava e foliga mai ai ua matua lelei ma filemu mea uma i o tatou olaga. Afai o ia toatuga e le o ni iuga o sou faalogogata, o ni faamaoniga ia ua lagona e le Alii ua e saunia e te alualu atili i luma. O lona uiga na te tuu mai ia te oe mea e uunaia ai le alualu i luma, malamalamā ma le alofa e faaleleia atili ai oe mo lou manuia e faavavau. E manaomia se taumafaiga malosi tele lava, ina ia avatu oe mai le mea o lo o e i ai nei, i le mea ua Ia finagalo ia e oo atu i ai, ma o le tele o taimi, o le a e lagona i lena tau-mafaiga, le mafatia ma le tiga” (*Liahona*, Ian. 1996, 19).

Fai mai o ia o fesili faapenei “Aisea ua tupu mai ai lenei mea ia te au?” po o le “Aisea ua ou mafatia ai i lenei taimi?” e taitaiina atu ai i tatou i magaala pogisa.



*Na faia e Iesu Keriso, i Kete semane, se faataitaiga tonu lava o le faalagolago ina ua Ia aioi atu i Lona Tama “afai e mafai, ia ave ese lenei ipu ia te au.” Petai na Ia toe fetalai mai, “A e aua le faia lo’u loto, a o lou finagalo” (tagai Mataio 26:39–44).*

Nai lo lena, na fautua mai Elder Scott e fai ni fesili faapea “O le a se mea e tatau ona ou aoaoina mai i lenei aafifaga?” “O ai e tatau ona ou fesoasoani i ai?” ma le “E faapefea ona ou manatua ou faamaniuga e tele i taimi o faigata?”

Na ou teena le faaososoga e fesili atu, “Aisea?” Nai lo lena, na ou fesili mo le taitaiga a le Tama Faalelagi i o’u tofotofoga. Ua Ia faamanuiaina au i le faamoemoe mo le lumanai, fesoasoani ia te au e faamalolo i lo’u lotomafatia,

faateleina lo’u iloa o mea lelei o loo sionia ai au, tuuina mai ia te au ia avanoa e auauna atu ai, faalolotoina lo’u lotoalofa mo isi, ma faateleina lo’u alofa mo lo’u aiga ma uo.

Mai nei mea uma, na ou maua ai se molimau o la tatou lu’i o le tuuina atu lea o o tatou loto i lo tatou Tama Faalelagi aua ua na o le pau lea o le tulaga e mafai ai ona toe faaleleia ma faamomosi i tatou i auala na Ia mamanuina patino mo i tatou taitoatasi. ■

### Taulimaina o Tiga

- E le o tuulafoaia i tatou i o tatou tiga aua o lesu Keriso—“o le tagata faanoanoa, ua masani foi ma le tiga” (Isaia 53:3)—ua na tauaveina o tatou faanoanoa e avea o se vaega o le Togiola.
- E mafai ona tatou taumafai e teena le faaososoga e fesili atu ai, “Aisea?” Nai lo lena, e mafai ona tatou fesili atu mo le taitaiga a le Alii.
- E mafai ona tatou taliaina le lu’i ina ia tuuina atu o tatou loto i lo tatou Tama Faalelagi.

Mo nisi faamatalaga i lenei autu, tagai i le Faataoto 3:5–6 ma Joseph B. Wirthlin, “O Le a Oo Mai le Aso Sa,” *Liahona*, Nov. 2006, 28–30.

### AISEA E MAFAI AI ONA TATOU FAALAGOLAGO I LE ALII?

Na fesoasoani Elder Richard G. Scott o le Korama a Aposetolo e Toasifululua i le taliina o le fesili lenei i lana saunoaga o le konafesi aoao “Faalagolago i le Alii” (*Liahona*, Ian. 1996, 19–21).

1. E silafia e le Atua le mea o loo la faia. Pe a tatou ui atu i tofotofoga mo Ona faamoe-moega, e mafai ona tatou faalagolago atu ia te la e fesoasoani mai ia i tatou.
2. O le fuafuaga a le Atua o le faaeaina lea o i tatou ina ia mafai ona tatou toe foi atu ma nonono faatasi ma la.<sup>1</sup>
3. O le faatoilaloina o tofotofoga o se vaega o lena fuafuaga. A tatou faia o lea, tatou te maua le malosi, malamalama, faatuatua, ma faalagolago i le Atua.<sup>2</sup>

Mafaufau e faasoaa atu le lauga a Elder Scott “Faalagolago i le Alii” ma se tasi o loo i ai se tauiviga.

#### FAAMATALAGA

1. Tagai i le *Mataupu Faavae o le Talalelei* (2009), 10–11.
2. Tagai *Mataupu Faavae o le Talalelei* 19–22.

O tofi ma nisi o tiute o le Perisitua Mekisateko:

# OLE PERISITUA

## OLE PULE LEA E GALUE AI I LE SUAFA OLE ATUA

**E**pulea e lo tatou Tama oi le Lagi le lagi ma le lalolagi. O Lona mana faavavau o loo faatumaunu ai le atoatoa o le faatulagaga o le atulaulau. Ua Na faasafua mai se vaega o Lona mana i alii agavaa o le Ekalesia, e pulea ai Lana Ekalesia i le lalolagi. Ua ta'ua lenei pule ua faasafua mai, o le perisitua. Ua tatou vaaia lenei mamanu o tiutetauave ua faasafua atu, i le Feagaiga Fou, ina ua tuuina atu e Iesu Keriso i Ana Apostolo le pule e galulue ai i Lona suafa (tagai Mataio 16:19).

O le mamanu lenei a le Atua e faataatau i le taitaiga. Ua faatulagaina i le lalolagi i le taimi nei. Ua faatagaina i latou o e umia le perisitua e galulue i le suafa o le Atua i le taitaiina o Lana Ekalesia ma le faafoeina o sauniga paia e tatau ai mo le faaolataga, e pei o le papatisoga, faamauga, tauimaina o le faamanatuga, ma le faaipoipoga faalemalumalu. E moomia e alii, tamaitai, ma tamaiti faamaoni uma o le Au Paia o Aso e Gata Ai ni sauniga faaleperisitua ma o le a faamanuiaina i latou i le mauaina o na sauniga.

### Tofi o le Perisitua

E lua vaega o le perisitua: Mekisateko ma le Arona. E sili atu le pule a le Perisitua Mekisateko nai lo le Perisitua Arona.

I totonu o nei vaega e lua, o loo i ai ni tofi faapitoa, po o ni vaega o tiutetauave. O tofi e aofia i le Perisitua Arona o le tiakono, aoao, ositaulaga,

ma le epikopo. E aofia i le Perisitua Mekisateko ia tofi o le toeaina, faitaulaga sili, peteriaka, Fitugafulu, ma le Apostolo. Ua faatulagaina i latou o e umia nei tofi i ni korama, po o ni vaega. E tofu ia tofi taitasi ma se tiute faapitoa ua atofa atu i ai.

### Ki o le Perisitua

O le upu *ki* ua faasino lea i le pule e pulefaamalumalu ai i iunite po o puleaga faapitoa o le Ekalesia. I totonu o siteki ma uarota, mo se faataitaiga, e na o le peresitene o le siteki, o le epikopo, ma peresitene o korama e umia ki o le perisitua. E tuuina atu ki e ala i le faaee atu o lima o se umia le perisitua ua faatagaina na te faaeeina atu.

- E mauaina e Peresitene o korama o le Perisitua Mekisateko ia ki o le au peresitene ma le faafoeina o mea faaleagaga (tagai i le MFF 107:10, 18–19).
- E maua e Peresitene o korama o le Perisitua Arona ia ki o galugega a agelu ma le faatinoina o sauniga e pei o papatisoga ma le faamanatuga (tagai MFF 107:20).
- E umia e le Peresitene o le Ekalesia ia ki uma o le perisitua mo le Ekalesia atoa (tagai MFF 81:1–2).

O tofi ma nisi o tiute o le Perisitua Arona:



2. O faitaulaga sili e "taitai i mea faaleagaga" ma e i ai "le aia e galulue ai i" tofiga o le toeaina, ositaulaga, aoao, ma le tiakono (MFF 107:12).



3. O Peteriaka e tuuina atu faamanuiga faapeteriaka (tagai i le MFF 107:53; 124:91–93).



4. O Fitugafulu e folafola atu le talalelei ma avea ma molimau faapitoa a lesu Keriso i lalo o le taitaiga a le Korama a Apostolo e Toasefululua (tagai MFF 107:25, 34).



5. O Apostolo e auauna atu o ni "molimau faapitoa o le igoa o Keriso i le lalolagi atoa" (MFF 107:23).



1. O Tiakono e tufaina le faamanatuga.



2. O Aoao e "leoleo pea i le ekalesia, ma faatasi ai ma le faamalolosia o i latou" (MFF 20:53).



3. O Ositaulaga e "aoao, . . . papatiso atu, ma faamanuia le faamanatuga, ma asiiasi atu i aiga taitasi o le au paia" (MFF 20:46–47).



4. O Epikopo o ni peresitene o le korama a ositaulaga ma, i le avea ai ma faitaulaga sili, e pulefaamalumalu i tagata uma o le uarota (tagai i le MFF 107:87–88). ■



"A aunoa ma ia sauniga, ma le pule o le perisitua, e le faaalia mai le mana o le amioatua i tagata i le tino" (MFF 84:21).

O u te le i talosaga atu lava i le Atua mo se mea Na te le i aumaia ia te au i lena lava taimi,” o le tala lea a lo’u toalua o, Tepora. Ou te maofa pea i lenei faamatalaga e ui lava sa ou i ai ma ia i le taimi atoa na faataunuina ai. Ma e masalo e matuai tete’i ai foi nisi o e na silafia le tauiviga a Tepora ma le ma’i matautia o le pa’u mo le fitu tausaga, o le lua tausaga o tauivi ma le kanesa o le susu, ma iu ai lava ina maliu i le aso 19 o Setema, 1990. Peitai o i latou o e maofa ma tete’i atonu e le malamalamā i faamanuiaga faaleperisitua po o ona faataunuuga. Sa ou aoaoina e a’u lava ia ma le faigata, le uiga o le umia o le perisitua ma faaaoga ina ia faamanuia ai isi.

E ui lava sa malolosi uma ou matua i le Eklesia ma faamaoni i ona aoaoga, ae ou te le manatua le avea ai o le perisitua ma se faatosinaga faapitoa faaleagaga i le taimi o lo’u laitiit. Ou te le manatua se taimi na ou ma’i tigaina ai ma moomia ai se faamanuiaga, ma e ou te le manatua foi se isi tagata o lo’u aiga na tuuina atu i ai se faamanuiaga faaleperisitua.

O lenei manatu le mamafa i faamanuiaga faaleperisitua na faaauau atu i lo’u lava aiga ina ua ou faaipoipo ma fai le ma fanau ma lo’u toalua. Sa ou tuuina atu se faamanuiaga faaleperisitua pe a matuai ma’i tigaina lava se tasi pe faia foi se taotoga. Sa ou faia foi ni nai

na seasea lava ona ia talosagaina se fesoasoani faaopoopo faaleagaga lea atonu sa ia moomoo i ai.

Na sua o maua olaga, ina ua faailoa mai e le fomai, ia Mati 1989, ua maua lo’u toalua i le kanesa. Ona o le tulaga e le masani ai o lona kanesa, na le i iloaina ai e fomai tipitipi mo le lua tausaga. E oo atu i le taimi na iloa ai, ua salalau ma ua matuai faaititia lona avanoa e toe malosi mai ai. Ina ua iloa sa matou i ai i se tauiviga e le mafai ona matou taulimaina na o i matou, sa tatala atili o maua olaga mo se fesoasoani faaleagaga. Sa anapogi le matou uarota mo Tepora, ma sa ma talia ma le agaga faafetai le tausiga a le Aualofa. Sa oo ina toatele i latou na tauina lana taaa. Sa fautua mai foi se tasi o uo sa onosa’ia lea lava ituaiga o togaftiga o le a oo i ai lou toalua, na ia talosagaina ma mauaina ni faamanuiaga faaleperisitua i taimi na sili ona faigata o togaftiga. Sa ia fautuina i maua ia faia foi lea lava tulaga—ma saili se fesoasoani faaleagaga ina ia tatalia ai aafiaga o togaftiga.

Sa faigata le togaftiga e faaaoga ai le leisa. Sa oo lou toalua i tulaga uma na mafaufauina. Sa ma’i o ia mo le tele o aso pe a uma se togaftiga. O le tele lava o aso e taoto ai i le moega, ma na avea ma se galuega le ‘ai. Ae i lea taimi i lea taimi sa ma aoaoina ai ni auala e fetaiai ai ma luitau taitasi.

# Faamanuiaga o le Perisitua

---

## AOAO E FAALAGOLAGO I LE ATUA

faamanuiaga mo lo’u toalua mo se fesoasoani i ona lagona, ae na seāseā lava.

O le tuuina atu o se faamanuiaga sa avea lava pea o se aafiaga lelei mo au. Ae ona o lo’u le malamalamā ma lo’u le faatuatuina o au lava ia na faaititia ai lo’u faatinoina o lenei galuega faaleperisitua. Sa ou tauivi ina ia ou iloa upu e tautala atu ai, ma le le mautinoa po o upu na oo mai i lo’u mafaufau o le finagalo moni lava lea o le Atua.

Na i ai se tamai suiga o lenei tulaga ina ua iloa e lo’u toalua o loo ia mafatia i le ma’i matautia o le pa’u. O na tausaga o tauiviga ma se faama’i o le matua’i vaivai lava ma ua le toafimalie, sa na o faamanuiaga faaleperisitua i ni nai taimi sa fesoasoani ai. Sa iloa e lo’u toalua le tulaga o lo’u le mautonu e uiga i le tuuina atu o ni faamanuiaga ma

I le aluga o lenei periota faigata, sa valaau mai lo’u toalua mo se faamanuiaga faaleperisitua, e pei ona fautuina mai e le ma uo. Sa ou tuuina atu ia te ia se faamanuiaga e tuuititia ai lona popole lea na ia lagonaina i le vaiaso muamua o lona togaftiga. E ala atu i se faamanuiaga faaleperisitua, o lona fefe lea sa i ai i le taimi o lona taotoga—e ui e le i aluese atoa—a e na faaititia. Na le toe faasuati ae na mafai nei ona maua se moe a o ou tuuina atu ou lima i luga o lona ulu ma faamanuia o ia. O nei faamanuiaga na aumaia ai ia i maua ni folafolaga o le fesoasoaniga ma le faamafanafanaga, faatasi ai ma se vaaiga i le lumanai. Sa faatumulia ai i maua i le mafanafana ma le fiafia.


Maimau pe ana mafai ona ou faapea atu na amata ona faafaigofie lou tuuina atu o faamanuiaga i lena taimi, ae e le

*Na faataunuina  
faamanuiaga  
uma—e ui lava  
matou te le i  
mauaina mea na  
sili ona matou  
mananao i ai.*



mafai. Sa ou tuuina atu le faamanuiaga na talosagaina, ae sa faaauau pea ona faafaigata ia te au le faaaogaina o le perisitua. Ou te le i ta'uina lava i lo'u toalua lo'u tulaga le mautonu, ae na mafai ona ia iloa lo'u musua. Peitai, o tofotofoga faigata ia, ma sa ia iloa lelei e tatau ona maua e ia se fesoasoani ma o au le tagata e mafai ona ia maua mai ai. O lea la, a manaomia e ia se fesoasoani, ona fesili mai lea.

A e le i tuuina atu soo se faamanuiaga, sa ou iloa le mea na ou manao e faamanuia ai o ia: sa ou manao ina ia faamanuia o ia ina ia malosi na i lo se isi lava mea. Ma sa manao ai foi o ia. Ae e lei oo mai lava lena faamanuiaga. O



### IA OGATASI MA LONA FINAGALO

"Ao tatou faaaogaina le mana e le masalomia o le perisitua a le Atua, ma a o tatou teufatuina Ana folafolaga o le a faafotofoga ma tali mai o la i tatalo faatuatua, e ao ona tatou manatua i taimi uma, o le faatuatua ma le mana faamalolo o le perisitua, e le mafai ona aumaia ai se taunuuga e ese mai ma le finagalo o Le ana le perisitua. O loo aoao mai lenei mataupu faavae i le faaaliga lea na faatonuina ai toeaina o le Eklesia e tuu atu o latou lima i luga o e mama'i. O le folafolaga a le Alii 'o le faatuatua ia te au ina ia faamaloloina, *ma e le i filifilia ia otī, o le a faamaloloina'* (MFF 42:48; faaopoopo le faamamafa)." . . .

Elder Dallin H. Oaks o le Korama a Apostolo e Toasefululu, "Faamaloloina o e Mama'i," *Liahona*, Me 2010, 50.

mea na oo mai, o faamanuiaga o le mafanafana, ma e lei aveesea ai le faigata ae na faigofie atu ona tatalia.

Sa amata lemu lava ona ou malamalamā atili i le auala e galue ai le perisitua ma faamanuiaga o le perisitua. E le o se meafaigaluega le tuuina atu o ni faamanuiaga ina ia maua mai ai le mea o loo ou moomia ae o se auala e maua mai ai se fesoasoani. Na ou aoao e faalagolago i le Alii ma Lona finagalo nai lo le mea na ou manatu e tatau ona fai. Sa ou maua le faamautinoaga o upu ia na oo mai i lou mafaufau o upu moni lava ia na finagalo le Atua ou te tautala ai. Ma e ui lava e le i faigofie ia te au le tuuina atu o ni faamanuiaga, ae na ou aoao ia faalagolago i lagona na ou maua a o tuuina atu ni faamanuiaga.

Ina ua maea togaftiga o Tepora, na amata loa le tulaga faigata o le faatalitali pe na aoga ia vailau faafomai ia te

ia. Sa ma fiafia i le taimi lenei ua leai ai ni toe faatulagaga o vaaiga a le fomai, suesuega, ma togaftiga. Peitai, sa i ai lava le popole i o ma mafaufau atonu na i ai ni siama o le kanesa na sao mai vailau oona na taumafai e tape le kanesa ma ua toe ola.

Na faamautinoa mai lo ma popolega tele, i lea taimi ma lea taimi, i ni faailoga laiti faaletino: e le i manuia ia togaftiga. Sa foliga fiafia pea fomai, a e na ma iloa ua le o toe umi se taimi.

Sa matua toofilemu lava ia masina mulimuli e ono o le soifuaga o Tepora. Ina ua le manuia se tasi taumafaiga mulimuli, na ma filifili loa e le toe faaaauauina ia togaftiga ae ma o i le fale ma faaaoga le taimi o totoe ma te fiafia faatasi ai. Atonu e le talitonu nisi sa avea o se taimi matagofie nei masina, peitai sa avea ma se taimi sili atu o lo'u olaga.

Na fautua mai nisi o uo ma aiga na popole i le taimi lea, e manaomia ona matou talitonu i le Alii i la matou taumafaiga e faasaoina lona ola. Na latou tau mai ia te au sa ia te au le perisitua ma sa tatau ona ou faaaogaina e faamalolo ai o ia. E ui ina sa ou malamalamā i o latou lagona, a e le i malamalamā nei uo i le mea na tupu. E lei i ai se isi mea na sili atu ona ou manao i ai nai lo le folafola atu o le ola ia Tepora, ae e le i oo mai nei upu ia te au a o ou tuuina atu se faamanuiaga ia te ia. E le i ai se isi mea na ia moomoo i ai nai lo le mauaina o se faamanuiaga o le soifua maloloina, peitai na te le i lagona e tatau ona ia talosagaina. Na ma talitonu uma lava i vavega ae na ma iloaina le ma vaaiga faatapulaaina i se aafiaga lea e fetau i se fuafuaga e faavavau.

O le mea na tupu sa avea ma se vavega maoae. E le i folafolaina atu ia te ia le ola, i ona faamanuiaga, ae na tuuina atu se faamautinoaga o le mea na tupu o le finagalo lea o le Atua. E le i folafolaina atu ia te ia se tulaga faigofie ae na tuuina atu se fesoasoani e onosaia ai taimi faigata. E le i faatagaina o ia e nofo ma taus le ma fanau ae na faamautinoa atu ia te ia noataga o le faavavau. Na maliu o ia ma sina tiga ititi ma sina le lagolelei, faatasi ai ma lona aiga i ona autafa.

Ou te iloa o loo soifua le Atua ma e matua popole lava mo i tatou. Na te tuuina mai ia i tatou le mafanafana ma le fesoasoani pe a tatou manaomia le malosi ma le malamalamā. E ui ina faigata le olaga, ae ua folafola mai e le Alii o le a fesoasoani i o tatou tofotofoga, ma o se tasi o auala e oo mai ai le fesoasoani, e ala mai lea i faamanuiaga o le perisitua. I le iloaina o lenei mea, na mafai ai ona faapea mai lo'u toalua, "Ou te le i talosaga atu lava i le Atua mo se mea Na te le i aumaia ia te au i lena lava taimi." ■

# O Le Mana o se Faataitaiga Amiontonu

Saunia e Jerry Stringam

**I**a Aperila 1992, sa nonofo ai lo matou aiga i Provo, Iuta, ina ua matou siitia mai Kanata e faamaea lo'u faailoga tikeri o le faaenisia i le Iunivesite a Polika Iaga. Sa faauo atu lou atalii o Jase, e 17 tausaga, i se tamaitai talavou e igoa ia Krista.

I le po o le Aso Toonai i le faaiuga o le vaiaso o le konafesi aoao, sa sau ai Jase i le potu malolo ma faanoi e faaaoga le taavale e o ai ma Krista e inu se la ipuinu. Sa ou togi atua le ki ia te ia, ona alu lea i le umukuka e telefoni ia te ia. Sa mafai ona ou faa- logo i le itu e tasi o le talanoaga, sa faapea:

**“Talofa, Krista,  
o au, o Jase.**

Sa ou mafaufau pe e te manao ta te o e inu se ta ipuinu.”

**Leai se pisa.**

“O le uiga o lau tala sei uma le sauniga perisitua? Ia, ua lelei, ou te valaau atu la i le taimi lena.

**Toe feiloai.”**

Sa tuu i lalo e Jase le telefoni ma toe foi mai i le potu malolo.

“E a la, lua te o?” o lau fesili lea.

“Fai mai e fia alu,” o lana tali lea, “ae fai mai e toe valaau atu ia te ia pe a ou foi mai le sauniga perisitua.” Sa ia savali lemu atu i lona potu, ma se foliga faanoanoa.

Sa pei na ou lavea i se faa- putuga piliki. Sa ou ola ae i Alberta i saute, toeitiiti 80 maila (130 km) le mamao mai le nofoaga autu o le siteki. E lei i ai lava se tasi na mafaufauina ou te alu atu i sauniga o le konafesi, aemaise le sauniga perisitua, e oo lava i ou matua, o e na i ai o la tofiga faaletaitai i le matou paranesi. A o lea ua i ai se tasi o loo faitauina lea tulaga.

O le a sa'u tali i foliga faanoanoa o lo'u atalii a o ia alu atu i lona potu? Sa ou iloa o la'u faaiuga o le a avea ma se faataitaiga i tausaga a sau.

Sa ou tu i luga mai lo'u nofoa ma valaau atu

ia Jase ma lo'u atalii lona lua, lea faatoa faauuina o se tiakono, “Sui o lua lavalava. E 10 minute tatou te o ai i le sauniga perisitua i le nofoaga autu o le siteki.” Sa ou faavave e sauni, ma ina ua ou aluese mai lo'u potumoe, ua saunia o'u atalii e toalua, ma sa matou agai atu loa i le taavale.

Ou te le i manatuaina lelei ia lauga, ae ou te manatua na matou lagonaina le Agaga. Sa lagona le fiafia i lo matou i ai faatasi ma ou atalii i le sauniga perisitua. Ina ua matou toe foi mai i le fale, sa lagona le fiafia o Jase ia te ia lava, ma sa ou lagona ai foi le fiafia. Sa ia valaau atu ia Krista, ona o ai lea e faatau a la ipuinu.

Na mavae le luasefulu tausaga talu mai lena aso, e le i misia lava e e umia le perisitua i lo matou aiga se sauniga perisitua se tasi o le konafesi aoao. Sa maua e lo matou aiga se avanoa e sui ai, ona o se faataitaiga amiontonu a se tamaitai talavou i ona talitonuga, ma o loo faaauau pea ona matou faalogi i upu a perofeta o aso e gata ai ma lagonaina le Agaga i sauniga o le perisitua i konafesi aoao. ■



# O Le Manatu Faavae o le Au Paia o Aso e Gata Ai i le Faaiipoipoga



Na soifua mai Hugh B. Brown i le aso 24 o Oktoba, 1883, i Granger, Iuta. Sa faauina e avea o se Apostolo i le 1958. Sa avea o ia o se fesoasoani ia Peresitene Tavita O. MaKei mo le valu tausaga. O le tusiga o i lalo na sii mai i lana tusi o le *You and Your Marriage*.

## Saunia e Peresitene Hugh B. Brown (1883–1975)

Fesoasoani Muamua i le Au Peresitene Sili

**O**le faaiipoipoga o se, ma e tatau ona avea ma se faamanatuga. O le upu *faamanatuga* e eseese ona faauigaga, ae i tagata Kerisiano e faailoa ai se faatinoga po o se sauniga faalelotu, e faapaiaina e se ua i ai le pule tatau. O se folafolaga, po o se feagaiga paia, o se faailoga faaleagaga po o se noataga i le va o ni vaega lava ia ma lo latou va ma le Atua. O lena faaiipoipoga na faavaeina ma faapaiaina e le Alii Lava Ia ma o loo faaalia i upusii nei:

“Ua fetalai mai foi Ieova le Atua, E le lelei ina toatasi o le tagata; ou te faia sona fesoasoani e tatau ma ia. . . .

“O le mea lea e tuua ai e le tane lona tama ma lona tina, a e faatasi ma lana ava: ona avea ai lea o i laua ma tino e tasi”

(Kenese 2: 18, 24).

Ina ua afio ese Iesu mai Kalilaia ma oo mai i le talafatai o Iutaia i talaatu o Ioritana, na mulimuli mai ia te Ia le motu o tagata, ma sa fesiliglia o Ia e le Au Faresao e faatatau i le teteaga.

“Ona tali atu ai lea o ia, ua faapea atu ia te i latou. Tou te lei faitaulia ea, o le na faia tagata i le amataga, na ia faia i laua o le tane ma le fafine,

“Na ia fetalai ane foi, O le mea lea e tuua ai e le tane o lona tama ma lona tina, a e faatasi ma lana ava: ona avea lea o i laua o le tino e tasi?

“O lea e le toe toalua ai, a o le tino e tasi i laua. O lenei, o e ua faatasia e le Atua, aua nei faateaeseina e se tagata” (Mataio 19:4–6).

## O Le Faaipoipoga e faataunuina ai Faamoemoega o le Atua

E manino lava na fuafuaina e le Atua ia tasi le alii ma le tamaitai. Na Ia faapaiaina le faavaeina o le faaiipoipoga, e ala i le pulefaamalumalu ai i le uluai faaiipoipoga. O se tulaga masani, maloloina, ma e manaomia ma na faavaeina ina ia faataunuai ai le faamoemoega o le Atua i le lalolagi.

O se elemene tutotonu i le faavaega o se aiga. E sili atu nai lo le faalapotopotoga faaletagata ina ia ogatasi lava ma tulafono faaleaganuu ma le lautele. E sili atu nai lo se mali liega i lalo o se faatagaga o le tulafono tatau. E tatau ma o se faamanatuga faalelotu lea e faia e alii ma tamaitai ina ia galulu faatasi ai ma le Atua i Lona faamoemoega ua faailoa mai ina ia avanoa ai le olaga faaletino ma le oti i Ana fanau agaga ma faataunuai ai le faafuina o le tagata i le tino ola pea ma le ola e faavavau.

E i ai nisi ua fai mai e mafai ona ausia le tulaga aupito maualuga, tuuto, ma sili atu ona manaomia o le olaga i fafotu o feagaiga o le faaiipoipoga. I se isi faaupuga, latou te faasaina nisi o e saili le mamalu aupito maualuga ina ia “faaleagaina e ala i fegalegaleaiga faaletino ma pei ni manu.” E leai se faatagaga i tusitusiga paia mo lea ituiga aoaoga faavae. I le tusi o Faatoato tatou te faitauina ai faapea,



"O le ua maua le ava, ua maua e ia le mea lelei, ua maua foi e ia le alofa mai ia Ieova" (Faataoto 18:22). . . .

Tatou te faitauina i le Mataupu Faavae ma Feagaiga, "O lenei foi e moni ou te fai atu ia te outou, o se faasa i le faaipoipoina e lei faauuina lea e le Atua, aua o le faaipoipoga e faapaiaaina lea e le Atua i tagata" (MFF 49:15).

#### **O Le Faaipoipoga i le Malumalu e Aumai ai le Fiafia Moni**

E talitonu le Au Paia o Aso e Gata Ai e tatau i alii ma tamaitai ona faaipoipo i le malumalu mo le olaga nei ma le faavavau ina ia maua ai le tulaga sili o le olaga ma le fiafiaga sili i lenei lalolagi ma le isi olaga. A aunoa ma sauniga o le faamauga o le faaipoipoga i le malumalu, e le mafai e le tagata ona ausia se tulaga faaleatua pe mauaina le atoatoaga o le fiafia. . . .

E na o le tasi lava le ituaiga faaipoipoga e talia atoatoa e se tagata o le Au Paia o Aso e Gata Ai: faaipoipoga i le malumalu po o le selesitila, lea na o malumalu lava o le Ekalesia e faataunu ai. Ua fausia ma faapaiaaina ia malumalu ina ia paia i le Alii ma avea o se nofoaga e faataunu ai sau-niga ma faapaiaaga faaleagaga ma le faavavau. E ui tatou te taliaina faaipoipoga faalemalo o loo faataunuina e faifeau a isi eklesia ma alii faitulafono po o se tasi ua agavaa faaletulafono e faataunuina, ae tatou te talitonu ua na o le malumalu o le Atua e mafai ai ona faataunu se faaipoipoga mo le olaga nei ma le faavavau, e se tasi ua i ai le pule lea na tuuina atu e Keriso ia Peteru ina ua la fetalai atu, "O se mea foi e te fusifusia i le lalolagi, e fusifusia foi lea i le lagi" (Mataio 16:19).

O lenei pule ua faasino i ai i tusitusiga paia o "ki o le malo o le lagi" (Mataio 16:19), ma i le faaipoipoga faaselesitila e tatalaina e na ki le faitotoa i le malo lena.

**E talitonu le Au Paia o Aso e Gata Ai e tatau i alii ma tamaitai ona faaipoipo i le malumalu mo le olaga nei ma le faavavau ina ia maua ai le tulaga aupito sili o le olaga ma le fiafiaga sili i lenei lalolagi ma le isi olaga.**

#### **E Faataunuina Atoatoa Tulaga Manaomia**

E i ai i le tagata manaoga patino autu—onomea, faaleagafesootai, faalenatura, ma le faaleagaga—ma e na o le faaipoipoga e faavavau ua faauuina e le Atua e mafai ai ona faataunuina ma le atoatoa.

Ina ia ola ai i se olaga faamanuiaina iinei ma le olaga faavavau pe a mavae lenei olaga, e tatau i le tagata ona alofa atu ma ia alofaina mai, auauna atu ma



ositaulaga, ia i ai se tiutetauave ma faatino le mana foafoa ua tuuina mai e lona Atua. “Ua ou sau ina ia latou maua le ola, ia maua atili ai lava” (Ioane 10:10).

Peitai atonu o le tulaga taua silisili o le faaipoipoga e le o le faamanuiaga lea e maua e le alii ma le tamaitai. O le faamoemoega o le la mafutaga na faailoa mai lava i le amataga i le poloaiga a le Alii: “Ia fanafanau, ma ia uluola, ma ia tumu ai le lalolagi, ia faatoilalo i ai” (Kenese 1:28). I faaipoipoga e tatau ai, e i ai le avanoa e faataunu ai e le tagata sona manaoga faalenatura ina ia foaoaina ma fua mai. E na o le mafutaga faalefaaipoipoga lava e mafai ona faataunuuina ai ma le atoatoa ma le fiafia lenei tulaga, o le fanau mai ma le tausia o se fanau. E tatau ona manatua e matua o fanau o loo latou fananauina—o a latou fanau—o fanau foi ia a le Atua. O Ia o le Tama o o latou tino agaga, ma i le taimi o le muai olaga na Ia faia ai ma le poto se tuutuuga mo le elemene faavavau ma le agaga faavavau

ina ia tuufaatasia ma mauaina le atoatoaga o le fiafia. O lea la e talitonu tagata o le Au Paia o Aso e Gata Ai o le Atua o le paaga lona tolu moni lea i lenei sootaga ma o le aumaia o fanau i le lalolagi i totonus o se mafutaga o le faaipoipoga ua faatagaina faalelagi o se vaega lena o Lana fuafuaga ina ia faataunu ai le faafuina o le tagata i le tino ola pea ma le ola faavavau.

#### O Le Natura e Faavavau o le Faaipoipoga

Ina ua filifilia e le Alii o Iesu le alofa atu i le Atua ma le alofa atu i tagata o ni poloaiga sili e lua, na Ia faamamaluina le alofa. E moni, ua ta'u mai ia i tatou o le Atua o le alofa lava ia. O le mea lea, e pei ona faavavau le Atua, e tatau foi ona faavavau le alofa, ma

**E** talitonu le Au Paia o Aso e Gata Ai o le Atua o le paaga lona tolu lea i lenei sootaga [faalefaaipoipoga], ma o le aumaia o fanau i le lalolagi i totonus o mafutaga paia faalelagi o le faaipoipoga, o se vaega o Lana fuafuaga.

ua fuafuaina foi ina ia faaauau pea i le faavavau o le a oo mai ia fua ma faamanuiaga. Peitai ina ia fiafia ai i avanoa ma faamanuiaga o le alofa faavavau e pei ona faatatau lea i tane ma ava, matua ma fanau, o le sauniga lea e faatagaina ma faapainaia ai lenei sootaga sili ona matagofie e le taliaina pe afai e i ai le tapulaa “o le oti lua te mavae ai.” Ina ia faavavau ia sootaga faaleaiga ma mafutaga o faaipoipoga, e tatau ona ta'u mai ma *le malosi* i totonus o le feagaiga o le faaipoipoga, “mo le olaga nei ma le faavavau atoa.”

E tatau i tagata uma ona iloa o latou tiutetauave i a latou fanau ma i feagaiga latou te osia e faatatau i ai. Ina ua fetalai mai le Alii, “E le mafai ona faaatoatoaina i tatou e aunoa ma i latou” (MFF 128:18), na faatatau o Ia i se filifili lea e o'o atu ona sooga i le lumanai faapea foi ma mea ua tuanai. E moni, atonu e sili atu le tuusao mai o o tatou tiutetauave mo i latou ua tuuina mai ia i tatou i lenei olaga nai i o tatou augatama. E le mafai ona tatou tali atu mo agasala, pe o agasala o le faia po o le le faia, a o tatou augatama, ae na Ia



lapatai mai nei te'i ua le faia le vaega a a tatou fanau, afa i e mafai ona faasino lo tatou toilalo i o tatou tiute ia i latou, ona pau lea o agasala i o tatou ulu.

O le faatoateleina e faavavau, o le faamanuiaga lea e faaopoopo atu i faamanuiaga o i latou o e mauaina le tikeri maualuga i le malo selesitila, lea, a faaopoopo atu i isi mea, o lona uiga e tusa lava pe a mavae le oti e mafai ona faaaauau pea ona 'au'au faatasi ma le Atua i le faataunuina o le faaofuina o le tagata i le tino ola pea ma le ola faavavau.

### Alualu i Luma o ni Soa e Faavavau

O le manatu faavae o le Au Paia o Aso e Gata Ai e uiga i le alualu i luma e faavavau e aofia ai le atiina ae faavavau, faateleina o le malamalama e faavavau, mana, poto, iloa, ma uiga ma mana uma e avea ai ma se atua. Ae i le fuafuaga a le Atua, e le mafai e le tagata ona maua lenei tulaga o le faaatoatoaina faifai pea i lona tulaga e lē mae'a po o le lē faaipoipo. E tatau ona i ai le tuputupu ae ma le faateleina o le tagata atoa —i se isi faaupuga, o se tagata ua maua ma ua tuufaatasia i le isi ona afa.

O lenei manatu faavae o le faaipoipoga, faatasi ai ma se vaaiga faalelagi, e aumai ai se uiga fou ma faaopoopo atu ai le taua, faaaloalogia, ma le mamalu i le manatu o le faaipoipoga. Faatasi ai ma lenei manatu faavae, o le a matua faaeteete ma mataalia ai le tagata mafaufau e uiga i le filifilia o lana soa e faavavau. O le mea moni lava a o le i ulu atu se alii ma se tamaitai i sea ituiga feagaiga faavavau, e tatau ona la lotomaualalo ma mafaufau loloto ma saili ma le agaga tatalo se taitaiga faalelagi.

O le tulaga paia faalelotu ma le mana e noa-tia ai sootaga faalefaaipoipoga [ua] matua faateleina ma talisapaia lea e tatau ai i le ulugalii, ao lei faaipoipo—ma e tatau lava, aua e taua, ona tutusa o la faatuatuaga—ona amata ma le sini e tasi i o la'ua mafaufau. E tatau ona la saunia ma agavaa e maua ia sauniga paia i maota e na

o i latou e agavaa e mafai ona ulufale i ai. O iina la te maua ai aoaoga, osia ni feagaiga, ma tootutuli ai i le fata fiaitaluga ma folafola atu le alofa faavavau ma le faamaoni, o le tasi i le isi, i luma o le Atua ma agelu. E moni o lea ituiga talitonuga ma faatinoga, faatasi ai ma ona tiutetauve ua tuuina atu faatasi, e avea ma tulaga mausali o le aiga, o le faamamaluina o le faavae o le faaipoipoga, ma le faaolataga o agaga o tagata.



### E LEAI NI FAAMA- NUIAGA O TAOFIA

"Ae faapefea le toatele o tagata matuata o

le Ekalesia e le o faaipoipo? Ona e le o so latou faatamala, latou te taulimaina na o i latou ia faigata o le olaga. Ia tatau taufai manatua, i le ala ma le taimi a le Alii lava ia, e leai se faamanuiaga o le a taofia mai Ana Au Paia faamaoni. O le a faamasinoina e le Alii ma taui atu tagata taitoatasie e tusa ai ma ona manaoga o le loto faapea foi taga faatino."

**Elder Russell M. Nelson o le Korama a Apostolo e Toasefululu "Faaiipoipoga Faaselesitila," *Liahona* ma le *Ensign*, Nov. 2008, 94.**

### O Se Galuega o le Faatuatua

O sea faaipoipoga o se faatinoga o le faatuatua, ma ua faapaiaina i luma o se paaga faalelagi. E tatau ona i ai le faatuatua ma le lototoa ina ia faataunuina ai, ma tumau pea e oo i le iuga, e ui i faigata, tofotofoga, lagona le lelei, ma nai maliu e ono fetaiai.

Pe a taliaina e se tasi ia tulaga ma matafaioi o lenei faigapaga e faavavau, e tatau ona ia iloaina o le toilalo i i e toetoe lava o le toilalo popo lea. Po o a lava ona faamanuiaga i nisi tulaga o gaoioiga, a e afai e toilalo se tagata i le faatinoina o ana matafaioi ua tuuina atu i feagaiga e faavavau, o le faasalaga matautia o le lē maua lea o le malo selesitila, e o faatasi ai ma le tiutetauve ona o tulaga ua oo i ai i latou o e na faia le feagaiga lea e nafa ma ia.

"O le faaipoipoga e faapaiaina lea e le Atua i tagata.

"O lea, e tusa ai ma le tulafono e tatau ia te ia se ava e toatasi, ma ia avea ai i laua ma tino e tasi, ia faataunuina ai e le lalolagi i nei mea uma le iuga o lona foafoaga;

"Ina ia faatumuina ai foi le lalolagi i le fuataga atoatoa o le tagata, e tusa ma lona foafoaga a o le i faia le lalolagi" (MFF 49:15–17). ■

*Na faaopoopo soāautu; ua faalaugatasia mataitusi tetele ma failogia.*



SA OU MATUAI  
MANAO LAVA E

**TAOFI**

## Taofia le igoa

O le auala ua ou faatoilaloina ai la'u vaisu o ponokalafi.

**S**a amata lau tauiviga ma ponokalafi i lou talavou, ina ua faailoa mai e nisi ia te au ni tusi ma amioga le talafeagai. E le i avea le talalelei ma se vaega ttau o lo'u olaga i lena taimi. E ui lava ina sa o lo'u aiga i le lotu i le taimi na ou i ai i le Peraimeri, ae i le taimi ina ua 13 pe 14 o'u tausaga, matou te le'i toe o. O se taunuuga la, sa le'i i ai moni ia aoaoga o le talalelei i le faiga o a'u faaiuga.

E lei i ai lava so'u manatu e ta'u i ou matua mea na faailoa mai ia te au e tuaoi ma uo. Sa ou matua maasiasi lava e toe talanoa i mea na ou vaai ma aafia ai. Sa ou le iloa pe faapefeara ona ou foiaina. O le a avea pea ma a'u mealilo, i le tele o tausaga a sau, la'u vaisu o ponokalafi.

## Faatosinaga a le Talalelei

A o lei toe mamao ona ou faauu lea mai le aoga maualuga, sa tupu ai se vavega laitiiti, o se mea o le a toe liliu ai lo'u olaga i le isi itu. E ui i le vavamamao o a'u faatinoga ma tulaga faatonuina o le talalelei, ae i se tasi o Aso Sa i le taeao na ou mulimuli ai i se uunaiga malosi ou te alu i le lotu ma totogi le sefuluai. Ina ua ou tau-nuu i le falesa, sa ou fesili mo tagata sa ou iloa. O se tasi o igoa na ou ta'u o le peresitene o Alii Talavou sa i ai a o ou tiakono, i le taimi mulimuli na ou lotu ai. Ua epikopo nei i le uarota.

Sa fesoasoani lenei epikopo lelei e toe aumai a'u i le Lotu. Sa ou tautau atu au agasala, ma sa ma galulue e faatulaga se fuafuaga o le alualu i luma. Sa ou salamo i le aluga o nai masina. Sa siitia lou perisitua. Sa i ai sou tofiga. Sa matua lelei lava lou tulaga, ma sa valaauna au e auauna atu i se misiona, ma e tele ni nai tausaga na puleaina ai le mea na fai ma a'u vaisu.

## Mau i le Neti

Ina ua ou foi mai ua mae'a la'u misiona, ou te le i tauivi ma se ponokalafi; aua sa leai se mea ou te maua ai. Na sua lena tulaga i le faaiuga o le vaitau o le 1990, ina ua matua faateleina le Initoneti. Sa faafuasei lava ona ou oo atu i ni ata mataga i luga o le initoneti, ma sa ou toe foi ai pea lava pea i saite o ata mataga i masina na sosoo ai. Na maileia au e le uepi.

Sa ou manao e aapa atu i se tasi mo se fesoasoani, ae sa ou le mau-tino po o ai—ae pe faapefeara foi. Pe faapefeara ona ou talanoa atu i ou matua e uiga i lenei mea? Pe faapefeara ona ou tauina atu i lo'u epikopo e ui lava sa tele lo'u alualu i luma, a e ua le mafai ona tuu lenei ituaiga amioga le mama? Sa ou matuai manao lava e tuu, ae sa ou matuai maasiasi lava i lo'u vaivaiga e tau atu i se tasi, o lea sa ou nofonofo ai lava ma la'u vaisu.

Ou te le i tauina foi i lou toalua, lea sa ma faaipoipo i le 2000. Sa ou manao e tau atu ia te ia la'u tauiviga i le taimi na ma tafafao faamasani ai, ae sa ou fefe nei vaai maualalo mai o ia ia te au, pe sili atu foi ona leaga, ne'i musu ma te faaipoipo. O lea sa ou pepelo ai. Ma sa faaauau ai pea i le ma mafutaga. Sa ou tau lafilafi ne'i maua a'u. Sa ou nanaina a'u ata i lau komepiuta. Pe a fesili mai lou toalua e uiga i ni saite faapitoa i le Initoneti, sa ou faafitia le mea o loo talanoa mai ai. E faapena ia vaisu; latou te foafoaina ni tagata pepelo maoae. Sa ou iloa le fausiaina o se papupuni sima i le ma ulugalii ma sa tiga tele ai o ia, ae sa le mafai ona ou faailoa atu lo'u faafitauli. E lei taua tele ia te au lau amio ae o le vaaiga a tagata ia te au.

O lo'u olaga itu lua—ma iu ai ina aluese le Agaga—na ou oo atu ai i le

faateleina o agasala matuia, e aofia ai ma le le faamaoni. Sa maua e lo'u toalua ni uunaiga malolosi o loo i ai se mea o loo sese ma sa ia ta'u maia ia te au. Ma le matuai salamo, sa ou tauina atu ia te ia la'u mea sa fai.

O lo'u manatu aupito maualalo lena, o le manatu lea na ou iloa *ua tatau ona ou sui*. Sa nofo mai i ou luma le tamaitai ou te alofa i ai. E alofa o ia ia te au. Sa ou faalataina o ia. Ona ou naunau ai lea e faia soo se mea e faasao ai le ma mafutaga ma lo ma aiga.

## Toe faaleleia

Sa amata ona ma feiloi soi ma lo'u epikopo e galulue i le faagasologa o le salamo ma le a'oiga a le Eklesia. Sa ia fautuaina lou auai atu i fonotaga o le polokalama o le toe faaleleia o se vaisu, lea na faia e le Tautua a le AAG mo Aiga. Ou te le i faalogo lava i le polokalama. Sa ou faalogo e fai e le vaega ni fonotaga e le faalauaiteleina ma e leai se totogi, e faatatau lava i laasaga e 12 o le Alcoholics Anonymous, ma fausia ai se auivi o aoaoga faavae ma mataupu faavae o le Eklesia.

Ou te tau atu o fonotaga muamua lava, sa ou manatu ai faapea, "E le manaomia lo'u i ai iinei. E le o i ai so'u faafitauli i ponokalafi. E mafai ona ou tia'ia i soo se taimi." O lena mea, ioe, e lē sa'o.

Faatasi ai ma se faamalosiau mai lo'u epikopo, sa faaauau pea ona ou auai. Na amata ona liusuavaia lo'u faamauluga, ma sa amata ona ou galueaiina ia laasaga o le polokalama: o le faamaoni, faamoemoe, faalago-lago i le Atua, upu moni, tautau atu, suiga o le loto, lotomaualalo, saili le faamagaloga, totogi ma toe faalelei, tali atu mo au lava i aso uma, faaalgia

## FAASAOLOTOINA: UA NA O LE ATUA LAVA



"Pe o e tauivi ma se agasala po o se vai-vaiiga? E mafai ona avea o se mea faigofie e pei o le leai o se naunautaiga e ala ai i luga i le taeao po ma suesue i tusitusiga paia ma fai se tatalo. E mafai foi ona avea o se mea matautia, e pei o ponokalafi i le Initoneti po o le lē lava o le puleaina o oe e amioga lelei, ua e lagona ai ua tosaina oe i lalo i se tulaga le lelei ma ua leai sou faamoemoe. O e lagonaina lou le fiafia i mea o loo e faia ae peitai ua leai sou naunautaiga e te liliu ese mai ai? la aapa atu ma faamaualalo oe lava. Ua lava le mana faataga a le Alii e suia ai lou loto, ma liua ai lou olaga, ina ia faamamaina lou agaga. Peitai e tatau ona e faia le taga muamua, o le faamaualaloina lea o oe lava ia ma iloa ua na o le Atua lava e mafai ona e maua ai le faasaolotoina."

Elder M. Russell Ballard o le Korama a Apostolo o Toasefululu, "Be Strong in the Lord," *Ensign*, lulai 2004, 12.

patino, ma le auauna atu. Mo le taimi muamua lava mai se taimi umi, sa ou ola ai i se olaga e "manino le mafaufau", o se olaga e saoloto mai ponokalafi. O le toe faaleleia e le faapea ua matua "uma" lava, ae ua folasia mai ia te au se tulaga fou o le saolotoga. Na oo mai aua a o ou faatinoina laasaga e 12, sa ou malamalama i mea na i tua atu o le mea sa fai ma a'u vaisu.

Sa ou aoaoina o le toatele lava o tagata e tauivi ma vaisu, e liliu atu i ni "vailaau faaletagata lava ia" e faatumu ai le gaogaosa i o latou olaga. O le tiga, faanoanoa, tuulafoaiina, fefe, po o isi ituaiga o faaletonu e mafai ona avea ma 'amoti e faaosofia ai tagata

e faaaoga nei vailaau faaletagata lava ia e faanofogofie ai i latou. O nisi e faaaogaina fualau e faatonuina. O isi e faaaoga fualau faasaina. O isi e faaaoga meainu malolosi. Mo a'u, sa aumaia e ponokalafi se "fofo vave" puupuu e le moni, lea sa ou manatu ou te moomia.

O le iloaina o le mea na faaosofia ai la'u vaisu o le tasi lea o vaega. O le aloese mai siosiomaga na fesoasoani i la'u vaisu o le isi lea. O lenei tulaga e manaomia ai le mataala i le 24 itula o le aso, fitu aso o le vайaso mo lo'u olaga atoa. E le mafai ona ou alu i le initonet i "tau ina autilo." O le mea moni, afai e na o au, ou te le alu lava i le initonet. E le mafai ona ou tilotilo i se faasalalauga ma faafifia i lo'u mafaufau. E leai se keipo o la matou TV i le fale. A ou alu i le galuega, ou te aloese mai le faaogaina o nisi o auala ou te iloa o loo i ai ni ata o loo faapipii i na auala e mafai ona faaosofia ai ni manatu le talafeagai. A amata ona ou se'e ese ma alu solo lo'u mafaufau, ou te liliu atu i lo'u toalua, i lo'u epikopo, ma le tatalo mo le malosi.

O a'u vaisu na aafia ai vaega aupito iti o lo'u olaga, ae o le faia o nei puipuiga e matua aoga lava. E le mafai ona ou faatalale i nei puipuiga aua ou te iloa le mea e mafai e la'u vaisu ona fai ia te au ma i latou ou te alofa i ai.

### Faalagolago i le Atua

E ui i lea, e le o se mea e na o le aloese mai le leaga. E tatau foi ona ou faia e le aunoa, ma le mataala ni taumafaiga e liliu atu i le lelei. Na fesoasoani le tele o laasaga e 12 ia te au e faia lenei mea i le aumaia atili o au i le Atua.

O aso uma pe a ou ala, ou te tootuli ma faafetai i le Tama Faalelagi

mo le tuuina mai ia te au o le avanoa e salamo ai i au agasala ma alu atu ia te Ia e ala i le Togiola a Lona Alo o, Iesu Keriso. Ou te aioi atu ia te Ia e ta'u mai ia te au Lona finagalo ina ia mafai ona ou faia. Ou te aioi atu ia te Ia e taitai ese au mai faaososoga. Ou te tatalo e pei o loo ou faalagolago atu i le Tama Faalelagi i minute uma o le aso—aua o loo ou faia—ma e ou te teuina lena tatalo i lo'u loto i le aso atoa. Ou te toe tatalo i po taitasi. Ou te faaluina foi sina taimi i tusitusiga paia i aso uma ina ia mafai ona taulai atu ou mafaufauga i mea mama. Afai ou te le faia nei mea o se mausa, ou te le maua le Agaga i lo'u olaga. Ma pe a tuua na o au, e le lava lo'u malosi e teena ai faaososoga.

Sa ou talitonu mo se taimi umi e mafai ona ou foia au amioga i so se taimi ou te manao ai i lo'u lava loto. Ae na ou matua toilalo mataga. Ina ua mavae se taimi, sa ou le lavā i au lava taumafaiga, ae maise ina ua le aoga "a'u lava taumafaiga." Sa ou iloa e le mafai ona ou faia le mea na ou manaomia e aunoa ma le fesoasoani a le Alii. Na fesoasoani mai le Eteru 12:27 ia ou malamalama atili i lenei mea. Na fetalai atu le Alii ia Moronae, "Ua lava lo'u alofa tunoa i tagata uma o e faamaulaloina i latou lava i o'u luma; aua afai latou te faamaulaloina i latou lava i ou luma, ma faatuatua ia te au, ona ou faia lea o mea vaivai ma mea malolosi ia te i latou."

O le taimi lava na ou alu atu ai ia te Ia, ma faia pea mea uma na mafai ona ou faia (tagai i le 2 Nifae 25:23), sa ou iloa ai o Lana fesoasoani e mafai ai ona sili atu mea ou te mafai ma avea ma sē e sili atu nai lo se isi lava mea na ou moemiti i ai pe a ou

faalagolago i au lava taumafaiga (tagai i le Alema 7:14).

O loo ma galulue nei ma lou toalua o ni tagata faamaopoopo i fonotaga a le polokalama o le toe faaleleia o mea ua fai ma vaisu. Na ia aoaoina—ma o loo fesoasoani i isi ia malamalamala—o le Togiola e le gata ia i latou o loo galulue e foia se mea ua fai ma vaisu ae faapea foi i latou ua aafia i vaisu ae le o ni a latou lava filifiliga. Pe a tatou liliu atu i le Faaola, e mafai ona galue Lona alofa mutimutivale i o tatou olaga uma.

Mo i latou o loo tauivi ma vaisu ma i tagata latou te alolofa i ai, e mafai ona ou molimau atu o loo i ai le faamoemoe. E i ai pea lava le faamoemoe i le talalelei a Iesu Keriso.

### Faamoemoe i le Faaola

Ou te matuai faafetai ia Iesu Keriso ona sa Ia faasaoina moni mai lava au mai filifili o le agasala. O vaisu e pei lava ua taofia oe e ni filifili lea e “noanoatia ai le fanauga a tagata, ina ia avea faatagataotaua i latou i le vanu faavavau o le malaia ma le auega” (2 Nifae 1:13). Ina ua ou iloa ua ou oo i faafitauli, sa ou le iloa po o fea ou te liliu i ai. Sa ou matuai popole aua sa le mafai ona ou faasaolotoina au lava mai ou mafatiaga. Peitai na mafai ona faasaoloto au e le Alii. Ina ua ou liliu atu ia te Ia, sa i ai o Ia iina e fesoasoani mai.

E mafai ona ou faapea atu e pei o Amona: “Ioe, ua tusa au nei ma le leai; o lo’u malosi foi ua ou vaivai ai; o le mea lea ou te le mitamita ai ia te au lava, ae peitai, ou te mitamita i lo’u Atua, aua o Lona malosi ou te mafai ai mea uma” (Alema 26:12). Ou te iloa e *mafai* ona fesoasoani mai leAtua ia tatou faia mea uma, e aofia ai le faatoilaloina o filifili o vaisu. ■



### FESOASOANI I LE FAATOILALOINA O PONOKALAFI

*O le polokalama o le toe faaleleia o mea ua fai ma vaisu, o loo ofoina mai e le Tau-tua a le AAG mo Aiga, e aofia ai fonotaga lagolagosua e le faalauaitelina, ma e leai se totogi, mo tagata o loo feagai ma vaisu o le ava malosi, fualau oona (faata-gaina faafomai ma faasaina), tapaa, kofe po o le lauti, ponokalafi, amioga feusuai le talafeagai, taaloga faitupe, manaoga tutusa, ma tulaga faaletonu o le tausami. Ina ia maua se fonotaga e lata atu, asiasi i le [www.ldsfamilyservices.org](http://www.ldsfamilyservices.org). E ono i ai foi i lou taitai perisitua ni faamatalaga e uiga i se fonotaga e latalata ane.*

E tusa lava pe le mafai ona e auai atu i se tasi o fonotaga, e mafai ona faamanu-iaina oe i taiala suesue a le polokalama. *Addiction Recovery Program: A Guide to Addiction Recovery and Healing [Polokalama o le Toe Faaleleia o Olaga mai le Tagofia o Mea ua Fai ma Vaisu: O Se Taiala mo le Toe Faaleleia o Olaga mai le Tagofia o Mea ua Fai ma Vaisu ma le Faamalologa]* (aitema nu. 36764) o loo maua i le tele o gagana i Faletusi Autu po o se PDF i le [www.recoveryworkbook.lds.org](http://www.recoveryworkbook.lds.org).

*O le CombatingPornography.org o se uepisaite e lagolagoina e le Ekalesia e maua mai ai se fesoasoani mo tagata taitoatasi o loo feagai ma ni mea ua fai ma vaisu. E mafai foi ona fesoasoani i o latou taitoalua, matua, ma taitai perisitua.*

*O le tamaitusi o le Teuteu Ou Manatu i le Mama e Le Aunoa* (aitema nu. 00460) ua mamanuina e fesoasoani ia i latou o loo tauivi ma ponokalafi. O loo talanoaina ai auala e iloa ai auala faasalalau faataumaoi, teteetee atu ma aloese mai faaososoga o ponokalafi, ma le lafoaia o vaisu o ponokalafi. O loo lisi mai ai foi mau ma isi punaoa a le Ekalesia e faatatau i le salamo, o le faapaiaina o le tino, ma le faatoilaloina o uunaiga a le lalolagi. E mafai e taitai o le Ekalesia ma tagata o le aiga ona faasoa atu lea tamaitusi i e pele ia i latou o loo tauivi ma ponokalafi. O loo maua lenei tamaitusi i Faletusi Autu i le tele o gagana. O loo maua foi i le Gagana e Fai i Faailoga faaAmerika i le DVD.

O loo lisiina nisi lauga ma tusiga e faatatau i lenei autu i le [www.liahona.lds.org](http://www.liahona.lds.org).

# O LE ALA MONI I LE Fiafia

*A o tatou tulimata'i atu i le ala moni o le fiafia i totonu o o tatou aiga ma galuega, ou te tatalo ina ia tatou faaaoga-in a lo tatou atamai ma uunaiga e aumaia ai le amiontu, filemu, malamalama, ma le saolotoga sili i tagata o le lalolagi atoa.*

**O**le fua mo le “olaga lelei” ua leva ona finauina i le tele o seneturi. A o i ai le Apostolo o Paulo i Atenai i le Mauga o Maresa, na fetaiai o ia ma le “au fiapopoto o le itu aiga o Epikuro, ma le itu aiga o Setoiko” (Galuega 17:18). Na talitonu le au Setoiko o le lelei aupito maualuga o le ola mama lea, ae na talitonu le au Epikuro o le lelei aupito maualuga o le tuinanau lea. E toatele le au Setoiko ua oo ina femitai ma ua faaaogaina le filosifia o se “alofaga mo . . . naunautaiga ma le amioleaga.” E toatele le au Epikuro ua tuuto atu i le tuinanau ma ua avea ma a latou mautauave le “Tatou aai ma inu, aua o a taeao tatou te oti ai.”<sup>1</sup>

O le toatele i le lalolagi faaleaoaoga ua leva ona naunau atu i le fautuaga a Aristotle o le “faautaga atamai” o se ata faataatia mo “le olaga lelei.” Na tautino e se tagata na tusi i le *New York Times Book Review* e faapea ua faia le faaiuga a le aufaitofa manino faaonapo nei, e leai se paleni sa’o e tasi o elemene e faavae ai ‘le olaga lelei mo le tagata.’<sup>2</sup>

Na tautino i se tusiga i le *New York Times* e faapea, “O le fiafia i le faaipoipoina e sili atu le taua na i lo se isi lava mea e maua ai le soifua manuia faaletagata lava ia.” Na lu’iina e le tusitala ia kolisi e faaititia le taimi e faaalu

i le “tapenaina o le au aooga mo matata” ae ia sili atu le taimi e “tapena ai i latou e faia faaiuga faaleagafesootai.”<sup>3</sup>

A o ou fatauina nei faamatalaga, sa ou toe tomanatu i mea sa aoaoina mai e Iosefa Samita: “O le fiafia o le faamoemoega ma le fuafuaga lea o lo tatou olaga nei; ma o le iuga foi lena, pe afai tatou te tulitulimata'i atu i le ala e tau atu i ai; ma o lena ala o le amioatua, faamaoni, faatuatua, paia, ma le tausia o poloaiga uma a le Atua.”<sup>4</sup>

E tusa ai ma le faamatalaga i le *New York Times* e uiga i le faaipoipoga ma le folafolaga mautinoa a le Perofeta, ou te talitonu e mafai ona tatou maua le fiafia lea tatou te manaomia ma o loo finagalo ai le Atua mo i tatou. O le a se mea tatou te faia e maua ai?

## **Ia Faafetai mo Lou Tofi**

Ia maua le lotofaafetai i taimi uma mo ou faamanuiaga, aemaise lava lou tofi. Pe a faamanuiaina i tatou i ni matua lelei, e tatau ona tatou lotofaafetai. O la tatou aitalafu lea i lo tatou tofi.

E i ai se alagaupu ua leva a Saina e faapea, “A e inuina le vai, aua nei gallo le vaieli na puna mai ai.” O loo manino lava i tusi-tusiga paia e tatau ona tatou ava i o tatou

**Saunia e Elder  
Quentin L. Cook**

O Le Korama a  
Aposetolo e Toasefululua



matua. Fai mai le faataoto, "Lou atalii e, ia e taus i poloaiga a lou tama; aua foi e te tuulafoaiina le upu e aoao atu a lou tina" (Faataoto 6:20). Na faaupuina e se faitofa manino taua o Siamani o Goethe faapea:

*O mea mai le tofi o o outou tama, e nonō,  
Toe faafou lou mauaina, ina ia e umia  
moni.<sup>15</sup>*

E manino lava le manaomia ona tatou faafetai i o tatou matua ma faia ni faatinoga lelei ia maua ai mea latou te faamoemoe e faaee

mai i o tatou luga. O se laasaga lenei e agai atu ai i le fiafia faaletagata lava ia.

### **Tautino atu Oe lava i le Aiga**

Lona lua, tautino atu oe lava i le mafutaga e faavavau a le aiga e avea ma faavae o le fiafia. I le lalolagi, ua filifili le toatele e le faaipoipo pe faatuai foi ona faaipoipo. O le aiga o se mafutaga faavavau ua faauuina e le Atua a'o le i faavaeina le lalolagi. O le toatele o tagata o le a faaipoipo ma faamanuiaina i ni fanau. E leai se faamanuiaga sili atu i lenei



*Ou te tautino atu ia  
te outou o le fiafia,  
alofa, ma le faama-  
lieina lea na maua  
i totonu o aiga fealo-  
fani, ma amiotonu  
na fua mai ai le  
fiafia sili e tatau ai  
e mafai ona tatou  
ausiaina.*



lalolagi nai lo le mauaina o se fanau. O nisi o fuitau sili ona faagaeetia loto i tuisusiga paia uma o loo ta'u a i le tulaga matagofie o le taua o fanau i le fuafuaga a le tatou Tama Faalelagi. O i latou moni lava "o le tofi mai le Alii" (Salamo 127:3).

Ina ua 20 ma ona tupu o'u tausaga, na tuuina mai e Peresitene Tavita O. MaKei (1873–1970) se savali faaperofeta e uiga i le faaipoipoga ma fanau. Sa 95 tausaga o lona soifua ma o le tausaga mulimuli foi lea o lona soifuaga. Na ia aoao mai o le alofa mama i le va o se alii ma se tamaitai "o se tasi lea o mea e aupito sili ona tamalii i luga o le fogaelele, ma o le fanauina ma le tauisia o fanau o le tiute aupito maualuga lea o tiute uma o le tagata soifua."<sup>6</sup>

Ona faasoa mai lea e Peresitene MaKei o lona popolega i le faateleina o le taliaina o teteaga. I le 1969 o Kalefonia le setete muamua lava i le Iunaite Setete na faatagaina le tulaga lea na taua o le "tetea e aunoa ma se amioga sese." A o le i oo i lena taimi, e

tatau ona i ai se mafuaaga e faamuta ai se faaipoipoga, e pei o le le faamaoni po o nisi tulaga matuia. Na manino lava le popole o Peresitene MaKei ona ua tulaga faaletonu le faavae o faaipoipoga. Na ia saunoa, "O le faateleina o le saoasaoa o faaipoipoga tatala i totonu o le Iunaite Setete i le asō o se tulaga lamatia taufaamatau lea i le tulaga maoae o lenei malo."<sup>7</sup>

A tatou toe tepa i tua i mea na aoao mai e Peresitene MaKei, e moni lava o se faaaliga. Na tusi faasolo e le pule faatonu o *Talafoou a le I.S. ma Lipoti i le Lalolagi* le talafaasolopito ma taunuuga na tutupu talu mai lena taimi. Na ia lipotia mai faapea "ua sili atu ma le faaluaina le saoasaoa o faaipoipoga ua tatala talu mai le vaitau o le 1960," ma o pepe e fananau mai i tina e le i faaipoipo ua "siitia atu mai le 5 pasene sa i ai i le 1960 i le 35 pasene i le taimi nei." Na ia faamatalaina le taunuuga ma le aafiaga lē lelei i tamaiti. Na ia faamanino mai e faapea "o le tulaga mautu o le aiga o loo i ai matua moni e toalua . . . ua

avea o se auala sili mo le faatonutonuina o le amio, mo le faafaleleina, mo le faamautuina o tulaga faataua-inia, ma mo le fuafuaina o le lumanai o se tamaitiiti.”<sup>8</sup>

Na faaiu le tusiga a le *New York Times* e faapea, “O tagata i lenei vaitaimi . . . ua tosina i popolega i oa faalelalolagi ma se fefe faaanamua i le tauleleia ma agafesootai” ma, o se taunuuga, ua i ai so latou “itu tauaso faaleagaga.”<sup>9</sup> Pe le o le mea ea lea na valoia e Peresitene MaKei?

Ou te faamautinoa atu ia te outou e anoanoai faaipoipoga a tagata faamaoni o le Ekalesia o loo fafia ma faamanuiaina. Mo i latou e le i

faaipoipo, e tatau ona outou agai i luma ma le faatuatua ma le mautinoa i le sini autu o le faaipoipoga ma le aiga. Ou te fautuaina outou ina ia saili se toalua amiontu o le a e faamemelo i ai ma o le a avea ma au uo mamae. Ou te tautino atu ia te outou o le fafia, alofa, ma le faamalieina lea e maua i totonu o aiga fealofani, ma amiontu e fua mai ai le fiafiaga sili e tatau ai, lea e mafai ona tatou ausiaina. O lena fafia o le faavae lea mo se sosaiete manuia. O i latou o e amiontu ma e le o mafai ona ausia lenei sini ua ia i latou le aia tatau mo faamanuiaga uma a lo tatou Tama Faalelagi mo Ana fanau.

### la Aofia ai i se Auala Lelei

Lona tolu, ia e aofia ai i le lalolagi i se auala lelei ma ia avea ma se uuniga malosi mo le lelei. O se luitau taua le taofimau lea i le tulafono faatusi paia ia ola i le lalolagi a e le ni õ le lalolagi (tagai i le Ioane 17). Na aoao mai Peresitene Iosefa Filitia Samita (1876–1972), a o avea ma se tasi o le Korama a Aposetolo e Toasefululua e faapea, e ui o loo tatou i ai i le lalolagi, “ae le o i tatou o ni õ le lalolagi i le uiga e tatau ona tatou faatinoina . . . aga masani leaga, . . . tifiga, . . . o mea faavalea, aoaoga faavae sese ma teori.”<sup>10</sup> E le gata i lea, o lou sao i le mea o loo e ola ai o se vaega lea o



lau lu'i ia avea o se faataitaiga, faasoatatu le talalelei, ma ola e tusa ai ma upumoni na aoaoina ai oe e matua ma perofeta.

Ina ia ausia lenei lu'i, o le a e manao ma e tatou ona e aofia ai i le lalolagi i se auala lelei. E tatou ona tofotofoina ma suesueina i tatou ma ia agavaa mo se malo e sili atu. E pei ona aoao mai e Peresitene Thomas S. Monson, "O filifiliga e iloa ai le taunuuga."<sup>11</sup>

E le o se olaga faigofie lenei; e le i fuafuaina ia faigofie. Ae ui i lea, ua tatou iloa o le a faatupuina e le Alii o tatou tofotofoga ina ia faamanuia ai i tatou mo lo tatou lelei. O le a Ia tuuina mai ia i tatou le malosi e tumau mausali ai e ui i faigata. O le amiontonu o lona lava lea taui, ma ua folafola mai ia i tatou e tusitusiga paia le taui o le amiontonu o le "filemu lea i lenei lalolagi, ma le olaga faavavau i le lalolagi a sau" (MFF 59:23). Ou te fautuaina outou ina ia aofia ai i le lalolagi i se auala lelei.

### Ola ma Faasoatatu Ou Tulaga Faatonuina

Lona fa, ola ma faasoatatu ou tulaga faatonuina ia i latou o loo outou fegalegaleai. O le a oo mai luitau i le toatele o outou a o outou sailia ni galuega. E manaomia ia e atamai. O la'u fautuaga o le faailoa atu lea i pule o falefaigaluega e mauluga ou tulaga faatonuina lelei ma talafeagai, e aofia ai se tautinoga i lou aiga.

Sa ou aoaoina le taura o lenei mea i le amataga o la'u galuega. Ina ua uma la'u aoga i le Aoga Faaloia i Stanford, sa ou tulimatai atu loa e faigaluega i se ofisa loia faapitoa. E le i i ai ni tagata o le Ekalesia na faipaaga ma lenei ofisa, ae o ona loia o ni tagata e

eseese uiga ma tomai. Ina ua uma ni faatalanoaga o le taeao, na ave a'u e le loia aupito sinia ma isi loia e toalua matou te fai 'aiga i le aoauli. Na fesili mai le loia sinia pe ou te fia manao e inu se pia a o le i faia le matou meaai ona inu ai lea o se uaina mulimuli ane. Sa ou teena vaega uma e lua. Ma i lona toe fai mai faalua, sa ou ta'u atu ai ia te ia o au o se tagata malosi o le Au Paia o Aso e Gata Ai ma e ou te le inu ava malosi.

Sa ofo mai se galuega mo a'u i le kamupani, ma i ni nai masina mulimuli ane na tau mai ai e le loia sili ia te au, o le ofoina atu o le meainu malosi sa avea o se suega. Na ia iloa i la'u pepa o faamatalaga o loo tau manino atu ai sa ou auauna atu i se misiona a le Au Paia o Aso e Gata Ai. Sa tonu ia te ia e na te faafaigaluegaina au pe afai ou te faamaoni i aoaoga a la'u lava lotu. Na ia manatu o se mataupu taura o le amio ma le faamaoni.

Sa ou iloa i tausaga sa ou i ai i San Francisco, Kaledonia, ISA, e mumusu nisi tagata o le ekalesia e iloa e a latou paaga o i latou o ni tagata o le Au Paia o Aso e Gata Ai. E masani lava, ona aafia i latou i ni tulaga fetuutuunai semanu e mafai ona aloese ai, pe ana latou ta'u sao atu mea na latou talitonu i ai.

### Ia Avea o se Malamalama

O le mea mulimuli, ia avea o se malamalama i tagata i le mea o loo e aumau ai. Ina ua avea i ma'ua ma lou toalua o se ulugalii fou faatoa amata i le Eria o San Francisco Bay i le ogatotonu o le 1960, sa matua toalaiti le aofai o tagata o le Au Paia o Aso e Gata Ai. E le gata i lea, sa avea le Eria o le Faga o San Francisco ma se

nofoaga faatosina mo fualaau faasaina ma isi tulaga faatautala uma ma le agasala. Sa fesili se peresitene popole o le siteki i lena taimi i le au taitai o le Ekalesia pe tatau i taitai o le Ekalesia ona fautuaina tagata o le Ekalesia e nonofo ai pea i le Eria o le Faga o San Francisco.

Sa tofia Peresitene Harold B. Lee (1899–1973), lea sa sui sinia o le Korama a Aposetolo e Toasefululu i lena vaitaimi, e tauimaina lea mataupu. Sa feiloai o ia ma se vaega o taitai perisitua ma sa tau atu ia i latou e le i musuia e le Alii le fausiaina o se malumalu i lo latou eria, ae o ese mai tagata o le ekalesia. O lana fautuaga ia:

1. Fausia Siona i o tatou loto ma aiga.
2. Ia avea o se malamalama ia i latou o loo tatou nonofo.
3. Taulai atu i sauniga ma mataupu faavae o loo aoaoina i le malumalu.

Afai tatou te mulimuli i fautuaga a Peresitene Lee i le aso, o le a mafai ona tatou ola manuia i le lalolagi a e le o ni ò le lalolagi.

I le aluga o o tatou olaga o le tatou feagai ma le tele o luitau faalelalolagi. O se tasi o nei luitau o le iloaina lea e le o malamalama [tagata] i le Ekalesia ma ona aoaoga, ma o nisi foi taimi e faauiga sese ai. I nai tausaga ua mavae na oo mai ai se valaau mai ia Elder M. Russell Ballard o le Korama a Aposetolo e Toasefululu, i tagata o le Ekalesia e tatala atu o latou finagalo ia lagona o latou leo mo le puipuiga o le faatuatuaga ma faasa'o ai ni faamatalaga sese. Na ia faama'oti mai e matua taura lava lo tatou faaaogaina o le "new media [ala fou o faasalalauga]," lea ua maua

mai e ala i le Initonet."<sup>12</sup> I se lalolagi ua tele ai fesootaiga eseese faatasi ma tagata o le ekalesia ua salalau i le lalolagi atoa, o loo manaomia ai le tali atu o tagata o le Au Paia o Aso e Gata Ai ma puipuia mai i faamatalaga le talafeagai ma le le sao pe a tupu, e uiga i le Eklesia. Tatou te faafetai mo mea ua tulai mai talu le tusiga a Elder Ballard, ma e ou te toe ta'ua lana lu'i.

Ou te mautinoa e mafai ona tatou maua le fiafia lea tatou te manaomia ma o loo finagalo ai foi le Atua mo i tatou. O lau tatalo ia tatou tulimatai atu i le ala moni o le fiafia i o tatou aiga ma galuega, o le a faaaogaina lo tatou malamalamama ma faatosinaga e toe aumai ai le amiontu sili, filemu, malamalamama, ma le saolotoga i tagata i le lalolagi atoa. ■

*Mai se saunoaga na tuuina atu i le Iunivesite a Polikaa laga-Hawaii i le aso 10 o Aperila, 2010. Mo le anotusi atoa i le gagana Peretania, asiasi i le <http://devotional.byuh.edu/node/416>.*

#### FAAMATALAGA

1. Frederic W. Farrar, *The Life and Work of St. Paul* (1902), 1:535–36.
2. Jim Holt, "A Word about the Wise," *New York Times Book Review*, 14 Mat., 2010, 12.
3. David Brooks, "The Sandra Bullock Trade," *New York Times*, 30 Mat., 2010, i. A23.
4. Iosefa Samita, i le *History of the Church*, 5:134–35.
5. Johann Wolfgang von Goethe, *Faust*, trans. Bayard Taylor (1912), 1:28.
6. Tavita O. MaKei, i le Conference Report, Ape. 1969, 9.
7. Tavita O. MaKei, Ape. 1969, 8.
8. Mortimer B. Zuckerman, "Family-Unfriendly Policies," *U.S. News and World Report*, 5 Oke., 2007, 72.
9. David Brooks, "The Sandra Bullock Trade," i. A23.
10. Iosefa Filitia Samita, i le Conference Report, Oke. 1916, 70.
11. Thomas S. Monson, "Valaaulia i le Faaeaga," *Liahona*, Set. 1993, 4.
12. M. Russell Ballard, "Faasoa Atu le Talalelei e Faaaoga ai le Initonet," *Liahona*, Iuni 2008, N1.



*Ia e aofia ai i le lalolagi i se au-ala lelei ma ia avea o se uunaiga malosi mo le lelei.*



# FOLAU SAOGALEMU I LE AIGA

Saunia e Richard M. Romney

Mekasini a le Ekalesia



O aso uma lava e folau ai le au faifaiva o Visakhapatnam, Initia i le sami. O le tele o aso e le galuā, e agalelei le sami, ma e toe foi mai vaa ua tutumu i ia. Peitai, o nisi foi taimi e sou ai le sami. E pouliugia le lagi, e maualuluga galu taufaamata'u, e olioli foi le au faifaiva pe a tau lava ina saogalemu mai i o latou uafu.

O aso uma foi e o ese atu ai le autalavou o le Au Paia o Aso e Gata Ai a Visakhapatnam i le lalolagi. O le tele o aso e agalelei ai le olaga ia i latou. Latou te maua le atamai, faia ni uo, ma toe foi i le aiga ua faatumulia i le fiafia o le olaga. Peitai, o nisi foi taimi e sou ai le lalolagi. E tu'itu'i mai le lotovaivai e pei o ni galu, e maualuluga ma taufaafefe faaososoga, e faapouliuligia foi e le masalosalo le lagi faaleagaga. O aso faapena, latou te olioli ai pe a latou toe foi saogalemu i o latou malutaga o le filemu, ma maluapapa ua latou faaigoaina o le aiga.

*E ui e ono sousou ogasami o le olaga i nisi o taimi, ae ua iloa e le tupulaga talavou o le Au Paia o Aso e Gata Ai i Visakhapatnam, Initia o le maluapapa o le aiga o se malutaga lea o le filemu.*

## Ata i luga o le Puipui

O le toalua o na talavou o le Au Paia o Aso e Gata Ai o, Naga Bushan Ratnam ma Pavani Kotala Ratnam, e nonofo faatasi ma o la matua i se tamai fale mautotogi e mamao ese mai le taulaga ae latalata i le falefaigaluega a lo la tama. E mafai ona e iloa i ata i totonu o le fale mea la te faamuamuaina. E faatumulia i ata o le aiga ia le fatatusi lea e lata i le faitotoa i luma, ma i totonu o le mea lea e momoe ai, o loo i ai ata o le Faaola, o le malumalu, ma le Au Peresitene Sili o loo teuteu ai puipui.

"A ou ala, o ata na e muamua lava ou vaai i ai," o le tala lea a Pavani. "A ou alu ou te moe i le po, o mea mulimuli foi na ou te vaai i ai."

E talitonu Pavani e mafai e i tatou uma lava ona fausia se malutaga o le filemu i totonu o o tatou aiga. "O le mea lena ou te tausia ai ia mama mea uma," o lana tala lea. "O se tasi na o auala e faigofie ai ona i ai le Agaga iiinei." Ma i le aoga, "E i ai lava i totonu o la'u atotusi le *Mo le Malosi o le Autalavou*, ma soo se taimi lava e aumai ai i fafo sa'u tusi, ou te vaai lava i ai."

Ua iloa e Naga o le talatalanoa ma lona tuafafine e aumaia ai ia te ia le toofilemu. "E moni matou te talanoa ma o maua matua ma saili la laua fautuaga i le tele o mea," o lana tala lea. "O lo ma tama o le peresitene o le itu, o lea matou te talanoa ai ma ia i taimi uma i se tulaga aloaia pe le aloaia foi. Ma te fiafia foi e talatalanoa ma lo ma tina. Ae





i ai se mea faapitoa e uiga i le fefaasoai o i maua ma lou tuafafine." Pe a ita ia Naga, o Pavani e faatoofilemuina o ia. O Naga e tau le tautala, o lea e fesoasoani ai Pavani ia faamasani solo o ia.

"Ae o le tele lava o taimi, e faamalosiau e le tasi le isi i le tausiga o tulaga faatonuina," o le tala lea a Naga. Mo se faataitaiga, e fesili Pavani ia Naga mo se fautuaga mo ofu talafeagai. "Afai e manatu o ia e le ogatasi ma tulaga faatonuina a le Eklesia, ou te le ofuina," o lana tala lea. E tele lava ina la talanoa i le tuuina atu o ni auaunaga i le Eklesia faapea foi i le nuu. O se vaega o na talanoaga e mafua ona o se miti a Naga ia avea ma se fomai o le fatu i se aso. "Ou te manao ia faaaoga la'u matata o se isi auala e tuuina atu ai se auaunaga," o lana tala lea.

Na faamatala e le tupulaga talavou a le au Ratnam, o le i ai o le perisitua i totonu o lo latou aiga ua faateleina ai foi le soifua manuia o lo latou aiga. Latou te toe talanoa ai i le auala na taitai atu ai i latou uma e lo latou tamā i le

*O le Eklesia ma le aiga ua maua ai e le aiga o Ratnam ni uafu saogalemu (itulau na muamua atu) ma mo (faasolo agai i luma i le agavale) o Sujith, Sandeep, ma Hepsiba Batha; Pavani ma Naga Ratnam; o le aiga o Butty; ma isi talavou mai Visakhapatnam, lea e i ai paranesi e tolu.*

Ekalesia i le valu tausaga ua mavae, tusa lava pe na manaomia lo latou malaga—o i latou uma e toafa—i le 40 kilomita (25 maila) i itu taitasi i se pasika e tasi ia tau lava ina latou oo ai i sauniga lotu. Latou te talanoa e uiga i tatalo o le faatuatua mo Pavani ina ua ma'i o ia i le aso na papatiso ai le Tama, e uiga i le faamanuiaga faaperisitua na tuuina atu e Tama ina ua ma'i tigaina Naga i le taimi o ana suega i le aoga, ma le auala e masani ona fautuaina ai i la'ua e Tama ma Tina, ma i le taimi e tatalo atu ai i le Tama Faalelagi pe a faia ni faaiuga tetele.

"Ua ou vaai i ni suiga lelei a o tuputupu ae lo matou aiga i totonu o le talalelei," o le tala lea a Pavani. "O faataitaiga a o'u matua ma lo'u tuagane sa taialaina ai au o le uii o le aiga. Ou te iloa na fesoasoani mai Iesu Keriso ia te au i vaega uma o lo'u olaga. O loo siomia au e tagata e fesoasoani ma alo-lofa ia te au, ma e alofa le Faaola ia te au. E sili atu le taua o lena alofa ia te au nai lo se isi lava mea."

Na faamaonia lea ituiga alofa ina ua malaga lo matou aiga i le Malumalu o Hong Kong Saina e faamauina ai. Fai mai Naga, o le malumalu o le maluapapa sili lea ona saogalemu i luga o le fogaeleele: "O se nofoaga e paia. E na o le mafaufau lava i ai e aumaia ai le paia i totonu o lo matou aiga." Ma o le mea lena ua avea ai le fale o mauto-togi ai le au Ratnams o se nofoaga fiafia e nofo ai.

### Saogalemu o Tusitusiga Paia

Fai mai Hepsiba, Sandeep, ma Sujith Batha, o e nonofo ma o latou matua i le taulaga o Visak (e ta'u e tagata o le nuu o le taulaga), o tusitusiga paia o se taula lea i lo latou uafu o le filemu. "O le faitauina o tusitusiga paia, matou te valaaulia ai le Agaga e taialaina i matou i le ala sao, ma faia ni faaiuga lelei i o matou olaga," o le tala lea a Hepsiba. "Matou te valaaulia foi le Agaga i totonu o lo matou aiga pe faia a matou afiafi faaleaiga ma tatalo faaleaiga."

E moni, fai mai Sandeep, e faamanatu atu e lona tina ia i latou "ina ia tatalo i aso uma pe a o ese atu ma toe foi mai. A fai mai o ia, 'Faamolemole ia maua le agaga

faafetai,’ ou te manao lava e faafetai mo mea uma.”

Fai mai Sujith e le gata i lo latou fale, ae o le isi nofoga o le filemu o sauniga lotu ia a la latou paranesi, lea e mafai ona aoao faatasi ai e tagata o le ekalesia le talalelei ma e talia soo se tasi e tapuai ai, ma i gaoioiga lea e mafai ai e le autalavou o e tutusa o latou tulaga faatonuina ona fefaamalosiauai ma faamautinoa e le tasi le isi. “Na fetalai mai le Alii o i tatou o le malamalama o le lalolagi,” fai mai ai Sujith (tagai i le Mataio 5:14). “A tatou potopoto faatasi, tatou te faamumuina malosi lena malamalama ma lagona le mafanafana e fefaasoaa’i ai.”

### Fiafia Ua I Ai i le Aiga

O le ituaiga faasoa lea na aumai ai le talalelei i le aiga o Butty. Na tau le mafai ona taofi le ataata o Sister Sandhya ma Sudha Butty ma o la’ua matua—sa matua naunau lava i latou e ta’u mai le auala na faailoa atu ai le Ekalesia ia i latou.

“Na matou liliu mai i le Ekalesia o se aiga,” o le tala lea a Sandhya. “Sa matou sailia le lotu moni mo se taimi umi.

Na matou iloa e manaomia ona papatisoina i matou. Ona vaai lea o lo matou tama i ni faifeautalai se toalua. Fai mai le igoa o a la’ua pine, ‘O Le Ekalesia a Iesu Keriso,’ ma sa ia iloa e tatau ona ia talanoa atu ia i laua.”

Na amata lesona ma le famaoni. “Na matou aoao faapea, ina ia faia le finagalo o le Tama, na puapuagatia Iesu Keriso mo i tatou, faataunuina le Togiola, ma faia ina ia mafai ona tatou toe foi i le Tama Faalelagi e ala i le mulimuli atu ia te Ia,” o le tala lea a Sudha. O le mautu ai o lena molimau, o lo latou auai atu i le Ekalesia na pei o le folau atu i le aiga e ala atu i ogasami malu, ma sa olioli le aiga o Butty i la latou faaiuga talu mai lena taimi.

O aso uma lava e folau ese atu ai vaa fagota mai Visakhapatnam. O aso uma foi e o ese atu ai le autalavou o Paranesi a Visakhapatnam Muamua, ma le Lua ma le Paranesi a Gajuwaka i le lalolagi. E mafai uma lava e i latou ona toe foi mai ma le saogalemu i se uafu ua masani ai. Peitai mo tagata o le Au Paia o Aso e Gata Ai, o se uafu e le mo na o le saogalemu i le taimi nei ae e malupuipua mo le faavavau. ■

### FOLAU I LE VAA A SE UO

**U**a tele mea ua aoaoina e Pavani Kotala Ratnam e uiga i faauoga e ala i lona ola ai i mataupu faavae o le talalelei. “Ina ua matou auai i le Ekalesia, sa ulagia au i lau vasega i le aoga ona e le mafai ona ou kopi. Ou te le pepelo lava. Pe a fesiligia au e faia se mea lelei, e mautinoa lava ou te faia. Ma e ou te talanoa faaaloalo i tagata uma. E lelei au uo i le lotu, ae o au ‘uo’ i le aoga e le fiafia i ou tulaga faatonuina. Fai mai e leaga lo’u ulu ma talitaliē mai ia te au i luma o tagata.

“Sa ou talanoa i lo’u tama ma lo’u tina e uiga i ni ituaiga uo e tatau ona i ai,” sa ia faaaauau pea. “O le talanoa atu ia i laua o se tasi o faaiuga sili na ou faia. Sa la fesoasoani mai ina ia lelei ou lagona mo au lava, ia filifili ni uo o e siitaina au i luga, ma ia ou taumafai e faaauo atu i tagata uma.

“E lei leva ae ua ou talanoa i tagata uma—o le alii lapoa, o le tamaititi aoga sili ona lelei—sa ou talanoa i tagata uma. Sa ou taumafai e faia se faataitaiga lelei. I le taimi muamua e lei maua ni au uo na faamalosiau mai ia te au, ma sa faigata lava ia te au. Ae na faamalosiau mai o’u faiaoga. Na i ai ni nai taimi na latou fesili mai ai, ‘O le a se mea ua ese ai oe?’

“Sa fai mai soo i si tamaiti aoga, ‘Aisea e faapena ai lau

amio?’ ma le ‘Aisea e te talanoa ai i le la tama ae le lavea i lau vaega tou te fegalegaleai?’”

Ae na iu lava ina uma na galu o feteenaiga. “Sa ou iloa sa ese a’u i se tulaga lelei ma e tatau ona avea au ma ou lava ituaiga tagata ma faia le mea sao. Sa ia te au le naunautai,” o lana tala lea.

Ua iloa nei e isi tamaiti aoga ia Pavani o se tamaitai talavou agalelei ma e lelei ana faatosinaga i lana aoga.



## E FIA VAAI PERESITENE MONSON IA TE OE

**E**tusa ma le 15 tausaga ua mavae na ou maua ai i le ma'i tete. E fausaga mulimuli ane ae faaititia lo'u malosi, ma sa ou faaaogaina se nofoa faataavalevale. Sa ou matua le fiafia lava i lo'u tulaga ona o lo'u olaga atoa, sa ou matua malosi lava.

O se mea o le vaitaimi lena, sa ou alu i se konafesi na faia i Dundee, Sikotilani, lea na i ai Peresitene Thomas S. Monson, a o avea o se fesoasoani i le Au Peresitene Sili. Ina ua maea le sauniga, na sau se tagata o le au paia ia te au.

“Uso Sharkey?”

“Ia?”

“Sau i luma e vaai ia Peresitene Monson.”

E lei i ai sou faamoemoe e fai lena mea, ae na toe foi mai lea alii i ni nai minute.

“Uso Sharkey,” o lana tala lea, “o loo faatali Peresitene Monson e vaai ia te oe.”

“Ae na te le silafia au,” o lau tala lea.

“E tusa lava, a e o loo faatali mai mo oe. Na faafogaga o ia i lou gasegase.”

Na ou malie ma alu atu loa e vaai

Peresitene Monson. Na ia faafeiloai au ma le alofa ma fesili mai pe ou te manao i se faamanuiaga faaleperisitua. Sa ou ioe atu i ai.

Sa maua se potu, ma na fesili mai Peresitene Monson po o ai ou te manao e faauuina au. Sa ou talosaga atu pe mafai ona saili mai lo'u epikopo. Ina ua aluese atu se tasi e saili mai o

ia, sa toe faamanatu atu e se tasi o le au malaga a Peresitene Monson ia te ia, afai o le a latou le vave o, o le a latou le maua le taimi i le malaevaalele o Edinburgh.

Sa soisoi Peresitene Monson matali atu faapea, a o ia faatatau ia te ia lava ma a'u, “A e aulia o matou tau-saga, o le a e iloa mea e faamuamua. Tatou te maua lava le taimi.”

Ina ua taunu mai lou epikopo, sa la faamanuiaina ma Peresitene Monson ia au. O le faamanuiaga na tuuina mai e Peresitene Monson e le o se faamanuiaga o le toe malosi mai; ae sa faatatau i le gafataulimaina o lo'u tulaga ma faaletonu o le a oo mai. O se faamanuiaga foi mo lo'u aiga ina ia mafai ona latou fesoasoani mai ia te au e tatalia lo'u ma'i.

Ua atoa nei le sefulu tausaga talu ai, o loo ou maua lava i le ma'i tetete, ae i le 74 o ou tausaga o loo ou manuia lava. Ua ou maua moni ni auala e taulima ai lo'u ma'i. E lelei o'u lagona, ma e ou te lei toe faaaogaina se nofoa faataavalevale talu mai le aso na ou maua ai le faamanuiaga. E faaigoa a'u e lo'u fomai o lana “tagata ma'i sili.”

Ou te faafetai pea ia Peresitene Monson mo lona agalelei i le talanoa mai ma le faamanuiaina o se tagata na te lei silafia. Ae ou te faafetai pea mo mea na ia aoaoina ai au e uiga i le faaaogaina o le perisitua.

E eseese ki ma tofi tatou te umia i le Ekalesia, ae o le perisitua lava e tasi tatou te umia. O le galuega agalelei a Peresitene Monson na aoaoina ai a'u e faapea, o le perisitua e le o le tagata e umia ae o le auala tatou te faaaoga ai e faamanuiaina ai olaga o fanau a le Tama Faalelagi. ■

George Sharkey, Sikotilani

*Na faafeiloai au ma le agalelei e Peresitene Monson ma fesili mai pe ou te manao i se faamanuiaga faaleperisitua.*



# FAAMANUIA E ALA I LE PERISITUA

**S**a ou auai i le Ekalesia o se tina nofofua i le 1996, i nai tausaga mulimuli ane talu ona auai lo'u uso masaga o Theresa. Ina ua papatiso Theresa, sa fai mai sa'u uo, "Aisea o le a manao ai o ia e auai i lena lotu? Latou te tuuina o latou fafine i le pito i tua."

Mai i au fegalegaleiga ma tagata o le Ekalesia, sa ou iloa ai e le sa'o le malamalama o la'u uo—o ulugalii sa ou vaai i ai i tagata o le Ekalesia o nisi e sili ona malolosi ma tulaga tutusa ua ou vaai i ai. Sa ou iloa e na o alii i le Ekalesia e umiaina le perisitua, ae na ou lagona latou te faaaogaina le perisitua ina ia manuia ai tagata uma.

Sa faamautinoa mai lena upumoni ia te au ina ua ou maua i le kanesa o le susu ina ua mavae tausaga e 11 o lo'u papatisoga. Ina ua ou faalogo i le tala, sa ou maua se uunaiga faaleagaga e tatau ona ou sailia se faamanuiafaaleperisitua, lea na ou faia i lena afiafi. I le faamanuiaga, sa folafola mai ai o le a aluese le kanesa mai lo'u tino, ma o le a toe malosi atoa lo'u tino, ma o le a taialaina a'u fomai e le Agaga.

O le faamanuiaga muamua lena o le tele o le a ou mauaina i le isi tolu tausaga o togaftiga ma taotoga. Na ou maua ai le faatuatua e iloa ai o le a oo mai le malosi faletino pe afai o le finagalo lea o le Alii po o le oo mai foi i le faaleagaga—ma o le a ou maua le malosi e taulima ai o'u fotofogga.

Sa ou oo i le ituaiga lona lua o



*Ina ua ou faalogo i le tala ua ou maua i le kanesa o le susu, sa ou maua se uunaiga faaleagaga e tatau ona ou sailia se faamanuiafaaleperisitua.*

faamalologa i se tasi o po ina ua mavae se taotoga. Ou te manatu lo'u ala a'e i se tiga ogaoga lava. Ona oo mai lea o le manatu lenei i lo'u mafaufau: "Ua e iloa o le a e malosi. Sa folafola atu ia te oe o le a toe malosi atoa lou tino. Ua e iloa o le tulaga lea e te oo i ai."

O se tasi taimi na ou ala a'e i le tuneva o le po ma sa ou popole i le lumanai. "O le a le mea o le a tupu ia te au?" Na ou mafaufau ai. Na umi se taimi na ou gatete ai, a e na o le pau

lena o le taimi i le tolu tausaga o la'u tauiviga na ou popole ai faapena. O le filemu mai faamanuiaga faaleperisitua na ou maua, na lagolagoina ai au ma mafai ai ona ou oo i mea sa ou manatu e le mafai ona ou onosaia.

Na faaauau pea ona faamalosiauina au e le perisitua i se fula ma se fiva matautia ina ua mae'a lo'u taotoga. Sa sau so'u tuagane faaletulafono i se tasi po i le falemai, ma fai so'u faamanuia. Na maualuga lo'u fiva i le aso atoa, ae ina ua uma le faamanuiaga na tea malie atu ai lava. Sa ou maofa ae ou te le'i te'i ai.

Sa ou vaai i le faataunuina o le folafolaga o le a taialaina o'u fomai. Ina ua ou ala ina ua maea se tasi o o'u taotoga, sa sau le fomai tipitipi e vaai au.

"Sa uma lelei," o lana faamalalama mai lea, "peitai na i ai se mea na ta'u maia ia te au e saili tele i le totonu, ma sa ou maua ai nisi o vaega na ai le faafitali, lea na mafai ona ou aveesea mai. Ua laki ona ua maua uma."

E le o ia o se tagata o le Ekalesia, peitai ua faataunuina le folafolaga na ou muai maua. Na taialaina o ia e le Agaga.

Ou te faafetai mo i latou ua agavaa e umia le perisitua i la'u uarota ma lo'u aiga o e na aapa mai ia te au ma faaaogaina le perisitua e faamanuia ai lo'u olaga. Ou te faafetai mo o latou faletua o e o loo fesoasoani ma lagolagoina i latou a o faamamaluina o latou perisitua ma faaaogaina e faamanuia ai isi. O le mea aupito sili, ou te faafetai ua faamanuiaina i tatou e le Tama Faalelagi i Lona mana i le lalolagi, o se mana ua faamanuiaina ai Ana fanau uma lava. ■

Virginia Gillis, Massachusetts, ISA

# TAMA, OU TE MANAOOMIA OE

**S**a ou fetosoia paipa e faaalu ai le vai i se vaega o la matou faatoaga i Kalefonia i matu, ISA. O lena aso faapitoa o se faamanuiaga ona sa i ai lo'u Tama e fesoasoani ia te au. Ina ua uma le ma galuega, sa ma feosofi i a ma taavale (ATV) ma agai atu i le fale ma mafaufau i le taumafataga o le afiafi. Sa ta'i e Tama le ala.

E tuaoi le isi itu o la matou faatoaga ma le Vaitafe o le Pit. Sa ui a ma taavale i autafa o le faatoaga ina nei papaioa le vaofali i pa'u tetele o a ma taavale. O le itu taumatau o le faatoaga, a o le vaitafe, sa i lalo ifo o se faupuega eleele, i lo ma itu tauagavale. Sa le mafai ona ma iloa lelei atu ona o le puaoa.

Sa fai sina saoasaoa o le alu o a ma taavale ma sa ou se'e ese ai mai le ala ma so'a se pupulaau i le pa'u i tua o le itu taumatau. O lea tulaga na ou seu faamalosia ai le ATV i le tauagavale agai i le vaitafe ma lalo i le faupuega eleele. Sa ou taumafai e taofi le taavale, ae na tifato le auvai ma sa saoasaoa tele la'u alu. Sa ou manatu o le a ou tofu tonu lava i le vaitafe. O le mea na laki ai, sa i ai se laau i le auvai o le vaitafe i lo'u ala. O le isi mea na ou iloa, na ou tilotilo ifo i lalo i le taavale—mai le laau! Sa ou matuai fefe lava.

Sa ou faapea na toeitiiti lava a ou oti, peitai ou te lei lavea, sa na o ni nai maosiosia ma ni unooa. Ina ua ou maua sina to'a ma tau manavanava, sa ou iloa ai e le mafai ona ou toe au-maia na o a'u i luga le taavale mai le auvai. Sa ou saga manatu pea ia faliu

mai le ulu o lo'u tama i luga a'e o le faupuega eleele, e tauautilo mai a'u, ae leai. Sa atili ai ona ou faanoanoa.

Sa ou tau tolotolo atu i luga o le auvai, ae sa ou le iloa atu lo'u tama. Sa ou tatalo lemu atu i lou Tama oi le Lagi, ma aioi atu ia te Ia e auina mai Tama ia te au. Ona amata lea ona ou savali.

O le taimi lea, ua toeitiiti taunu Tama i le fale ae manatu loa sa ia faalogoina lo'u valaau atu ia te ia. Na tilotilo mai o ia i tua mo le taimi muamua lava talu ona ma tuua le faatoaga. Ona ia iloa ai lea ou te le o mulimuli atu i ona tua. Sa ia iloa e i ai se mea o tupu ona toe sau ai lea e su'e au seja oo ina maua.

Sa faamatala mulimuli ane e Tama ia te au na faalogo o ou fai atu, "Tama, ou te manaomia oe!" O le taimi lena, ua silia ma le lua maila (3 km) lona mamaao. Sa ou iloa ai, sa faafogaina e se Tama Faalelagi alofa la'u tatalo ma ta'u atu ai i lo'u tama sa ou manaomia lana fesoasoani.

Ou te faafetai mo le Agaga Paia ma musumusuga o le upumoni ma le taitaiga lea tatou te maua mai ia te Ia. Ou te faafetai foi mo se tamā alofa na ola i se tulaga na mafai ai e le Agaga Paia ona talanoa atu ia te ia ma ia lagonaina. ■

Michael K. Hewett, Iuta, ISA

*Sa ou tatalo lemu i lou Tama oi le Lagi, ma aioi atu ia te Ia ina ia auina mai Tama e aveatu au.*



# E TE MANAO I SE FAAMANUIAGA?

Se tasi taeao a o ou savali agai atu i se mauga i le itu i saute o le lotoa o le Iunivesite o Polika Iaga sa ou faalogoina ai se patatu i ou tua. Sa ou faliu ma vaaia ai se alii talavou o loo taatia e u i lalo ona foliga i luga o le auala savali, sa taatia mamao ese lana uila ua matuai malepe. Sa ou tu ma le te'i seja oo ina taumafai o ia e tuu i luga ma le vaivai lona ulu. Ona ou faatopetope atu lea ia te ia, faatasi ai ma isi tagata e toafa o e na savavali i luga o le mauga.

O le tamaitiiti aoga na mu'a'i oo atu i le alii na lavea na ia fuliina ma le faaeteete i luga, ma iloa ai ni lavea tuga i ona laugutu, isu, auvae, ma luga ae o ona mata. Sa valaau atu se isi tamaitiiti aoga mo se fesoasoani i lana telefoni feaveai. Sa ofo mai e se tina talavou lea sa tutu i ou autafa se fasi ieie, ma na to'o ai e le tamaitiiti aoga lea na muamua taunu atu ia le laugutu ua tafetotoi o le alii na lavea. Sa ma tutu ma se isi tamaitai, ma faatalitali ma le popole mo le au laveai a le falemai.

Sa pulapula mai mata o le alii na lavea, ma tilotilo mai ma le le maotonu i foliga sa siomia o ia.

"O fea o ou i ai?" na ia fai mai ai. "O le a le mea na tupu?"

Na tali atu le tamaitiiti aoga lea na tuuina le fasi ieie i ona laugutu, "O lea e te i le itu i saute o le lotoa. Sa lavea lau uila."

Na öi mai le alii. "E tiga," o lana tala lea. "Fesoasoani mai ia te au."

Sa fai atu le tamaitiiti aoga o loo agai mai le fesoasoani ma na ia fesili atu po o ai lona igoa.



*Na öi le taulealea na lavea ma tau genogeno agai i lana taga. Na aapa atu le tamaitiiti aoga lea na i ona autafa i totonu o le taga ma aumai se tautau ki tele o loo pipii ai se fagu laitiiti o le suauu paia.*

"O Tavita," na ia fai mai ai, a o masusu lemu. "O fea o ou i ai?" o lana toe fesili mai lea.

Na oo mai se alii e faamatua tagata sa ofu sona suti—e foliga o se polofesa—ma fesili atu ia Tavita pe manao i se faamanuiaga. Sa lue mai lona ulu ma le agaga faafetai.

Sa tu le polofesa. "Ae e leai sa'u suauu," o lana tala lea, ma tilotilo solo. Na lulu ulu o i latou na lata ane. Na öi le taulealea na lavea ma tau genogeno agai i lana taga. Na aapa atu le tamaitiiti aoga lea na i ona autafa i totonu o le taga ma aumai se tautau ki tele o loo pipii ai se fagu laitiiti o le suauu paia.

"E i ai lana suauu!" na fai mai ai le tamaitiiti aoga.

Na to'a le alii na lavea i le taimi lava na tuu atu ai e le polofesa ma

tama a'oga o latou lima i luga o lona ulu ma tuu atu ai se faamanuiaga. Sa oo mai foi ia te au se lagona toafilemu ina ua folafola atu e le polofesa i le taulealea o le a toe malosi o ia, maua le filemu, ma latalata atili atu ai i le Faaola e ala i lenei aafiaga.

E lei leva ae oo mai le au laveai a le falemai ma aveese atu le alii na lavea. A o ou savali atu i le vasega, sa ou iloa na te tauaveina le suauu paia ma ia ina ia mafai ona ia faaaogaina le perisitua e faamanuia ai se tasi e manaomia. Peitai, i lenei aso, o ia lava ua faamanuiaina. Sa ou aluese mai ma se lagona loloto o le alofa mo alii faamaoni o e ola saunia ina ia faamanuiaina isi ma mo le Alii, o lē faamanuiaina foi i latou. ■

Lia McClanahan, Iuta, ISA

# OLE MANA O Aoaoga

**Saunia e Suzy Taggy**  
**Coelho Caldas Nelsen**

**S**a ola ae lo'u tina e aunoa ma lona iloa o se mea i le tuula-foaia, fiaai, ma le mativa. E le i tele sana aoaoga na maua, ae na ia iloa le taua o le aoga ma lona mana e suia ai olaga. I le su'iina faatasi o ni fasi pepa e faia ai sa'u api mo le aoga, e tasi lava se mea na faamanino mai e lou tina: o le aoga e mafai ona fesoasoani ou te sola ese ai mai se olaga o le mativa.

## Amataga Faatauvaa

Sa ou fanau i Pasila i matu ma na sili atu ma le tolu masina na vave ai ona ou fanau mai. O le tolusefulu tausaga ua tuanai, sa toetoe ina leai se avanoa e ola ai se pepe e vave ona fanau mai, i totoru o se falemai faitele e tumu i mogamoga. Sa ta'u atu e fomai i lo'u tina o le a ou oti i ni nai itula. Ou te lei oti. Sa fesoasoani mai le Alii ia ou ola.

Pe tusa o le lima o ou tausaga, na tuua ai e lo'u tama lo'u tina, o o'u tei e toafa, ma a'u. Sa turulafoaia foi lo'u tina e ona matua a o laitiiti lava o ia, ma o lea sa leai sona aiga e liliu atu i ai mo se fesoasoani. E lei lava se matou tupe e totogi ai se

*Na fai mai lou tina ia ou galue malosi i le a'oga aua o le mea lea e tasi e mafai ai ona foia le mativa.*

fale, ma o lea na matou nofo lisi ai i se fasi eleele. Sa fausia lo matou pale i ni fasi laau, pepa, ma se palasitika faatasi ai ma se taualuga e faia i laulaau mamago. E leai ni a matou meaafale e ese mai i se taupega, lea e tele ina faaaoga faatasi e ni tagata se toalua pe toatolu foi, ma lo matou moega, sa matou fauina mai ni pusa pepa ua faamafolafola. E leai se paipa, leai se eletise. Sa leai ni a matou meatotino.

Sa faigaluega lo'u tina o se tausifale ma faia tagamea a tagata. Sa ma o i le vaitafe, ma fesoasoani atu ia te ia i le mea sili ou te mafai; ona ma savavali lea mo le tele o itula e tiliva lavalava. O lea taimi sa ma galulue faatasi ai, o se mea e pele ia te au. O iina sa ou fausia ai se sootaga ma lo'u tina.

E ui lava sa ma galulue malosi, ae na foliga lava e le lava le tupe. O nisi taimi e tau le lava ai sa matou meaai. E aumai e lou tina lana meaai mo i matou ma o nisi taimi e le ai ai lava mo le tele o aso. Matou te inuina ni vai ona o lea e momoe aua ua pau lena o se mea na mafai ona matou faia e foia ai le fiaai.

E te iloa faasoa se fuamoia se tasi mo ni tagata se toaono? Ou te iloa.

Sa i ai ni au uo a o ou laitiiti, ae ina ua matou matutua, sa eseese auala na matou uia. Sa liliu atu teineiti e faatau o latou tino ina ia maua ai ni tupe, a o tama e gaoi. Ina ua latou valaaulia au matou te faatasi, sa ou lagona se mea na ta'uina mai ia te au e le sa'o. Sa ou iloa na silafia au e le Alii i lena lava taimi, a o lei avea au ma se tagata o le Ekalesia, ma sa faaauau pea ona ou vaaia ia faamaoniga o Lona aao i lo'u olaga.

## Musu e Tuu le A'oga

Ua leva ona matou i ai ma nai ou tei i le lisi faatalitali mo a'oga a le malo. Ina ua oo mai lo matou avanoa e lesitala ai, sa tau mai e lo'u tina ni mea lelei e uiga i le aoga. Fai mai o



ia, afai ou te faamaoni i le aoga, o le a avea a'u ma se tagata faamanuiaina i se aso. O le a le galu lava ia te au ana upu: "Ou te faamalie atu ua le mafai ona ou tuuina atu se olaga lelei mo oe. Ou te faamalie atu ua e aoaoina i se auala faigata le taua o le galue a o e laitiiti, ae o lea ua e maua le avanoa e a'oga ai. Po o le a lava le mea e tupu, aua lava nei e musu e aoga aua na pau lena o le auala e aveesea ai oe mai lenei olaga."

O le taimi lava na ou i ai i le aoga, e tatau ona matou sogasoga i le auala e maua ai ni a matou meaaoga. Ou te sueina ni fasi pepa e i ai ni avanoa, i totonu o kalone lapisi ma aumai i le pale. Sa su'i faatasi e lo'u tina e faia ai se api. Na te faatauina mai se penitala ma vae tolu ina ia tofu i matou ma ou uso e toalua ma se vaega e tusi ai i le aoga. E lei oo ina aoaoga nai isi ou tei e toalua.

### O Se Faatuatuaga Fou

Ona sa pagatia tele lo'u tina i lona olaga atoa, o lea na te lei talitonu ai e i ai se Atua. I lo'u laitiiti, ou te lei talitonu foi. Ae ina ua amata ona ou

*Sa auina atu au e  
lo'u tina i le aoga  
ma se api na su'iina  
i le pale ma le tasi  
vaetolu o se penitala.*

matua, na amata ona ou faia ni fesili e uiga i le Atua. Sa ou fesili pe aisea e le i maua ai e lo'u aiga se avanoa e maua ai se olaga lelei ma pe aisea ou te lei maua ai ni meataalo, lava ni meaai, po o ni ofu fou. O taimi uma lava ou te faia ai nei fesili, ou te lagona lava i lo'u loto e le o tuua na o au. Na faamafanafanaina au e lenei lagona mo le tele o tausaga.

Pe tusa o le 13 o ou tausaga, na mai ai faifeautalai o le Au Paia o Aso e Gata Ai i lo matou pale. Na la taliina au fesili uma lava ma aoaoina au e uiga ia Iesu Keriso. Sa la tau mai ia te au e i ai se ekalesia e mafai ona ou aoao atili ai e uiga i le talalelei i vasega faapitoa mo tagata o la'u tupulaga. Na aoaoina au i le auala e tatalo ai. Sa la tau mai ia te au le Tusi a Mamona. Ina ua ou papatiso, e leai se tasi o lo'u aiga na sau.

Sa ou lagona le tuulafoaiina, ae na ou iloa sa ou faia le mea sao. Sa faailoa mai ia te au se olaga fou—o se olaga o le faamoemoe, fiafia, faatuatua, ma le alofa. Sa ou iloa, na saili e a'u taaga ni toomaga i fualau faasaina ma le ola le mama. A o au sa ou mauaina i se Tama Faalelagi alofa ma le talalelei a Lona Alo. Ina ua uma ona ou papatiso sa ou iloaina sa silafia au e le Alii i lo'u olaga atoa.

Ua ou aoaoina ni mea se tele e uiga i le talalelei. Sa ou feiloai atu i tagata na tutusa o matou talitonuga. Sa iloa e nisi o le ekalesia sina mea e uiga i lo'u olaga ina ua latou asia au i lo'u aiga. Na latou fesoasoani mai ma le agalelei e faatau ni lavalava ma ni seevae mo le lotu ma ni api aoga mo le aoga. Sa masani ona ou tausitama mo tagata o le Ekalesia ma maua ai ni tupe se tele ou te lei mauaina



## IA MAUA POLOKALAMA FAALEAOAOGA

"E finagalo le Alii ia outou aoaoina o outou mafaufau ma lima, i soo se matata ua filifilia. Pe o le lipeaina o pusa aisa, po o se galuega a se fomai tipitipi atamai, e tatau lava ona outou aoaoina outou lava. . . . O le a outou aumaia le mamalu i le Ekalesia, ma o le a faamanuiaina tele outou ona o na aoaoga."

Gordon B. Hinckley, "O Le Fautuaga ma le Tatalo a se Perofeta mo le Autala-vou," *Liahona*, Ape. 2001, 34.

*Ina ua talia a'u  
i le polokalama  
faatausima'i, sa  
ou iloa o le a  
faigata, ae na  
ou iloa foi o le  
a faatasi mai le  
Alii ia te a'u.*

## INISITUTI

**E**tusa lava po o fea na e aoga ai, ae e mafai ona outou potopoto faatasi ma isi talavou nofofua i se tasi o inisitutu o aoaoga faale-lotu lea e silia ma le 500 i le salafa o le lalolagi. Ina ia maua se nofoaga e lata ane ia te oe, faafesootai lou taitai perisitua i le lotoifale po o le asiasi i le www.lds.org/institutes.



lava muamua. Ona o lo'u laitiiti tele, atonu na faigofie lava ona ou aluese mai le talalelei. Peitai, o le lagolago mai o tagata o le Ekalesia, o lea sa ou tumau mausali ai i lo'u faatuatuaga fou ua maua.

Na sua moni lava lo'u olaga e le talalelei. Ina ua uma ona ou papatiso, sa ou lagona ua sili atu lo'u malosi e aoao ai i le aoga. Sa ou aoao le tele o mea ma sa avea au ma se faiaoga. Afai ou te le iloa se mataupu, ou te aoaoina seia ou matua iloaina lelei ina ia *mafai* ona

moni lava lea mea ma auala e sua ai lo'u olaga e faavavau. Sa ou iloa na silafia au e lo'u Tama Faalelagi ma na i ai se fuafuaga faapitoa mo au. O lenei avanoa e faalautele ai la'u aoga sa avea lea ma se tali i au tatalo.

Sa ou iloa o le a avea ma se lui-tau le aoaoina o se gagana lona lua, ae sa ou iloa foi e mafai pe afai ou te matua galue malosi. Sa ou aoga i le Nofoaga Autu o le Gagana Peretania a le Iunivesite a Polika Iaga ma faaalu le sili atu ma le 10 itula o le aso i totonusi o le potutusi. Sa fautua mai se tasi o o'u faiaoga ma te tatalo mo le meaalofa o gagana, ma o po uma lava ou te tatalo ai ma aioi atu i le Tama Faalelagi mo lenei meaalofa. Na ia fesoasoani moni mai lava ia te au.

Ina ua maea au aoga i le Nofoaga Autu o le Gagana Peretania, sa talia-inu au i le tele o iunivesite. Sa ou filifili e auai i le Iunivesite o Polika Iaga-Idaho ma talosaga mo le polokalama faatausimai. Sa ou faalogo e matuai faigata lava ona e mauaina le polokalama, aemaise lava ia tamaiti aoga mai isi atunu. Ma o lea sa ou suesue ai ma le malosi. Sa ula mai au uo ia te au, ma fai mai e tatau ona ou masi'i atu i le potutusi ona o le tele o le taimi ou te faaaluina iina. E tusa lava pe a tapuni, ou te alu i le fale ma faaauau ai pea au suesuega.

Pe a oo mai taimi faigata, ou te manatua ai upu a Peresitene Gordon B. Hinckley (1910–2008): "E te manaomia aoaoga uma e mafai ona e maua. Ia ositaulagaina le fia maua o se taavale; ia ositaulagaina sose mea lava e tatau ona ositaulaga ai ina ia faaagavaaina ai outou e faia galuega i le lalolagi."<sup>1</sup> Sa ou iloaina o upu na a se perofeta a le

ou aoaoina atu. Sa ou faaaogaina le tupe e fesoasoani ai i le fale.

Sa maua lo'u faamanuiaiga faape-teriaka ma na fautuaina au e auauna atu i se misiona aua na faapolopolo e le Alii se faamanuiaiga faapitoa mo la'u misiona lea o le a suaia ai lo'u olaga e faavavau. Ou te lei iloa le uiga o lea mea, ae na ou iloa o le a ou malamalamama i ai i se taimi e tatau ai pe a ou usitai.

## O Avanoa Fou

Sa ou faamisiona i le Misiona a Pasila Curitiba mai le 2000 i le 2002. E ala i le ma mafutaga ma se soa faapi-toa, sa mafai ai ona ou alu i le Iunaite Setete e aoga ai. Sa ou iloa o le a avea

*"Ia ositaulagaina soo se mea e tatau ona ositaulagaina ina ia faaagavaaina ai outou e faia galuega a le lalolagi." Sa ou iloaina o upu na a se perofeta a le Atua, ma sa ou matua talitonu i ai.*

Atua, ma sa ou matua talitonu i ai.

Ina ua talia au i le polokalama faatausimai, sa faatumulia lo'u loto i le agaga faafetai ma le fiafia. Sa ou iloa o le a faigata ma o le a ou faaauau pea ona faia ni osigataulaga, ae sa ou iloa o le a faatasi mai le Alii ia te au.

A o ou i ai i le aoga, sa ou feiloai i lo'u toalua, ma na ma faaipoipo i le 2007. Na auai foi lo'u tina i le Ekalesia i le tausaga lena. Sa ia fai mai e na te le iloaina pe aisea sa ou matua fiafia ai, e ui lava i le tele o mea faigata na tutupu ia i matou. Ae ina ua ia auai i le Ekalesia, sa malamalamo o ia. Ua faamanuiaina lo'u aiga e le talalelei a Iesu Keriso, ma ua ou fiafia e vaai atu i lo'u tina ua faamanuiaina ina ua mavae le tele o ana osigataulaga na faia. O le a tumau pea lo'u lotofaafetai mo ia.

I le amataga o le 2010, sa ou sauniuni ai mo le faauuga—ma sa ou maitaga i le ma tama muamua. E lua masina a e ou te lei faauu mai le polokalama faatausimai, sa i ai ni faafitauli i lo'u maitaga, ma sa fai le taotoga e fanau mai ai le ma pepe. Sa fai mai ou faiaoga e malolo mai le aoga mo sina taimi se'i faauu i se taimi mulimuli ane. Ae ua matua

lata lava—e toe lua masina!

O lea na ma faatulagaina ai ma le faaeteete ma lo'u toalua o ma taimi ina ia mafai ona faapalenina mea e tatau ona faamuamua ia mafai ai ona fauma la'u aoga. Sa ou faatulagaina o'u taimi e suesue ai ina ia maua ai e lo'u toalua ma lona atalii le taimi la te manaomia. O nisi taimi e nonofo ai matua o lo'u toalua ma le ma tama a o fai la'u vasega. E toalua nisi o la'u vasega na fesoasoani tele ia te au i le toe iloiloaina o ni meaaoga a le vasega. Sa ou lagona e pei sa auina mai e le Alii nei tagata uma ina ia lagolago mai ia te au i lenei taimi faigata.

### O Se Olaga Sili Atu

Ina ua uma le faauuga sa pasi la'u suega o le tusipasi a le setete ma amata ai loa ona ou faigaluega o se tausimai e fesoasoani e tausi lo'u aiga ao fauma le aoga a lo'u toalua. E ui ou te le o fuafua e faigaluega pe a amata le matata a lo'u toalua, a e pe a oo mai se mala po o se tulaga faigata tautupe e tatau ai ona ou faigaluega i le lumana, e fesoasoani la'u a'oga e saunia a'u e faia.

Na sao lava tina: o aoga e i ai moni lava le mana e suia ai olaga. Ua suia ai lo'u olaga, ma o le a sui ai foi olaga o la'u fanau. Ou te faamoemoe o le a latou iloa na faamanuiaina au ona o lo'u mulimuli i le fuafuaga a le Alii mo au. Na finagalo o Ia ina ia ou a'oga, ma sa fesoasoani mai o Ia i laasaga uma o le ala. Ou te faamoemoe ia aoao e la'u fanau le auala e galulue ai e pei ona ou faia ma ia latou faatauaina aoga e pei ona ou faia. ■

### FAAMATALAGA

- Gordon B. Hinckley, "O Le Fautuaga ma le Tatalo a se Perofeta mo le Autalavou," *Liahona*, Apr. 2001, 34.

### FAAAGAGA MO AOGA

Le Tupe Faaagaga mo Aoga (TFA) na faavaeina i le 2001 e fesoasoani ai i tagata o le Ekalesia ia maua aoaoga ma polokalama faaleaoaoga latou te manaomia e ola faalagolago ai le tagata ia te ia lava. E maua e tagata o le Ekalesia o e agavaa mo le polokalama se nonogatupe e fesoasoani ai i le totogiina o a latou aoga. Latou te toe totogiina le nonogatupe pe a maua se galuega. Ina ia agavaa mo se nonogatupe i le TFA, e i ai mea e tatau ona faia e le o loo talosagaina e aofia ai ma mea nei:

- la agavaa, ma o se tagata malosi i Le Ekalesia a lesu Keriso o le Au Paia o Aso e Gata Ai. O alii nofoua o loo talosaga e i le va o le 19 ma le 26 tausaga e tatau ona maea misiona po o le i ai o se faatagaga na le alu ai.
- la faamaonia mai e taitai perisitua.
- la lesitala i le inisitituti o aoaoga faalelotu, sei vagana ua faaipoipo pe ova atu ma le 30 tausaga le matua.
- E nofo, faigaluega, ma auai atu i se aoga e i ai i se atunuua ua faamaonia ai le-TFA. O loo avanoa ia nonogatupe TFA mo tagata o le ekalesia i le silia ma le 40 atunu.
- E naunau e totogi le tele o mea o le aoga pe a mafai i ana lava tipe, faauu ma ia maua se galuega sili atu, ma ia totogi atoa le nonogatupe.

Afai o loo e manao e talosaga mo se nonogatupe e ala i le TFA, faafe-sootai lou taitai perisitua i le lotoi-fale. Aoao atili e uiga i le polokalama e ala i le asiasi i le pef.lds.org.

## “Pe faapefea ona ou iloa pe afai o ou luitau ua fuafuaina e fesoasoani ia avea au ma se tagata e sili atu po o se auala a le Tama Faalelagi e lapatai ai au o loo sese le auala o loo ou agai i ai?”

**E** mafai ona fesoasoani tofotofoga e avea ai oe ma se tagata sili atu—tusa lava po o le a le mafuaaga—pe afai e te faaaogaina e tuputupu ae ai faaleagaga.

O le a ta'u atu e lou mafaufau pe afai o loo sese le auala o loo e agai i ai. Afai e le lelei ou lagona i se mea na e faia, tatalo i le Tama Faalelagi ma aioi atu mo Lana faamagaloga. Taumafai e foia soo se faafitauli na e faia. E mafai foi ona e saili se fautuaga mai ou matua ma taitai perisitua. O nei laasaga o le a fesoasoani ia lelei atili ai ou lagona ma toe tuuina oe i le auala sao.

E mafai foi ona fesoasoani ia tofotofoga e le o ni taunuuga o se agasala e avea ai oe ma se tagata sili atu. O nei ituaiga tofotofoga e mafai ona suesue ai lou faatuatua po o le onosai po o le mafai ai foi ona e aoao e uiga ia te oe lava. Ina ia faaaoga nei tofotofoga mo lou tuputupu ae, fesili ia te oe lava ia po o a ni mea e mafai ona e aoao mai ai ae po o a foi ni mea e mafai ona e faia ia sili atu.

E mafai ona faamalosia lou faatuatua i taimi o tofotofoga pe afai e te aioi atu mo le fesoasoani a le Tama Faalelagi. E pei ona faia e le Faaola ina ua puapuagatia o Ia, e mafai ona e tatalo “atili” (tagai i le Luka 22:44). E mafai ona aveesea e le Tama Faalelagi le tofotofoga, pe mafai foi ona Ia faamalosia oe e tauaveina (tagai i le Mosaea 24:14–15).

### E Mafai ona Fesoasoani ia Uo ma Aiga



O se tasi o auala e lapataia ai au e le Tama Faalelagi pe a sese le auala ou te agai i ai o Lona musuia lea o uo po o tagata o le aiga e faasoa mai a latou molimau po o se aafiaga patino ia te au. Afai ou te lagona le faanoanoa po o se manao ina ia suia a o latou faasoa mai o latou lagona, ou te iloa ai e manaomia ona ou salamo ma faia ni suiga i lou olaga.

Luis S., 17 tausaga, Florida, ISA

### Saili Lou Loto

Saili lou loto ina ia iloa ai po o le mea o loo e faia o le mea moni lava lea o loo finagalo i ai le Tama oi le Lagi e te faia. O loo i ai i o tatou olaga le Agaga Paia e aoaoina i tatou i le lelei mai le leaga. Afai e te

sailia le Atua ma aioi atu, o le a faaalia ia te oe e le Agaga Paia le mea e tatau ona e faia. E tusa lava po o le tofotofoga o le aoao atu po o le lapataiina, e tutusa lava le faamoemoega: e fesoasoani ia te oe e tuputupu ae ma ia atoatoa ia Keriso pe a e tali atu ma le faatuatua ma faalagolago i le Alii.

Emily B., 18 tausaga, Kalefonia, ISA

### O Le a Faamafanafanaina Oe e le Alii



Na fuafuaina e le Tama Faalelagi ia tofotofoga uma ia avea ma aafiaga faamalosiau ma ia mama-nuina ai oe e avea ma se tagata sili atu. Ua i ai uma lava i le ala e te taulimaina ai. Ou te iloa o nisi tofotofoga e foliga mai e faigata tele ona tatou gafatia, ae o le a faamanuiaina ai i tatou pe a tatou faatuatua. Ou te taumafai lava ia manatua le fetalaga a le Alii ia i tatou: “Ou te le tuua outou o matuaoti: ou te sau ia te outou” (Ioane 14:18). O lenei malamalama o le a mafai ona e faatoilaloina ai soo se tofotofoga e te lua fetaia'i, ma o le a e malosi atili ai. Afai e te lagona ua lapataia oe e le Tama Faalelagi ona ua sese le auala ua e agai ai, ia faatuatua ma faalogo i uunaiga a le Agaga ina ia mafai ai ona e pipiimau pea i le ai uamea. E alofa o Ia ia te oe ma finagalo pea o Ia ina ia e avea ma se tasi e sili atu a o Ia fesoasoani ia te oe i le olaga.

Olivia B., 18 tausaga, Minnesota, ISA

### Mafaufau i Ai

Ou te iloa o le auala sili lava e iloa ai le faamoemoega o le tofotofoga o le anapogi lea ma tatalo i ai ma le faamaoni. Taumafai foi e

mafaufau i ai. Afai e te faatoilaloina le tofotofoga, mata o le a avea oe o se tagata sili atu pe o le a e tumau ai pea e le sua? Afai e te mafaufau o le faatoilaloina o se tofotofoga o le a sili ai ona e lelei ma fiafia, o lona uiga o lena e te i ai i le ala sa'o.

*Ammon K., 16 tausaga, Iuta, ISA*

### Tumau i le Ala Sa'o



E tatau ona faitau a tatou tusitusiga paia i aso uma, ma afai o loo tatou faia nei mea ma o loo ogatasi ma le Agaga Paia, o le a faaalia mai e le Atua ia i tatou po o a ni filifiliga e tatau pe le tatau foi ona tatou faia. Afai e te mafaufau o le auala o loo e agai i ai e le o se auala o le a filifili e le Tama oi le Lagi mo oe, ia toe foi i tua. Ia tumau pe a le ala sao ma le vaapiapi.

*Elizabeth P., 15 tausaga, Pennsylvania, ISA*

### Tatalo ina ia Aoao mai i Tofotofoga



E tuuina mai pea e lo tatou Tama Faalelagi ia tofotofoga i o tatou olaga, ma e faamalolosia ai i tatou i Lana talalelei ma lo tatou faatuatu. Afai o i ai i se ala leaga, o le taunuuga na o filifiliga leaga na tatou faia. Ia tatalo e le aunoa ina ia faamalosia oe e le Atua ma fesoasoani ina ia e iloaina mea e lelei mai lena tofotofoga. E i ai sau molimau mautu, o tofotofoga o loo tuuina e le Tama Faalelagi i o tatou ala e aoao ai i tatou, faateleina a tatou molimau, fesoasoani ia tatou aoao e aua nei toe pauu, pe fesoasoani ai foi i isi e ala i o tatou aafiaga.

*Ruddy R., 17 tausaga, Guayas, Ekuatoa*

### E Mafai e Tofotofoga ona Lapatai Mai

Ou te manatu o tofotofoga uma lava ua fuafuaina ina ia tatou malolosi atili ai, e tusa lava pe o nisi taimi e le foliga mai i ai. Ina ua 14 o'u tau-saga, sa ou ma'i ma e valu masina na ou le toe alu ai i le aoga ae sa ou suesue i le pale. Sa fesoasoani lenei luitau e avea ai au ma se tagata sili ona lelei, ma sili atu ona malosi. Na fesoasoani ou te lagona ai le agaga faafetai mo mea na ou maua. O nisi taimi e mafai e tofotofoga ona tatou toe iloilo ai le mea o tatou agai i ai i le olaga, o lea e mafai ona avea o se logo fagufagu lelei.

*Jennifer P., 17 tausaga, Motu i Matu, Niu Sila*

### Ia Onosai

Afai e feagai ma faigata ona o le le usitaia o se poloaiga, atonu la o se lapataiga. Ae afai e le mafai ona taofia, atonu la o loo i ai iina e fesoasoani i lou tuputupu ae. Ou te tatalo ma fesili atu i le Tama Faalelagi pe i ai se mea e tatau ona e sua pe e te aoao mai ai i lenei aafiaga, ma afai e i ai, fesili atu ia

te Ia e ta'u atu po o le a. Tatalo mo le malosi ma le toafilemu. Ma ia onosai; atonu o loo sau le tali.

*Michaela P., 17 tausaga, Idaho, ISA*



### INA IA AVEA ATILI FAAPEI O LE FAAOLA

"O lo tatou Tama Faalelagi, o le e alofa atoatoa ma le faamalosia ia i tatou, na te faatagaina i tatou e oo i ni aafiaga e mafai ai ona tatou atiina ae ni o tatou uiga ma amioga tatou te manaomia, ina ia avea atili ai e faapei o Keriso. E tele ituaiga mea e oo mai ai o tatou tofotofoga, peitai o le a taitasi ma faatagaina ai i tatou e avea atili e faapei o le Faaola pe a tatou aoao e iloa le lelei e maua mai i aafiaga taitasi. Pe a tatou malamalamia i lenei aoaoga faavae o le a tatou maua se faamautinoaga tele o le alofa o lo tatou Tama. Atonu tatou te le iloa lava i lenei olaga pe aisea tatou te feagai ai ma mea tatou te faia, ae e mafai ona tatou lagona le mautinoa e mafai ona tatou tuputupu ae mai mea tatou te oo i ai."

*Elder James B. Martino o le Fitugafulu, "E Galulue Faatasi Mea Uma mo le Lelei," Liahona, Me 2010, 101.*

### O LE ISI FESILI

**"E lofituina lava au pe a ou mafaufau i mea uma e tatau ona ou faia e ola ai i le talalelei. O fea ou te amata ai?"**

Auina mai lau tali a o lei oo i le aso 15 lulai, 2011, i le:

*Liahona, Questions & Answers 7/11  
50 E. North Temple St., Rm. 2420  
Salt Lake City, UT 84150-0024, USA  
Po o le i-meli: [liahona@ldschurch.org](mailto:liahona@ldschurch.org)*

E ono faapupuuina tali mo le uumi po o le manino.

O le faamatalaga ma le faatagaga o loo i lalo e tatau ona aofia mai i lau i-meli po o le tusi: (1) igoa atoa, (2) aso fanau, (3) uarota po o le paranesi, (4) siteki po o le itu, (5) lau faatagaga tusitusia, ma, afai e itiiti ifo i le 18 ou tausaga, o le faatagaga tusitusia a ou matua (e talia foi le i-meli) e lolomiina ai lau tali ma lou ata.

*O le ola ai i le talalelei e  
le gata ina e malosi ai ae  
faapena foi isi.*

**O** u te matua faamemelo lava ma faaaloalo i alii talavou o e faamamaluina le Perisitua Arona. Sei ou faamatala atu se toatolu o i latou e o mai le Siteki o Nairobi Kenya i Aferika.

#### **Ua Malosi ai Matini**

I le 14 o ona tausaga, sa alu ese atu ai Matini o se tasi o le Paranesi a Westlands mai lona aiga i Nairobi, ma auai atu i se aoga nofotumau lea e na o ia lava le tagata o le Ekalesia. I le aoga la a Matini, o nisi aso o le vайaso, e na o le ti lava ma le falaoa e ofoina atu mo le 'aiga o le taeao. E le i lava ni tupe a le pulega o le aoga e tuuina atu ai se meaai faapitoa mo se toatasi, ona e 700 tamaiti aoga, o lea sa filifili ai Matini e inu le vai e 'ai ai le falaoa.

Na te auai atu faatasi ma isi tamaiti aoga i le lotu i Aso Sa. O iina na ia

**Matini**



# E Taua Au



# FAATAITAIGA

faalogo ai i ni aoaoga faalelotu na ia iloaina e le manino i nisi taimi. E tele ina pupula vave ese nisi o tamaiti aoga mai ia te ia pe a latou talanoa e uiga i se talitonuga "ese". O nisi taimi, e valaau ai o ia e nisi, o se tagata e tapuai i le tiapolo.

O nei luitau ua faamalosia ai ia Matini nai lo le faavaivaia. Na matua faamalosiauina lava o ia e ala i asiasiga faalemasina a ona matua ma savali o loo tuuina mai pea e le aunoa e lona peresitene o le paranesi, lea e masani lava ona auina atu le lomiga lata mai o le *New Era*. O lona faitauina na fesoasoani lea e faateleina ai lona lototoa e feagai ai ma nei luitau.

## E Le Misia lava e Iosefa

E umia e Iosefa o le Uarota a Riruta le tofi o le aoao i le Perisitua Arona. E tumau lona faamaoni i le talalelei e ui e na o ia lava le tagata o le Ekalesia i se aoga tele lea e toatele ana tupulaga e tagofia fualaa faasaina ma isi mea leaga. E masani lava ona ia vave taunu, ma e mama o ia ma e saunia lava e auauna atu pe a tofi e le peresitene o le korama ma le epikopo. E fesoasoani o ia i le tapenaina o le faamanatuga lea e toeitiiti lava o Aso Sa uma.

## E Lafoina e Humphrey Ana Meaaoga Faatonuina

O Humphrey mai le Uarota a Upper Hill o se aoao foi. Na papatisoina o ia i le Ekalesia i le na o le lua tausaga ua mavae atu. E pei foi o Matini, o Humphrey o loo aoga nei i se aoga nofotumau. O se vaega o le mafuaaga ua faatupulaia ai lona faatuatua talu mai le taimi na ia liliu mai ai i le Ekalesia ona e maua ana meaaoga uma o le seminare i le

meli, galue ai, ma toe lafo vave atu i le meli i lona faiaoga o le seminare.

Pe a tapuni le aoga nofo tumau, e masani lava ona savali Humphrey mo le 45 minute i le itu e tasi i Aso Sa ina ia maua sana taavale e alu ai i le lotu. E ui lava i lea, e tele lava ina vave ona ia taunu i le lotu ma saunia e auauna atu e pei ona tofia ai.

Soo se taimi lava e na te maua ai sona tofiga e lauga, e filiga lava Humphrey i ana sauniuniga. E manino lava ia i latou uma o e faalogo i ai na tele se taumafaiga na ia tuuina i ai i le sauniaina o lana lauga.

## Ola ai i Tulaga Faatonuina

O loo faaauau pea ona mou atu tulaga faatonuina o le ola mama, i le tele o vaega o le lalolagi i le taimi nei. O le tele o taimi e sailia ai e le tupulaga talavou ina ia fesootai atu i se mea lelei ma le faamamaluina ae latou te le iloa le mea e maua ai. O faleaoga mo aoaoga ua aumaia ai ni manatu sese faapea o tulaga

## Iosefa



**Saunia e Elder Joseph W. Sitati**  
O Le Fitugafulu



**Humphrey**

faatonuina o le amiolelei ua faauiga-  
ina faaletagata ma e fesuisuia'i.

Ae o lou ola ai i tulaga faatonuina  
o lou faatuatuaga, e mafai ai ona e  
fesoasoani atu i lau tupulaga ina ia  
molimauna le tulaga mausali, mau-  
tinoa, toofilemu, ma le fiafia lea e oo  
mai ona o le talalelei. E mafai ona  
fesoasoani au faataitaiga e saunia ai  
isi ina ia talia aoaoga o le talalelei  
toefuataiina. E mafai ona fesoasoani  
le polokalama o le Tiute i le Atua mo  
alii talavou ma le Alualu i Luma o le  
Tagata Lava Ia mo tamaitai talavou e  
te latalata atili ai i le Atua ma faatu-  
tuaina ai oe e tagata matutua ma le  
tupulaga.

### O Le Faataitaiga Autu

Pe o oe o se alii talavou po o se  
tamaitai talavou, e te faamamaluina  
le perisitua pe a e ola i se olaga lea  
e faailoa atu ai i lau tupulaga ma isi  
o loo siomiaina oe, o loo e mulimuli  
tonu i le Faaola. O loo aumaia se  
faataitaiga matagofie mo oe i le soi-  
fuaga o le Faaola a o avea o se alii  
talavou. I le na o le 12 o Ona tausaga,  
sa naunautai lava o Ia i le galuega a  
Lona Tama Faalelagi, e pei foi ona  
Ia faamamaluina Ona matua faalela-  
lolagi. Fai mai tusitusiga paia na Ia  
aoaoina isi i totonu o le malumalu.  
Na Ia faaofoina tagata matutua, tagata  
atamamai i Lona lava malamalama i  
aoaoga faavae (tagai i le Luka 2:42–  
52). Na faailoa mai e le Faaola o le

12 o tausaga e le laitiiti tele e amata  
ai ona malamalama i mea loloto o le  
talalelei pe a tatou agavaa ia mafuta le  
Agaga ma i tatou.

O loo tuuina mai i tusitusiga paia le  
tele o nisi tagata e avea ma faataitaiga  
a le autalavou o e na lototoa i lo latou  
faatuatuaga: Iosefa, atalii o Iakopo;  
Tanielu; Nifae; ma isi. E le gata i lea, e  
mafai ona tatou vaavaai atu i perofeta  
ma aposetolo o aso e gata ai mo ni  
faataitaiga i o tatou taimi.

O le toefuataiga o le Perisitua  
Arona o se faamautinoaga lea o le  
faatuatuaina o alii ma tamaitai talavou  
a le Ekalesia e le Tama Faalelagi. E Na te faamoemoe mai ia te  
outou alii talavou ina ia faaaogaina  
le perisitua e faamanuia ai Lana  
fanau iti ma e matutua. E te faia  
lena mea e ala i le aoaoina atu o le  
talalelei, papatisoina, taulimaina o  
le faamanatuga, fesoasoani atu i e  
mamai ma e vaivai, asiasi atu i aiga  
ma faamalolosia auaiga, ma auauna  
atu e pei ona tofia ai e lou epikopo  
po o le peresitene o le paranesi.  
O loo lagonaina e tagata le alofa o  
le Tama Faalelagi mo i latou, e ala  
i auaunaga o loo e faatinoina i le  
Perisitua Arona. I lea lava foi auala,  
ua mafai ai e tamaitai talavou ona  
mulimuli i faataitaiga a le Faaola e  
ala i le ola agavaa e o i le malumalu,  
auauna atu i isi o loo siomia ai, tau-  
sia i latou e i ai manaoga, ma atiina  
ae o outou malosiaga ma taleni.

Ua ou vaai i alii talavou i le tele o  
iunite o le Ekalesia, o loo faatinoina  
ma le faaaloalo ma le faamamaluina  
o latou tiute faaleperisitua. Ua ou vaai  
foi i tamaitai talavou o loo auauna atu  
ma o latou loto ma agaga atoa. O nei  
ituaiga auaunaga ma le tulaga o loo  
faatinoina ai e malosi atili ai lou faa-  
tuatua i le Atua le Tama ma Lona Alo  
o Iesu Keriso. E mafai ai foi ona fausia  
le faatuatua o i latou o loo e auauna  
atu i ai. ■

### UA FAATUATUAINA IA JULIET

**T**amaitai talavou, ia outou faia se  
faataitaiga i le ala lava lea o loo  
faatino ai e alii talavou: e ala i le ola ai i le  
talalelei. A o e galue i le polokalama o le  
Alualu i Luma o le Tagata Lava Ia, o le a e  
aoaoina mataupu faavae o le a feso-  
soani ia te oe e te iloa ai o oe o se afafine




o le Atua ma mea o loo faamoemoe mai  
ai le Tama Faalelagi ia te oe.

O Juliet o se tasi lea o faataitaiga. O se  
tagata o le Paranesi a Westlands, ma na  
papatisoina Juliet i totonu o le Ekalesia o  
se tamaitiiti ua i ai pepa faamaumau. E  
ui i tulaga faigata, e aofia ai le tausia-  
ina mai e se tina nofo toatasi e leai se  
galuega tumau, ae na maualuga ni tulaga  
faatauaina na ia Juliet lea na faagaeetia  
ai le pulega a le aoga ma na tofia ai o ia e  
avea ma teine taiulu o lana aoga. Sa avea  
moni lava o ia ma tamaitiiti aoga sili ona  
faatuatuaina i le aoga.

Na aoaoina e Juliet e na te auai i le  
faamamaluina o le perisitua e ala i le ola  
ai i tulaga faatonuina a le ekalesia. Na  
faaalia i ana faataitaiga, o alii talavou  
ma tamaitai talavou o e faamamaluina le  
perisitua e mafai ona alofagia e le Atua  
ma tagata uma.

# Mataupu Faavae ma Feagaiga 121:41–43

*Na aoao atu e Iosefa Samita le ala a le Alii i le faatinoina o le pule o le perisitua.*



## Tauanau

*Tauanau*—uunaia o isi ina ia talitonu pe faia se mea e ala i se taumafaiga e faamalamalama pe aioi atu ia i latou.



### Faapalepale

*Faapalepale*—  
onosai.

“E pei ona onosai le Alii ia i tatou, ia tatou onosai foi ia i latou o loo tatou tau-tuaina. Ia malamalama o i latou, e pei foi o i tatou, e le atoatoa. O i latou, e pei foi o i tatou, e i ai taimi e sasi ai. O i latou, e pei foi o i tatou, e mananao i isi ia mafaufau i isi tagata i se tulaga lelei.

“Aua lava nei e fiu i se tagata. Ma e aofia ai ma lou le fiu ia te oe lava.”

Peresitene Dieter F. Uchtdorf, Fesoasoani Lona Lua i le Au Peresitene Sili, “Faauau i le Onosai,” *Liahona*, Me 2010, 58.

### Agalelei ma le Agamalu

O nisi nei o mea na aoao mai e tutsusiga paia e uiga i le agalelei ma le agamalu:

- O loo aofia i fua o le Agaga (tagai i le Kalatia 5:22–23).
- O le agalelei o le faatusa lea o au-auna a le Alii (tagai i le 1 Tesalonica 2:7; 2 Timoteo 2:24).
- O e agamalu e fai mo latou tofi

**41 E le tatau ona faatumauina se mana po o se uunaiina e le pule o le perisitua, tau lava i le tauanau atu, i le faapalepale, le agalelei, ma le agamalu, ma le alofa faamaoni;**

**42 I le agalelei, ma le malamalama mama, e matua faalau-teleina ai le agaga e aunoa ma le pepelo, e aunoa ma le faa’ole’ole—**

**43 I le aoai faamalosi atu i aso e tatau ai, pe a uunaiina e le Agaga Paia; a e faaali atu mulimuli le alofa faateleina i le ua e aoaiina, ina nei fai oe e ia mona fili.**

le nuu (tagai i le Salamo 37:11; Mataio 5:5).

- O le agamalu o se faailoga lea o le faatuatua ia Keriso (tagai i le Moronae 7:39).
- O le agamalu e oo mai ai le asiasiga a le Agaga Paia (tagai i le Moronae 8:26).

### Alofa Faamaoni

*Alofa Faamaoni*—e moni; e le pepelo pe faafoliga.

Pe na faaali atu e se tasi ia te oe le alofa moni talu ai nei? Pe faapefea ona e faaali atu lena ituaiga alofa i isi? Tusi e uiga i ai i lau api o talaaga.

### E aunoa ma le Pepelo ma e aunoa ma le Faa’ole’ole

*Pepelo*—o le faafoliga ia avea ma se tasi a e le o ia.

*Faa’ole’ole*—le faamaoni; faitogafiti.

### Aoai Faamalosi Atu i Aso e Tatau Ai

*Aoai*—otegia po o le faasao filemu; faaalia le le fiafia.

*Aso e Tatau Ai*—faavave; vave; a e le i tuai.

*Faamalosi*—manino.



### Pe A Uunaiina e le Agaga Paia

“O se aoaiga musuia ma le alofa, e mafai ona avea o se valaaulia ia lotogatasi. O le tuuina atu [o se aoaigal] pe a uunaia ai e le Agaga Paia, o le a oo atu ai i le feesesesei.”

Peresitene Henry B. Eyring, Fesoasoani Muamua i le Au Peresitene Sili, “Ia Tasi,” *Liahona*, Sete. 2008, 6.

*Faamatatalaga a le faatonu: O lenei itulau e le o se faamalamalama aitoa o mau na filifilia, ae ua na o se amataga mo au lava suesuega.*

# OLE VIAPALIA



ATA NA PUENIA E JOHN TELFORD

O le mea na tupu iinei na suia ai le lalagi. la faataga e sui ai lou olaga.

# FAAILOGA OLE AGAGA

Saunia e Pedro Ovalles

**O**le galue ai i se misiona i le Ripapelika Tominika, e lei leva ona ou siitia atu i se eria fou lea e lauiloa i le faigata ona maua o ni tagata e aoao. Ina ua ou tau-nuu atu, sa na o le toatas lava le ma tagata sailili. O lona igoa o Oriviades. Sa auai muamua o ia i le lotu, ae ona e logonoa ma e fesoottai i le gagana e fai i faailoga, o lea na le mafai ai e faifeautalai na i ai muamua ona aoao-inia o ia.

I se tasi aso na ma filifili ai ma lau soa ma te anapogi ma tatalo mo se vavega ina ia mafai ai ona ma aoaoina ia Oriviades. Sa matou faatulagaina ma ia se taimi ina ia avanoa ai se tasi o lona aiga e fesoasoani e faaliliu, talu ai e leai se isi o i maua ma lau soa e iloa le gagana e fai i faailoga.

Peitai, ina ua ma taunu e feiloai ma Oriviades, e leai ma se tasi o lona aiga na i ai iina. Ina ua alu Oriviades mo sina taimi e aumai se nofoa, sa ma faaaogaina ma lau soa lea avanoa e tatalo ai ina ia taitaiina i maua e le Agaga. A o lei faaiuina le ma tatalo, sa ou lagona le malosi o le faatasi mai o le Agaga.

Na amata ona fai mai faailoga a Oriviades, ae na le mafai ona ma malamalama ai. Sa na ona ma ataata atu ia te ia ma tilotilo le tasi i le isi, ma taumafai e mafaufau po o le a se mea e tatau ona ma faia. Sa ma filifili loa e tusi se tamai tusi e faailoa atu ai se taimi mo se isi a matou feiloaiga, ma faamoemoe o le a i ai se tagata faaliliu



i lena taimi. Ae peitai na faafuasei ona ma lagonaina malosi le tatau ona ma nonofo ma taumafai e aoao o ia. "Ia taumafai—o le a fesoasoani mai le Agaga ia i taua," sa ou fai atu ai i lau soa.

Sa ma taumafai e faaaoga ia atatusi ma taga faigofie o lima a o ma aoaoina atu le lesona. Na iu lava ina amata ona ma malamalama i faailoga a Oriviade ma na mafai foi ona ma toe faailo atu ia te ia. Na foliga mai na ia malamalama lelei lava ia i maua.

Na uunaia i maua e faasoa atu a ma molimau ia te ia. Sa ma faaali atu ia te ia se ata o le Uluai Faaaliga, ma na ou tusia i luga o se fasi pepa, "Ou te iloa e moni."

Ona, fai mai lea o faailoga a Oriviades, e tali mai ai, "Ou te iloa e

moni—na tau mai e le Atua ia te au. Na ou tatalo ma ua ou iloa ai e moni."

Sa ma tuua ma lau soa le matou faatasiga ma loimata. Sa ou iloa na faatagaina i maua e le Atua ina ia molimau atu e uiga i le talalelei toe-fuataiina i lenei tagata sailili ma na aveina atu e le Agaga Paia la maua savali i lona loto (tagai i le 2 Nifae 33:1). Sa ou iloa e le manaomia ona tatou tautala atu ma le atoatoa po o le malosi pe a tatou faasoa atu le talalelei—o nisi taimi, e le manaomia lava ona tatou tautatala.

E ese le maoae o le auala e mafai ai e ni mea faigofie e pei o le ana-pogi, tatalo, ma le faatuatua ona galueaiina ni vavega tetele i o tatou olaga ma i olaga o i latou o loo tatou auauna atu i ai. ■

# Aoao se Tagata e Fagota

**Saunia e Adam C. Olson**

Mekasini a le Ekalesia

**N**a taofi e Ezra le aloina o lana tamai paopao ma vaai atu i le goto ifo o le la e agai atu i le Pasefika i le isi itu o le vaifagaloa. Na la fagotaina nei ogasami ma lona tama mo le tele o tausaga, ae o le asō sa faigata ona ia vaai atu i se mea sa masani ai ona o ona loimata.

O le asō ua tuua na o ia.

A o luelue malie le paopao i luga o le sami, na mafai ona ia faalogoina upu na tele ina tautala ai lona tama: "Vaai faalelei, Ezra. E i ai se aso ou te oti ai ae o le a manaomia ona e iloa le auala e tausai ai le aiga."

O le asō la le aso lea na lapataiina ai o ia e lona tama ma taumafai ai e tapena o ia. Ae ua vave tele ona oo mai. E na o le 16 ona tausaga. E lei saunia o ia.

## O Le Tiutetauave

E faananau lava Ezra i lona tama. Sa faatalitali o ia ma le naunautai mo le tele o tausaga seja oo ina fai mai lona tama o le fitu o tausaga o Esera, na mafai ai e ia ona fesoasoani e faatulaga ma siaki ia upega faagota.

E lei tele ni tupe na maua mai i ona faiva, ae sa lava e fafaga ai Ezra, o ona tuafafine e toalima, ma lo latou tina; lagolago ai le tua-fafine matua o Ezra sa faamisiona i le Iunaite Setete; ma fesoasoani ai foi i o latou tuaoi. Sa mafai foi ona amata teuina e Ezra se tupe mo lana lava misiona.

Peitai ua maliu nei lona tama. Na faafusei lona maliu, ma sa nutimomoia ai le loto o Ezra. O le maliu ai o lona tama o le mou atu foi lea o lana toa magumagu, lona

epikopo, ma lona faiaoga.

Ae sa faaopoopo atu la i le loto nutimo-moia, le matautia o le iloa, o le tiutetauvae sa taumafai lona tama e sauniuni i ai o ia, o lea ua faafusei nei ona avea ma ana. Ua tatau nei ia Ezra ona tausia lona aiga.

## O Le Tatalo

Sa le mafai lava ona mafaufau o ia e fagota i le vaiaso muamua ina ua uma le maliu o lona tama. E lei te'a ona lagona mafatia. O le mafaufau e faaaoga le paopao a lona tama, faaaoga upega fagota a lona tama, ma le faia o galuega a lona tama e aunoa ma lona i ai, sa faigata ona talia.

O le vaiaso na sosoo ai, sa iloa ai e ia ua manaomia ona alu, ae sa matua mamafatu le avega. E ui i le naunau o Ezra ia faapei o lona tama, ae sa ia iloa e matua le'i taitai ona ia ausia lena sini.

"Sa ou lagona ua pei e leai se faamoe-moe," o lana tala lea. "Sa ou iloaina le faigata o le taimi muamua lava e savali ai i tulagavae a lo'u tama. A o ou aveina atu le paopao i le sami, sa ou lagona lona faatasi mai. Sa toe oo mai upu na tautala mai ai lo'u tama ia te au, ma sa ou lagonaina le mamafa o le tiutetau-ave mo lo'u aiga."

A o tu o ia i le sami papa'u o le Pasefika, na ia liliu atu i le Tagata lava e toatasi e mafai ona fesoasoani ia te ia—o le Toatasi na aoao-inia ai o ia e lona tama e faalagolago i ai.

"Faaali mai ia te au le mea na tu ai lo'u tama," o le tatalo lea a Ezra. "Fesoasoani mai ina ia ou faataunuina le manao o lo'u tama mo au."

*Ima ua ia manao-mia se fesoasoani, na liliu atu Ezra, e 16 tausaga le matua mai Samoa, i le mea na aoaoina ai o ia e lona tamā: i lona Tama Faalelagi.*



*O le toe taliu mai lea o Ezra ma lana uo o Fetu i le paopao ina ua uma ona ao la la'ua upega.*

## O Le Tali

I le toafilemu o le malu mai o le afiafi ina ua uma lena tatalo, na lagona ai e Ezra se mea ua suia. Na ia lagonaina le tata'i atu o ia i le mea tonu e fagota ai lona tama, ma na oo mai i lona mafaufau mea na aoaoina ai o ia e lona tama pe a manaomia.

“Ina ua uma lena tatalo, sa ou lagona se malosi faaopoopo,” o lana tala lea. “Sa ou iloa o le a fesoasoani mai le Tama Faalelagi ia te au.”

E pei lava foi ona faailoa atu e le Faaola i Ana Apostolo anamua le mea e lafo i ai a latou upega, na maua foi e Ezra se fesoasoani. “Sa tele i'a na ou maua i lena aso,” o lana tala lea.

## Ua Soo Lava le Atalii i le Tama

E ui ina sa masalosalo o ia e le mafai ona ia faia le mea na faia e lona tama, ae na iloa e Ezra e sili atu mea e mafai ona ia faia nai lo le mea na mafaufau ai.

“Ua avea o se suiga tele i lo'u olaga—o le auala ou te mafaufau ai, vaai ai i mea, ma faia,” o le tala lea a Ezra. “Sa ou iloa e mafai ona ou faia mea na faia e lo'u tama.”

Ua so'o uma lava Ezra i lona tama nai lo le mea na ia talitonu ai. Ua mulimuli o ia i tulagavae o lona tama e avea o se faifaiva—ma se faiaoga.

O le vaisaso lona lua na alu ai Ezra e fagota, na fesili atu lana uo o Fetu pe mafai ona la o ma aoao ai. Na aoaoina Fetu e Ezra i le auala e fagota ai, ma na fesoasoani foi Fetu ia Ezra i lana galuega ma ua la o toalua ai.

“Ou te faafetai mo le avanoa e aoao atu ai isi e pei ona aoaoina a'u e lo'u tama,” na fai mai ai Ezra. “Ou te fifiai ai aua ua ou iloa ua le na o a'u o se faifaiva e pei o lo'u tama ae ua avea foi au o se faiaoga.”

## Aoao se Tagata e Fagota

Fai mai le faaupuga, pe a e tuuina atu i se tagata se i'a, ua e fafagaina o ia mo se aso, ae afai e te aoaoina o ia e fagota, ua e fafagaina



*O loo fuafua Ezra e alu i se misiona. Na te manatua le tali mai o le Tama Faalelagi ina ua ia valaau atu. “Ou te manao e tali atu ia te la pe a la valaaicina au,” o le tala lea a Ezra.*



*O le faataunuina o le matafaioi a lona tama e avea ma se tagata e tausia le aiga, na fai mai ai Ezra, "Sa ou lagona le faigata i le taimi muamua o le savali i tulagavae o lo'u tama."*

o ia mo lona olaga atoa. Na faia moni lava e le tama o Ezra le vaega lona lua.

Peitai, na sili atu mea na aoao e Ezra mai lona tama nai lo le fagota. Na ia aoao e mafai ona ia faalagolago atu i lona Tama Faalelagi. O lenei malamalamā o le a aoga ia te ia i lona olaga atoa e sili atu foi nai lo lona tomai e fagota.

O lona iloaina na te moomia tele le fesoasoani a lona Tama Faalelagi, ua faaeteete ai Ezra i le faataunuina ma le agavaa o ona tiutetauave o se aoao, o le tofi lea na faauuina ai o ia e lona tama i le vaiaso ao lei maliu. Na te faatulagaina foi ana fagotaga ina ia lē faalavelave i lana aoga ma le seminare.

O le mea pito i sili, o loo ia teuina foi se tupe na te mafai mai ana fagotaga ina ia avea o ia ma faifaiva i tagata i se aso (tagai i le Mataio 4:19).

"I se tasi o afiafi faaleaiga na faaalia ai le manao o lo'u tama, ina ia matou o uma i ni misiona," o le tala lea a Ezra. "O lau sini maualuga lena."

Na manatua e Ezra le tali mai a le Alii ina ua ia valaau atu. "Ou te manao e tali atu ia te *Ia* pe a Ia valauina *au*." ■

# O Mea na AOAO AI AU e le Aau

*Na aoao au e le aau e le o uunaiga uma a taaga a tupulaga e le lelei.*

*O nisi taimi e fesoasoani e te manuia ai.*

**Saunia e Marissa Thompson**

**S**a fitu ou tausaga, ma sa ou le iloa aau, ma o lea na lesitala ai au e lo'u tina i lesona aau i le aoauli faatasi ai ma lau uo o Angie. O faaiuga o lesona taitasi, e ave ai matou e lo matou faiaoga i le ogatotonu o le vaitaele e aoao a matou aau. Matou te saogalemu lava i le ogatotonu ona e apoapo i matou e lo matou faiaoga i lalo ifo o o matou manava ae matou te faaaogaina ni "mea faaopeopea" i o matou papatua.

## **Uunaiga a Taaga a Tupulaga i le Vaitaele**

I se tasi aso e lei ofuina ai o ma ofu faaopeopea ma Angie, ma o lea na ma pipiimau ai i autafa o le vaitaele. Sa filifili Angie e fia aau i le isi itu o le tulimanu e faafesagai ma le puipui, pe tusa ma le fa futu (1.2 m) le mamao. Sa ou musu muamua, ae na ia luiina au. Ma e ui lava ina sa ou fefe, ae sa ou manavaina i totonu le tele o ea ma maulu i lalo o le vai, ma faamoemoe ia oo atu i le isi itu. Nai lo lou opeopea ma le faigofie e pei ona ou faia muamua ma lou ofu faaopeopea, sa amata ona ou magoto. Sa ou i ai i se tulaga popole. Sa ou iloa o le a ou malemo. Ona ou manatuaina lea o le mea na tau mai e lo'u faiaoga i nai vайасо ua mавае atu: "Afai ua e le mautonu a o e aau, na o le aapa lava



o lou lima e tasi i luga ae o le vai, ona sau lea o se tasi e fesoasoani ia te oe."

I le oo mai o lea manatu, sa aapa ae lou lima i le itu sa ou faapea o luga. Ou te lei lagonaina se ea. Sa

aapa solo lo'u lima i soo itu, ae ou te lei mauaina le pito i luga. O le taimi lava lena na taia ai lo'u ulu i le pito o le vaitaele. Sa faatali mai ai iina Angie mo au. Masalo na te lei iloa sa ou tau "malemo."

O ni nai vайасо mulimuli ane sa matou i ai ma lou aiga i se vaituloto. Ou te lei iloa lava aau, ma sa ou auau solo i le mea papau. Pe a ma le 10 minute ae ou vайаia loa se tasi o au uo o agai mai i le vaituloto. Sa ou popole. "E faapefea pe a iloa e

Stephanie ou te le iloa aau?"

Sa ou mafaufau ifo ai. Oka se maasiasi. O lea sa faafuasei ai ona ou faapau ifo i ou tulivae ma amata ona faafoliga o loo ou aau—sa ou savali i ou lima a o feaa solo ou vae. Sa puna mai Stephanie i le vai ma amata ona aau moi. Sa atili ai ona ou maasiasi. Ina ua mавае sin a taimi sa sau o ia ma

talanoa mai ia te au. Ona toe maulu lea i le isi itu, ae tuua au ma le maofa ona o le manaia o le faiga o lana aau. Sa faaaau pe a ona ou faatagā aau, ma le pei e faavalevalea.

Ina ua mавае ni nai minute, sa ou filifili e taofi lou fefe ma taumafai e aau. Sa ou i ai i vai papau, ma sa ou siiina ou lima ma amata ona ou aau e pei o se taifau. Sa aoga. Sa ou



faaopeopea. Sa na o ni nai sekone lava, ae sa ou opeopea. Sa ou faia ma toe faia i le afiafi atoa. E oo ane i le taimi na matou o ese ai, sa mafai ona ou auau i le vaituloto atoa.

### E Malosi Uunaiga a Taaga a Tupulaga

Pe a ou mafaufau i tua i na aafiaga e lua, sa ou ofo i le malosi o uunaiga a taaga a tupulaga. O le tasi o aso na toeitiiti ai lava ou malemo; ao le isi aso na uunaia ai au ina ia aoao e auu. O le tulaga lava lena o loo i ai ia uunaiga a taaga a tupulaga—e mafai ona avea ma mea lē lelei po o le lelei foi, ae e malosi tele lava.

O uunaiga a taaga a tupulaga o se tasi lea o mafuaaga na le mafai ai ona talitonu le Au Faresaio i fetalaiga a Keriso: “Ua sili lo latou manao i le viiga mai tagata, nai lo le viiga mai le Atua” (Ioane 12:43). Na vaai Liae i ni tagata i lana miti o e na maasiasi i le Alii ona sa tauemu ma tusi o latou lima i le fale tele ma le vateatea (tagai i le 1 Nifae 8:26–28).

Ua ou masani i lenei itu le lelei o uunaiga a taaga a tupulaga—o le itu lea e liliu ese ai tagata mai le faia o le mea latou te iloa e sao. Na ulagia au ona o ou tulaga faatonuina o le Au Paia o Aso e Gata Ai. Na i ai ni au uo o e na mananao ou te gaoia ni ofu, kopi i taimi o suega, ma agaleaga atu

i isi tagata. Nai lo le mananao ou te opeopea ma manuia, na foliga mai o i latou o ni taula o loo tosaina au i lalo, ma taumafai e lelemo au.

Ae na i ai foi ni au uo na musuia au e faia mea lelei—mea na lelei atili ai lou olaga, ae le o le leaga. A o ou i ai i le vasega valu, sa tauanauina au e lau uo o Ali ou te taumafai i le au

faafafia mo le tausaga aoga e sosoo ai. Sa lei avea ma se mea faigofie lea tulaga, talu ai a mafaufau e taumafai i se gaoioiga ao avea ma se tausaga muamua i se aoga maualuga tele sa taufaafefe lea. Sa tauanauina au e Ali e fai se mea aoga ou te le mafai ona faia e aunoa ma se uunaiga laitiiti mai se uo. Ma ona o le lelei o lenei uunaiga a taaga a tupulaga, sa faa-faigofie ai a'u fetuunaiga mo le aoga maualuga.

O uo lelei na musuia au i lou taimi atoa i le aoga maualuga faapea ai ma le kolisi, aumai ai ia te au le lototoa e tauva ai e avea ma se taitai o le aoga, galue mo ni togi lelei, ma tausia ai se molimau o le talalelei. Sa avea nei uo ma ni faatosinaga lelei i lou olaga. Sa latou mananao ina ia faamanuina au, ma sa latou fesoasoani i lou tuputupu ae.

O nei aafiaga na aoaoina ai au e le o uunaiga uma a taaga a tupulaga e le lelei, e pei ona manatu ai le toatele o tagata. E fuafua lava i le ituaiga o uunaiga ma le tagata o loo sau ai. Sa ou aoao afai e siomia au e se ituaiga faatosinaga lelei, o le a ou le magoto i lalo i ala o le lalolagi. O uunaiga lelei mai le Eklesia ma uo e i ai tulaga faatonuina maualuluga, o se malosiaga lea o loo avea e pei o se ofu opeopea i lou olaga, e faaopeopeaina au. ■



S a tuu mai  
Se lo'u tama  
ia te au se mea-  
alofo faapitoa o  
le Kerisimasi ao  
lei maliu o ia. O  
se ula o loo i ai  
se tamai logo siliva. E faamanatu mai ai  
ia te au ina ia faalogo pea lava pea i le  
Agaga ma ia tumau ai i le mama. O se  
oa faapelepele ia te au.



# FAALAGOLAGO i le Alii

**Mai se faatalanoaga ma Elaine S. Dalton, peresitene aoao o Tamaitai Talavou; saunia e Megan Withers Roxas**  
*“Ia e faatuatua i le Alii ma lou loto atoa” (Faataoto 3:5).*

**A** o avea au ma se teineitiiti sa ou mulimuli i lou tama i soo se mea e alu i ai. Ou te faamemelo lava ia te ia i lona tuuto i le Alii. Na ia faatuina se tulaga faatonuina maualuga mo au o le auauna atu ma le le manatu faapito. E vaiso atoa lava e le galue ai i tausaga uma. Peitai, nai lo le o i se malaga, na te faatonuina lo matou aiga e fesoasoani ia te ia e vali le fale o le tina ua oti lana tane o loo matou tuaoi. Ua na o le tasi lea o faataitaiga o le tele o galuega auauna atu. E mafaufau pea lava o ia i isi.

Ina ua ou i ai i le aoga maualuga, sa ma'i tigaina lo'u tama. Sa ou tatalo

e le aunoa ma aioi atu i le Tama Faalelagi ina ia faamanuia lou tama ina ia malosi. Sa i ai o ia i le falemai mo le masina e tasi, ona maliu ai lea.

O se mafatiaga lea i lo matou aiga. E lei i ai se uiga ia i matou o lenei mea ona matou te manaomia lo matou tama. Sa ou tatalo ina ia ou malamalamala pe aisea ua tupu ai lenei mea ma pe aisea ua le tali ai e le Tama Faalelagi au tatalo. Sa foliga mai ia te au ua filemu le lagi. Ou te lei maua se tali o au tatalo. Sa ou lagona faapea ua tuulafoai au e le Tama Faalelagi. Ae sa faaaauau pea ona ou tatalo.

I le tausaga mulimuli ane, sa ou auai atu i se sauniga faamanatuga lea na faitau ai e le failauga se mau mai le Faataoto:

*“Ia e faatuatua i le Alii ma lou loto atoa; ae aua le faalagolago i*

lou lava atamai.

“Ia e manatua o ia i ou ala uma, ona faatonuina ai lea e ia lava ou ala.” (Faataoto 3:5–6).

Na molimau mai e le Agaga ia te au o le tali lea o lau tatalo! Sa manaomia ou te faalagolago i le Alii. Sa umi se taimi na ou maua ai lena tali, ma e le o se tali sa ou manao ai, ae sa avea o se tali *sili* ona mata-gofie o se tatalo. E le tau manaomia ona ou malamalamala pe aisea ua tupu ai lenei mea. E manaomia ona ou faalagolago i le Alii.

Pe a e faalagolago i le Alii, e mafai ona e faia soo se mea lava—e tusa lava pe matuai faigata—aua e Na te taitaia ou ala. E na te savali i ou autafa. E Na te uuina lou lima. E Na te auina atu Ana agelu e siomia oe. O la'u molimau lena. Ma e moni ia i matou uma lava. ■

Molimau Faapitoa



Ua faasoa mai e Elder L. Tom Perry o le Korama a Aposetolo e Toasefuluua nisi o ona manatu e uiga i lenei mataupu.

# O a ni faamanuiaga tatou te maua e ala mai i le Ekalesia toefuataiina?


*Mai le "O Le Savali o le Toefuataiga," Liahona, Me 2007, 85–88; "Se a Ea La Oulua Feau?" Liahona, Me 2005, 84–87.*



*E mafai ona e faaaogaina le lesona ma le gaoioiga lenei e aoao atili ai e uiga i le autu o le Peraimeri i le masina lenei.*

# O Muai Mataupu Faavae ma Sauniga o le Talalelei

O Le a Mafai ai ona Ou Toe Mau faatasi ma le Atua



**Saunia e Ana Maria Coburn  
ma Cristina Franco**

*"Matou te talitonu o muai mataupu faavae ma sauniga o le Talalelei e faapea: muamua, Faatuatua i le Alii o Iesu Keriso; lona lua, o le Salamo; lona tolu, o le Papatisoina i le faatofuina mo le faamagaloina o agasala; lona fa, o le faaee atu o lima e maua ai le mea foafua o le Agaga Paia" (Mataupu Faavae o le Faatuatua 1:4).*

**O**le mataupu faavae lona fa o le faatuatua o loo talanoa mai e uiga i ni mataupu faavae ma ni sauniga taua se fa o le talalelei e tatau ona e mulimuli i ai ina ia mafai ona e toe mau faatasi ma le Tama Faalelagi.

Muamua, e tatau ona i ai lou faatuatua ia Iesu Keriso. O le i ai o le faatuatua ia Iesu Keriso o le talitonu lea o loo soifua o Ia, o Ia o le Faaola, ma e alofa o Ia ia te oe, e tusa lava pe e te lei vaai ia te Ia. Pe a i ai lou faatuatua ia Keriso, o le a e manao e fai le mea e finagalo o Ia e te faia, e pei o le tatalo, auai i le lotu, agalelei atu, ma tausi poloaiga.

O se tasi o mea taua ua finagalo Iesu e te faia o leia papatiso pe a valu ou tausaga (pe matua atu foi). O le a e papatiso e ala i le

faatofu—pei ona fai e Iesu. O lona uiga o le a tofu atoa lou tino i lalo o le vai. O le a faia lou papatisoga e se tasi ua i ai le pule o le perisitua e fai ai papatisoga. Pe a e papatiso, o le a e faia foi se folafolaga i le Tama Faalelagi. O le a e folafola atu o le a e tausia ia poloaiga, ma afai e te faia, ua Ia folafola mai, o le a e maua le mafutaga ma le Agaga Paia.

A uma ona e papatiso, o le a e maua le meaalofa o le Agaga Paia. O le a faaee atu e se tasi e umia le perisitua ona lima i luga o lou ulu ma tuu atu ia te oe le meaalofa o le Agaga Paia. O le a taitaiina, aoao, ma faamafanafanaina oe e le Agaga Paia ma o le a molimau atu ia Iesu Keriso.


Mai le aso na e fanau mai ai seia atoa le valu o ou tausaga,

sa e mama ma lē iloa se mea ona o le Togiola a Iesu Keriso. Pe a atoa lou valu tausaga ma ua papatisoina, o le a manaomia e te salamo i soo se mea sese e te faia. O le salamo o le lagona lea o le faanoanoa ma talosaga atu mo le faamagaloga mai le Tama Faalelagi ma mai soo se tasi na e faatiga i ai. Pe a uma ona e salamo, e manaomia lou taumafai malosi e aua nei toe faia na mea sese ma ia usiusitai atili i poloaiga. O le Togiola ua mafai ai e oe ona toe mama pe afai e te salamo.

E taua le i ai o le faatuatua ia Iesu Keriso, salamo, ma papatisoina e ala i le faatofuina, ma maua le meaalofa o le Agaga Paia aua o le a fesoasoani lea i lou toe foi atu e mau faatasi ma lou aiga e faavavau ma le Tama Faalelagi ma Iesu Keriso. ■

## Gaoioiga

E mafai ona e faia lenei sipuligi o se faamanatu o uluai mataupu faavae ma sauniga o le talalelei. Faapipii le itulau 63 i se pepa mafafia. Tipi ese faailoga e lima; ona tipi lea o le sipuligi i luga o laina soloatoa. Tipi pe oomi le mea o faailoa mai. Faapipii i luga ia faailoga mai le sipuligi e faaaoga ai se manoia po o se lipine.



1

2

4

3

•

O uluai mataupu  
faavae ma sauniga  
o le talalelei o le:

1. Faatuatua i le  
Alii o lesu Keriso

2. Salamo

3. Papatisoina  
i le faatofuina mo  
le faamagaloina  
o agasala

4. Faaee atu  
o lima e maua ai  
le mea foafua o  
le Agaga Paia

# **Tapē MA Ta'u Mai**



**O**le a ou tausia lou mafaufau ma lou tino ia paia ma mama."

O Ou Tulaga Faatonuina Faatalalelei

### Saunia e Danielle Kennington

E faavae i se tala moni

*"Ia faamaoni, ma ia le gauai i soos faaososoosoga" (MFF 9:13).*

**S**a saofai Connor i le komepiuta a le aiga ma ta i totonu le tuatasi o le uepisaite lea na tuu atu ia te ia e lana uo. "E tatau lava ona siaki le mea leal!" o le tala lea a lana uo.

Ae ina ua tatala mai le uepisaite, na lagona le le fiafia o Connor. Na ia taumafai faatopetope e tapuni le lau, ae o le tele o lona kiliki, o le tele foi lea o le oso ae o ata leaga. I lona le to'a, na kiliki ai e Connor le faamau e tapē ai le komepiuta ma tamoe i lona potu.

Na lagona e Connor le faanoanoa i lona vaaia o na ata. Talu mai lona papatisoga i nai masina ua mavae, na amata ona ia lagona le filemu faapitoa o le Agaga Paia. Ae ina ua uma ona ia vaai i na ata, e lei toe lagona e Connor lena filemu. Na ia lagona lona agasala ma le fefe ina nei iloa e se tasi le mea na ia vaai i ai.

Na filemu Connor i le taimi na aai ai i le afiafi. Na ia taumafai e

faalogo i talanoaga a lona aiga, ae na ia vaai pea lava pea i ia ata i lona mafaufau. Na le mafai ona aluese le lagona faaletonu mai lona manava.

Ina ua fai lana tatalo i lona po, na tau atu e Connor i le Tama Faalelagi ia ata ia na ia vaai ai. Fai mai o ia ua salamo, ma e na te le toe faia. Ina ua uma lana tatalo sa ia lagona lona toofilemu, ae na ia lagona foi e tatau ona alu e talanoa ia Tina. E lei manao lava Connor e tau atu ia te ia le mea na tupu. A e faapefea pe a ita pe le fiafia o ia?

Na iu lava ina filifili Connor e talanoa atu ia te ia. Na alu o ia i le potu o lona Tina ma saofai i lona moega sa faitautusi ai o ia.

"Tina, e mafai ona ta talanoa?" o lana fesili lea.

"Ioe, lau pele," o le tali lea a Tina. "O le a?"

Na masua uma atu. Na ia ta'u atu ia te ia le mea na fai mai ai lana uo, ma ta'u atu foi mea na ia vaai i ai ina ua alu i le saite. Na mata'i lelei o ia e le tina, ae e lei foliga ita.

"Sa ou le iloa le mea e fai," le tala a Connor. "O lea sa ou tapeina ai le komepiuta ma tamoe ese. Ua ou matua salamo lava, Tina. Sa le tatau

lava ona ou taina lena tuatusi i le taimi muamua lava, peitai ou te lei iloa e leaga."

Sa opo mai e Tina ia Connor. "Connor, ou te faanoanoa ua e vaai i na ata," o lana tala lea. "E taumafai nisi tagata e faasee tamaiti ina ia vaai i na mea leaga. Peitai na e faia le mea sao. Afai e te vaai i ni ata leaga i luga o le komepiuta, e tatau ona e "tapeina ma ta'u mai." O lona uiga e te oomiina le ki e tape ai le komepiuta ona e sau lea e ta'u vave mai ia te au. Ua e faia tonu lava le mea sa'o."

Na lagona e Connor le mafanafana!

"Connor, ou te manao ia e iloa e le ona o oe," o le tala lea a Tina. "O se mea sese, ma e le tatau ona e lagona le tausalaina i le mea na tupu."

"Ae, tina, afai sa ou faia le mea sa'o, aisea e le o lelei ai ou lagona i totonu?"

"E tau mai ia i tatou e le Agaga Paia pe a i ai se mea e matautia," o le faamatala mai lea a Tina. "O lona lagona na e maua o le Agaga Paia lena na

# MOTUGAAFA MO LE SAOGALEMU I LE INITONETI

fai atu e te sola ese. O le a ou tuuina se polokalama i la tatou komepiuta e poloka ai ni saite leaga, peitai e mafai lava ona ofi mai nei mea leaga i nisi taimi. O lea afai e toe tupu se mea faapea, ua e iloa le mea e tatau ona fai, a ea?"

"Tapē le komepiuta ma ta'u atu ia te oe, "o le tala lea a Connor.

"Na tonu lava!" na fai atu ai Tina.

A o lei alu Connor moe, sa ia tatalo ma faafetai atu i le Tama Faalelagi mo le toofilemu na ia maua. Ao ia tatalo, na ia lagonaina le toofilemu mai le Agaga Paia. Na ia iloa o le a lelei mea uma. ■

- la maua se faatagaga mai matua a e e te lei faaaogaina le initoneti.
- Faaaoga le Initoneti pe a i ai isi tagata—e pei o ou—matua.
- Vagana ua tuuina atu e se matua se faatagaga, aua lava nei e tuuina atu lou igoa sao, tausaga, tuatusi, numera o le telefoni, po o nisi faamatalaga patino.
- Failogia lau uepisait e te fafia i ai ina ia aua e te toe tau sailia.

**la sola ese mai se uepisait e le talafeagai:**



1. Tapē le lau po o le komepiuta.



2. Ta'u i se tagata matua.



3. Aua nei e toe alu i lena saite.



4. Afai e faasino atu e se tasi ia te oe se saite e le talafeagai, aua e te fefe e alu ese mai ai.

**A** fai o loo e saili i se uepisait e saogalemu, malie e te asiasi ai, siaki ane le friend.lds.org. E i ai tala, itulau valivali, ata vitio, ata faasolo, taaloga, ma isi mea.

# O La Tatou Itulau



*Michael G. (taumatau), 11 tausaga, mai Panama, e fiafia i ana vasega karate ma sue-sue malosi i le aoga. Na avea o ia ma se "pule aoga mo se aso" i lana aoga ona o le lelei o ona togia.*

*Ua leva ona avea Michael ma se faifeautalai lototoa. Ina ua faia e le Ekalesia se tulaga mo faamatalaga i se gaoioiga faavaomalo e lata i lona fale, sa tutu Michael ma ona matua i le auala e ulufale ai i totonu, ma tuu atu i tagata ni tamaitusi e uiga i le Ekalesia, ma valaaulia i latou e asiasi atu i le laulau o le Ekalesia. Na ia tuuina atu foi se kata e tuufaasolo i se aiga a se uo, ma na aoaoina i latou e faifeautalai e uiga i le Ekalesia. O loo ia tulimatai atu i le avea ma se faifeautalai.*



## O SE TATALO MO LE MAFANAFANA

**S**a ou miti faalua i se tasi po e faapea na mu lo matou fale ma na mu ai mea uma. Ina ua uma sa ou matua fefe lava. O lea sa ou tatalo ai i le Tama Faalelagi ina ia aua nei ou toe faia lea miti. Ina ua ou toe moe, sa ou miti sa ou i ai i se fanua matagofie. Sa ou lagona le toafilemu, ma sa ou le toe fefe.

**Nivia Angelica A., 10 tausaga, Mekisiko**

*Na fiafia tamaiti o le Peraimeri a le Uarota a Ville-Marie, o le Siteki a Montréal Québec, ma o latou faiaoga ma taitai e asiasi i lotoa o le Malumalu o Montréal Québec. Sa toafilemu ma migao i latou a o faafeiloaia e le au pere-sitene o le malumalu ma faia se maimoaga i le lotoa. Sa fiafia i latou e matamata i fuga-laua felanulanuai ma le malumalu matagofie. Sa latou matamata foi i se ata e uiga i le malumalu, ma sa maua e tamaiti uma se tamai kata o loo i ai le ata o le malumalu.*

**I**-meli mai au ata tusi, ata pue, aafiaga, molimau,ipo o se tusi i le liahona@ldschurch.org, o loo tusi ai le "Our Page" i le laina autu. Pe lafo mai foi i le: Liahona, Our Page

50 E. North Temple St., Rm. 2420  
Salt Lake City, UT 84150-0024, USA

O tusiga taitasi e auina mai e **tatau** ona i ai le igoa atoa o le tamaitiiti, itupa, ma lona matua faatasi ai ma igoa o matua, uarota po o le paranesi, ma le siteki po o le itu, ma le faatagaga tusia a matua (e taliaina i-meli) e faaaogaina ai le ata o le tamaitiiti ma le tusiga na auina mai. E ono faasa'oina tusiga e auina mai mo le manino po o le uumi.



# O La'u Faaiuga Tele

Saunia e Rebecca Shaw

E faavae i se tala moni

*"O le a papatisoina foi a latou fanau mo le faamagaloina o a latou agasala pe a valu tausaga le matua, ma maua le faaeega o lima" (MFF 68:27).*

**N**icole, e toe o mai nanei le au Johnson," fai mai ai Tina. "Na e tatalo e pei ona latou talosagaina ai oe?"

"Leai, e lei faia," o lau tala lea.

O Elder ma Sister Johnson o se ulugalii faifeautalai i le matou uarota. Sa o mai i la'ua i le afiafa faaleaiga e aoao mai ia te au lesona a faifeautalai.

E le toaaga lo matou aiga i le lotu, ma o lea e i ai nisi mea ou te le malamalama ai. Ma ona o le a valu ou tausaga, fai mai Tina e tatau ona ou filifili pe ou te papatiso.

O le vaiaso ua tea na ao-aoina ai au e Elder ma Sister Johnson i le auala na tatalo ai Iosefa Samita ina ia iloa le upu-moni. Ona la fai mai lea ou te tatalo e uiga i lo'u papatisoga.

"Faalogo i ou lagona," o le tala lea a Sister Johnson. "O le auala lena o loo fesoasoani mai ai le Agaga Paia ina ia tatou iloa le mea moni."

Sa ou faapea e mafai ona ou faatali seia atoa lou 14 tausaga e pei o Iosefa Samita.

O le matou lesona i lenei po, na faaputuputu ai e Elder Johnson ni upu i luga o isi ipu e faia ai se olo.

Fai mai o ia a le lelei lou faavae, o le a pau i lalo le olo atoa.

"Aisea e te manatu ai e matua malosi lava le faavae o le Ekalesia?"

perofeta soifua ma aposetolo e faatumauina i tatou i le ala sao."

Na sao lena mea. E masani lava ona ou maua se lagona lelei pe a ou faalogo e uiga ia Peresitene Thomas S. Monson.

Ona tuu mai lea e Sister Johnson ia te au o le fesili sa ou popole ai.

"Ua e tatalo e uiga i lou papatisoga?"

"Leai, e lei faia," o lau tala lea.

"E te fia papatiso?" na fesili mai ai Sister Johnson.

Sa ou manao e tali atu ia te ia, ae sa na o le faamimigi o ou tauau.

Sa manatu lou uso laitiiti ou te fefe i le faatofu o au i le vai aua o le mea lena e fefe ai o ia. Ae ou te fiafia i le vai, ma ou te lei mautinoa po o le a le mea na ou popole ai.

"O e fefe ile tiutetauave?" o le fesili mai lea a Sister Johnson.

O le taimi lava na fai mai ai Sister Johnson i lena mea, sa ou iloa e sao o ia. Sa fai mai

Tina pe a uma ona ou papatiso, o le a ou tali atu mo au lava. O lona uiga o le a ou tali i au lava filifiliga. E tatau ona ou faaeteete ia tausia poloaiga a le Atua. Ou te le o mautinoa pe ua ou saunia mo lena



sa ia fesili ai.

Sa ou manatua le lesona o le vaiaso ua tea. "Atonu ona sa ta'u atu e le Tama Faalelagi ma Iesu ia Iosefa Samita le auala e toefuatai mai ai," o la'u tala lea.

"Sao lelei," o le fai mai lea a Elder Johnson. "Ma o loo i ai o tatou



**S**a silafia e le Tama oi le Lagi o le Sa e . . . manaomia ona faia ni faaiuga o le a e le gafatia ona filifili sao ai. . . . Sa la faaaaofia ai se tulaga mo oe ia maua ai le fesoasoani . . . e ala i le Agaga Paia."

Elder Richard G. Scott o le Korama a Aposetolo e Toasefululua, "la Maua le Taitaiga Faaleagaga," *Liahona*, Nov. 2009, 6.

tiutetauave. A e a pe a ou le toe alu i le lotu e pei o lo'u tama?

"Pe a atoa lou valu tausaga, o le a e tali atu mo au lava filifiliga e tusa lava pe e te le papatiso," o le tala lea a Sister Johnson. "Ae pe a uma ona e papatiso ma faamauina, o le sili atu ona tele le fesoasoani mo oe i le faia o au filifiliga lelei. Ona o le a e

maua le meaalofa o le Agaga Paia."

Sa matou talanoa e uiga i nisi o poloaiga e manaomia ona ou tau-sia. Ua leva ona ou iloa o le ulaula ma le inu ava ma fualau faasaina e leaga mo oe, ma e lei faigata i lau faalogo le tau-sia o le Upu o le Poto.

Ina ua õ le au Johnson, sa ou le toe lagonaina le fefe e papatiso. Sa

ou manao e faia ni filifiliga sao ma tau-sia poloaiga a le Tama Faalelagi. Ma sa ou fiafia o le a fesoasoani mai ia te au le Agaga Paia.

Sa ou alu i lou potu ma tootuli i autafa o lo'u moega. Ao ou tatalo, sa mautu ou lagona o se manatu lelei le papatiso. Sa ou iloa o lena lagona o se tali i lau tatalo. ■

# O Se Tali Filemu

Saunia e Laura Hunter

E faavae i se tala moni

1.

Lisi, toe aumai! O lea  
ou te taalo ai!

Leai!



*"O le tali filemu e liliueseina ai le ita: a o le upu faatiga e tupu ai le ita"* (Faataoto 15:1).

2.

Suga, faamolemole soia le tauaimisa. Lisi, e tatau ona e alu i lou potu. Alisa, ou te fia talanoa ia te oe.



3.

E lē fetau, Tama! Sa ou taalo i lau meataalo, ae toso atu e Lisi. E na te faaleaga-ina lava mea uma.

E faigata le avea ma se uso matua. E te iloa le mea e fesoasoani ia te au pe a ou ita?

O le a, Tama?



4.

O se mau mai le Tusi Paia. O loo faapea mai, "O le tali filemu e liliueseina ai le ita: a o le upu faatiga e tupu ai le ita."

O lona uiga afai e te tautala ma le agaalofa ma le filemu, o le a lagona e tagata o loo feitai le toafilemu. Afai e te tautala ma le le faaaloalo pe ee atu ia i latou, o le a atili ai ona feitai.



5.

E te manatu o le a  
aoga lea ia Lisí?

Taumafai e fai i le isi  
taimi, ma vaai po o le a  
se mea e tupu.



6.

Ou te manao i apaaau  
faataulaitu!



7. Na manatua e Alesi le mea na ta'u  
atu e lona Tama.

Lisí, e te fia pale i lo'u pale? E mafai ona  
avea oe ma purinise, ae avea au ma au  
uo faataulaitu.



8.

Ua lelei, o le a fai au ma  
se purinise aulelei!

Afio maia, lau afioga.  
Ta taaaalo!



FAAMANATU




MO TALI FILEMU

O nisi taimi e faigata ai ona manatua le tuuina atu o se tali filemu pe a e ita. Fai i se tasi o matua e fesoasoani ia te oe e tipi se tasi o faamanatu mo tali filemu. E mafai ona e faapipiina i se ofutino, i se faitotoa, i se tusi faitau, po o soo se mea lava e te manao e fesoasoani ai ia te oe ina ia manatua e tuuina atu ai ni tali filemu.



FAAMANATU

MO TALI FILEMU



**PE A OU PAPATISO, OU TE OSIA SE FEAGAIGA  
MA LE ATUA**

“Matou te talitonu o muai mataupu faavae ma sauniga o le Talalelei e faapea: muamua, Faatuatua i le Alii o Iesu Keriso; lona lua, o le Salamo; lona tolu, o le Papatisoina i le faatofuina mo le faamagaloina o agasala; lona fa, o le faaee atu o lima e maua ai le mea foafua o le Agaga Paia” (Mataupu Faavae o le Faatuatua 1:4).

# Tala Fou o le Ekalesia

## Faateleina le Manaomia

### Faavaomalo o Tagata e Aoina Mai Faamaumauga mo Galuega Faalemalumalu

Saunia e Hikari Loftus

Mekasini a le Eklesia

**O**loo saili tagata i le lalolagi atoa mo o latou tuaa. Ma i le lalolagi atoa, o loo mafai e isi tagata ona faatinoina lena sailiga.

O le polokalama a le FamilySearch mo le aoina mai o igoa, lea sa faalaulioa i le initonetia i le 2006, ma ua taulamua ai volenitia i le lalolagi atoa, o le faiga lea e tuu uma ai faamatatalaga mai faamaumauga (e pei o faamatatalaga i ata mataninii) i se polokalama i le initonetia e mafai ona sailili i ai tagata.

O le faamaeaina e le 122,000 o tagata o le AAG ma tagata e le auai i le eklesia o loo galulue malosi i le aoina mai o faamatatalaga o faamaumauga e 547,978,000 talu mai lona amataga, ua matuai iloga ai lava le faamanuiaina o le aoina mai o faamatatalaga e le FamilySearch. Ae peitai, ua i ai se sini fou a i latou o loo faamaopoopoina le aoina mai o faamaumauga: o le aoina mai lea o faamaumauga i gagana e ese mai i le gagana Peretania.

“Ua tele igoa o loo matou aoina mai e le o ni igoa faa-Peretania,” o le saunoaga lea a Jim Ericson, o le pule o le maketi mo le FamilySearch. “O loo matou taumafai e aumai ni tagata e ese gagana e tautatala ai ia aafia malosi ai, ina ia sili atu se galuega tatou te faia i igoa e le faa-Peretania.”

E ui o loo faaaaua pea ona faateleina le aoina mai o faamaumauga i le gagana Peretania, ae ua matuai sili atu ai lava le tele o faamaumauga o atunuu faavaomalo. Ua amata ona maua ia galuega faatino mai atunuu eseese ina ua nofouta ia isi malo ma i latou e teuina faamaumauga i auaunaga e tuuina atu e le FamilySearch, na fai mai ai Brother Ericson.

Ina ia amataina, e aumai e tagata faigaluega o le FamilySearch ia faamaumauga mai malo, faletusi, ma isi lava punaoa, ma fatu ai ni kopi faafuainumeria faaeletonika o ia faamaumauga. Ona tuu lea o nei kopi i ni vaega laiti e ta’ua o “seti,” lea e mafai ona faaaoga e volenitia i luga o le initonetia. E o volenitia i le polokalama o le FamilySearch, sii mai se seti, ma ta mai faamatatalaga latou te vaaia i luga o le lau. O lena faamatatalaga e mafai i se taimi mulimuli ane ona maua e tagata e sailia talafaasolopito o aiga. O seti taitasi o se tuufaatasiga o galuega e mafai ona faamaea e se volenitia i le pe tusa ma le 30 minute, o le tala lea a Katie Gale, o le Taitai Faamaoopoopo o le Galuega Faatino o le Aoina mai o Faamatatalaga a le FamilySearch.

O volenitia e auai i le aoina mai o faamatatalaga a le FamilySearch e ono aofia ai tagata o o latou gagana moni e le o le Igilisi (o le taimi nei e fitu gagana e maua ai le saite), ae e mafai foi ona aofia ai tagata ua i ai tomai i gagana mai auaunaga faamisiona, aoga, po o isi aoaoga faamasani.

E tusa lava pe le o maua ia galuega faatino i se atunuu o loo e aumau ai po o auauna ai, ae e mafai lava ona maua mai ia galuega faatino mai atunuu o loo faaaoga ai lea lava gagana e tasi.

Ina ua fausia le Malumalu o Kyiv Iukureini, sa auai le Au Paia i Iukureini i se galuega taulamua e sue ma ao mai ai igoa e aumai i le malumalu pe a mae'a. E oo ane i le taimi na faapaia ai le malumalu, ua toa 401 tagata e aoina mai faamaumauga mai Iukureini, Rusia, Amerika i Matu ma

Saute, ma Europa sa galulue i le galuega faatino mo Kyiv,

ma sa mafai ai e le Au

Paia ona aumai

igoa Iukureini

e 200,000 i le

malumalu.

A o faateleina le galuega o le aoina mai

o faamatatalaga i se eria, o le a faapea ona faailoa atu e taitai o le FamilySearch latou te tuuina atu seti o igoa, ia eria ua faateleina ma, i nofoaga e mafai ai, e faatelevaveina ai le faamatuuina atu o galuega faatino e faatatau i lena risone.



I le televave o loo i ai nei le aoina mai o faamatalaga, o nisi atunuu e ono oo atu i le sefulu tausaga faatoa faamaeaina ia seti ua uma ona faamatuuina atu—o le ala lea o le manao-mia o nisi tagata e aoina mai faamatalaga. O le tele o seti i gagana e ese mai i le Igilisi o le averesi e i le va o le lua i le ono tausaga e faamaea ai.

“Afai e faifai pea ai lava se galuega faatino, o le a leai se taaa i se tagata,” o le saunoaga lea a Paul Starkey, Pule o le Faatautaiga o le Aoina mai o Faamatalaga mo le FamilySearch. “O le faamoe-moega atoa lava o le aoina mai o faamatalaga, ia mafai lea ona maua nei faamaumauga [faaeletonika] ina ia mafai ai e tagata ona saili o latou tuaa. Matou te taumafai lava ia vave faamaea ia nei galuega faatino.”

O loo umia e le Ekaleisa le tusa ma le 2.4 miliona o lola o ata mataninii o loo i ai faamaumauga o gafa o loo teuina i le Granite Mountain Record Vault. O nei faamaumauga e talitutusa lava ma le

## AMATA NEI LOA LE AOINA MAI O FAAMAUMAUGA

**E** amata i lou alu i le [indexing.familysearch.org](http://indexing.familysearch.org).

Filifili se gagana se tasi mai gagana e fitu e te galue ai mai le lisi e oso mai.

Kiliki i le **Get Started**.

O le a otometi ona sii mai ma faailoa mai le polokalama o le aoina mai o faamaumauga.

Faataitai muamua i se seti faataitai e te faa-masani ai i le polokalama.

Amata loa ona ao mai faamaumauga! E mafai ona e filifilia se seti mai soo se galuega faatino, e faatulaga i atunuu. ■



ATA NA PUENAA E WEIDEN C. ANDERSEN, © IRI

15 piliona o faamaumauga o loo faatalitali mo le aoina. E anoanoai isi faamaumauga faitino o loo i ai i le lalolagi atoa.

“[O le mauaina o se igoa ma ni faamaumauga patino] o se aafiaga lea e liliu atu ai loto o le au suesue i o latou tamā,” o le saunoaga lea a Brother Ericson. “E mafai e tagata o le Ekalesia ona faaaoga faamatalaga ua uma ona aoina mai e tusitusi ai gafa o o latou tuaa ma faia ai sauniga faaola o le malumalu.”

E ui toetoe o tagata uma e i ai se komepiuta e mafai ona auai i le galuega faatauvaa o le aoina mai o faamaumauga, ae e le tatau ai ona faaititia lona taua, o le faamatalaga lea a Sister Gale. “Afai e [mafai] e tagata ona vaai o le aoina mai o faamaumauga o le vaaiga mamao maoae lea o le talafaasolopito o aiga, e mafai foi ona latou vaaia lona taua ma le manaomia pea o ni volenitia se toatele.”

“Matou te manaomia pea ni tagata se toatele e faatinoina le aoina mai o faamaumauga,” o le saunoaga lea a Brother Ericson, “ma ua matou talosagaina ai tagata e faasoaa atu lenei polokalama i a latou uo ma aiga, e tusa pe o i latou o ni tagata o le Ekalesia pe leai foi. E le faapea e mo na o tagata o le Ekalesia. E i ai se feoeoeaiga malie pe a galulue tagata uma i se sini e laugatasia ai.” ■

**Ua i ai se sini  
fou a taitai e  
faamaopoopo-  
ina le aoina  
mai o faamau-  
mauga a le  
FamilySearch  
mo volenitia:  
o le aoina mai  
lea o faamau-  
mauga i isi  
gagana e ese  
mai i le Igilisi.**

# Faatupulaia le Faalagolago o le Tagata ia te la Lava i Ekuatoa

Saunia e Heather Wrigley

Mekasini a le Ekalesia

**O**le saolotoga o le tagata lava ia ma le tiute-tauave o le tagatanuu e faalagolago lea i le mataupu faavae o le fesoasoani i le tagata ia fesoasoani ia te ia lava,” o le saunoaga lea a Peresitene Ezra Taft Benson (1899–1994), o le Peresitene lona sefulutolu o le Ekalesia, i lana saunoaga amata i le 1975 i le Benson Institute Agriculture and Food Institute and Corporation, o se polokalama o Auau-naga Alofa a le Au Paia o Aso e Gata Ai.

I lalo o lena filosofia o le ola faalagolago o le tagata ia te ia lava, ua galulue ai le Inisitituti a Benson ma le faitau afe o tagata e faaleleia atili le gaosiga o meaai, taumafa paleni, ma le soifua maloloina, faateleina o le tulaga lelei o le olaga mo nisi o tagata matitiva o le lalolagi.

I le 2009 sa malaga atu ai sui o le Inisitituti a Benson i Ekuatoa, o se atunu e tamaoaiga i faatoaga. Ae peitai, e tusa ai ma faamaumauga a le Faalapotopotoga o le Soifua Maloloina o le Lalolagi, i totonu o lenei atunu ua toeitiit 15 miliona tagata, o le 23 pasene o tamaiti e i lalo o le lima tausaga le matutua o loo faaauau pea ona maua i le tino paeee. O taumafaiga a le Inisitituti a Benson o loo fesoasoani e tuuititia lena fuainumera, a o galulue ai i latou o loo aafia ai e momotu le lio o le mativa.

Fai mai se tasi o tamaitai, o se tina o se fanau e toaono, a o lei oo mai le Inisitituti a Benson, sa masani ona faigata ona tausi lona aiga: “O se mea faanoanoa le avea ma se tina ma le matuai mativa foi, lea e le mafai ai ona e tuuina atu i lau fanau se meaai po o se fasi falaoa i aso taitasi,” o lana tala lea.

Ua aoaoina e aiga o loo galulue faatasi ma le Inisitituti a Benson ia auala lelei e totolina ai faatoaga, faasolosolo le totolina o laau aina, faiga o lafumanu laiti, meaai paleni lelei, tumama o le tagata lava ia, ma le gaseseina lelei o meaai.

O le fiaai lea sa avea ma se faafitaui i aso taitasi mo le toatele, ua avea ma se mea e seāseā ona

tupu ona o le faatinoina o auala fou mo le faiga o faatoaga. Sa vaia e aiga le matuai faateleina o meaai e maua, ma mafai ai ona latou teuina a latou lava meaai ma faapea ai foi ona faatauina atu ia fua o faatoaga mo se tupe maua. Ma le isi, ua oo ai aiga i se tulaga lelei atu o le soifua maloloina ina ua faaleleia atili a latou taumafataga ma le tumama. O le taumafaina o fua o a latou



*Ua vaia e aiga o loo galulue faatasi ma le Inisitituti a Benson le ola maloloina sili atu, a o faaleleia atili a latou taumafataga ma tumama.*

galuega mai faatoaga, ua latou maua ai niutiriene sa le maua muamua i a latou mea e ‘ai.

“Sa masani ona i ai a matou tamaiti sa le lelei i le aoga,” o le tala lea a se faiaoga i le lotoifale. “Ina ua maea le polokalama, sa matuai vave ona atamai tamaiti. O le taimi muamua, sa i ai a matou tamaiti sa masani ona mama’i; mulimuli ane, sa le’i toe mama’i tamaiti. Sa masani ona latou momoe i totonu o vasega; mulimuli ane, latou te le’i toe momoe i vasega. Sa matuai foliga ‘ivavā ma vaivai i latou, ae ina ua maea le polokalama sa sili atu ona foliga maloloina ma au malolosi.”

O taumafaiga taulamua uma a le Ekalesia, e faavae i mataupu faavae faamaonia o le ola faalagolago o le tagata ia te ia lava. O lena mataupu faavae faatasi ai ma le faiga masani a le Inisitituti a Benson o le galulue i le anoanoa’i o le potomasani ma le malamalamama, ua faaauau ai ona faamanuia olaga o le faitau afe o tagata i le lalolagi atoa. ■

**Maimoa i luga o le initonet i se vitio e faatatau i le galuega faatino i Ekuatoa i le gagana Peretania ma le Sipaniolo i le <http://lds.org/church/news/growing-self-sufficiency-in-ecuador>.**

## Na Ta'u Atu e Apostolo i le Au Paia i Amerika Tutotonu e, Sii Ae le Malamalama i le Lalolagi

E tatau i tagata taitoatasi o le Ekalesia ona fausia se faatuatua loloto ia Keriso, o saunoaga ia na ta'u atu e Elder M. Russell Ballard ma Elder D. Todd Christofferson o le Korama a Apostolo e Toasefululua, i tagata o le Ekalesia i Kuatemala, Honotura, ma Nikarakua i le taimi o o la'ua tofiga i Amerika Tutotonu ia Ianuari 2011. Faatasi ai ma isi taitai o le Ekalesia, sa la'ua fautuaina ai le au paia e faamalolosia o latou aiga e ala i le tatalo, suesueina o tusitusiga paia, auaunaga i le malumalu, afiafi faaleaiga, tausia o le aso Sapati, usiusi tai i poloaiga a le Alii, ma le faasoa atu o o latou faatuatua i tagata e siomia i latou.

Sa pulefaamalumalu Elder Christofferson ma Elder Ballard i konafesi i nisi o siteki ma auai i faeasaite mo taitai perisitua i le lotoifale, matua ma ulugalii faaipoipo, talavou matutua nofofua, ma le autalavou. Sa la'ua feiloai foi ma le 1,100 o faifeautalai i misiona e fa, au peresitene o siteki, epikopo, ma peresitene o paranesi.

### Toe Foi Atu Elder Scott i Mozambique

Na ta'u atu e Elder Richard G. Scott, o le Korama a Apostolo e Toasefululua i le Au Paia o Aso e Gata Ai i Mozambique, a o i ai o ia lata mai nei i le Eria a Aferika Sautesasa'e, "O outou o nisi o fanau e sili ona faapelepele i le lalolagi, ma e alofa le Atua ia te outou." Ua sefulutasi tausaga talu ona mae'a le faapaiaina o lenei atunu mo le talaiga o le talalelei, ae na toe foi atu Elder Scott ia Ianuari 2011 ma maua ai ua maoae le alualu i luma o le Ekalesia.

I le asiasiga muamua a Elder Scott, sa na o le 40 tagata o le Ekalesia i Mozambique, ma sa avea le atunu ma se vaega o le Misiona a Johannesburg Aferika i Saut. I le taimi o lana asiasiga lona lua, ua tupu le Ekalesia ma ua silia i le 5,000 tagata o le au paia ua salalau atu i itu e 2, paranesi e 19, ma ni vaega se 3 e lolotu i le atunu atoa. O Mozambique foi o le laumua lea o le Misiona a Maputo Mozambique, lea e aofia uma ai Mozambique ma Anekola.

A o le'i toe malaga ese mai, sa faaalu ai e Elder



AIA PUE MAI LE FAALOALOGA A ELDER NEIL ANDERSEN

### *Ua feiloai atu*

*Elder Neil L.*

*Andersen o*

*le Korama a*

*Apostolo e*

*Toasefululua i*

*tagata o le au*

*paia ma faife-*

*autalai i le Eria*

*a le Pasefika.*

Scott se taimi e feiloai ai ma faafetai atu i fomai sa i ai faatasi i Mozambique ma le polokalama o auaunaga alofa a le Ekalesia.

### **Faamalolosia e Elder Bednar ma Elder Andersen le Au Paia i le Pasefika**

Na aoaoina, siitia, ma faamalamalamaina talu ai nei e sui e toalua o le Korama a Apostolo e Toasefululua o Elder David A. Bednar ma Elder Neil L. Andersen, ia tagata o le Ekalesia ma faifeautalai i le Pasefika.

Sa feiloai Elder Bednar ma faifeautalai ma le au paia i Toga, Niu Sila, Hawaii, ma le Atu Maresala. Mo le au paia i le Atu Maresala, o le asiasiga a Elder Bednar o se mea taua lea, aua e talitonuina o le taimi muamua lea ua asiiasi atu ai se sui o le Korama a Apostolo e Toasefululua.

Sa faataunuina e Elder Andersen ni tofiga i Ausetalia, Papua Niu Kini, Niu Sila, ma Farani Polenia.

Na saunoa Elder Bednar, "A o ma malaga atu i motu o le moana ma vaega aupito mamao o le lalolagi, ua ma vaaia ai le i ai o le Ekalesia i soo se mea." "Ua mauaa ai, o loo tuputupu ae, ma o loo i ai ni tagata faamaoni, ma lelei. E matuai ofoofogia lava." ■

*Mo nisi faamatalaga atili e uiga i galuega a perofeta ma apostolo i aso nei, asiasi i le [lds.org/study/prophets-speak-today](https://lds.org/study/prophets-speak-today).*

### O Le Faatuatua ma Aiga na Musuia ai le Malaga i le Malumalu a Tagata Niu Kaletonia.

O Ianuari, e 147 tagata o le Ekalesia mai Niu Kaletonia na faaaluina se masina i Hamilton, Niu Sila, e auai atu i le malumalu.

Mo le toatele, o le taimi muamua lea ua latou tapuai ai i totonusi o se malumalu a le Au Paia o Aso e Gata Ai. Mo isi, o se mea e tupu faaleausaga.

“E le o i ai so matou malumalu i Niu Kaletonia, ma o le toatele o le au paia e o mai mai aiga e sili ona faatauvaa, o le tala lea a Georgie Guidi,

o se tasi o le vaega. “E galulue matua i le tausaga atoa e faaputu le tupe mo le malaga.” E silia i le 1,000 maila (1,600 km) le mamao o le mea o loo i ai le malumalu mai maota ma laoa o nei tagata o le au paia.

Fai mai a ia, o le mafuaaga latou te naunau ai lava e o atu i Niu Sila, ona o aafiaga latou te maua ai iina e faamalolosia ai o latou faatuatua ia Iesu Keriso, ma aumai faatasia ai o latou aiga.

Sa faaopoopo mai Gerard Mou-Tham, o le peresitene o le itu i Niu Kaletonia, “o le o mai i le malumalu o se avanoa mo le toatele e faateleina ai o latou faatuatua ma atili ola latalata ai i le Atua.” ■

### NAI OTOOTOGA O LE LALOLAGI

#### Tauao Atu i le Palemia o le Atu Solomona le Folafolaga i le Aiga

Sa tauaoaina atu e le Ekalesia se kopi “O Le Aiga: O Se Folafolaga i le Lalolagi” (*Liahona* ma le *Ensign*, Nov. 2010, 128) i le palemia o le Atu Solomona, o Danny Philip, i se sauniga puupuu i le Aso Faraile, 21 Ianuari, 2011.

Sa feiloi ia Elder Dirk Smibert, le Fitugafulu Eria, ma isi sui o le Ekalesia i le maota o le palemia ma tauao atu ia te ia le folafolaga faapea ma se faatagata o se aiga.

#### Fofoga Mai Aso o le Malumalu o El Salvador

Ua valaaulia e le Au Peresitene Sili o le Ekalesia ia tagata o le au paia ma tagata lautele e maimoa i le Malumalu o San Salvador El Salvador i le taimi o lona faatatala e faia mai i le Aso Faraile, 1 Iulai, 2011 e oo atu i le Aso Toonai,

23 Iulai, 2011, vagana ai Aso Sa.

O le a faia se faafiafiaga faaleaganuu i le Aso Toonai, 20 Aokuso, 2011, ona sosoo ai lea ma le faapaiaga o le malumalu i le aso e sosoo ai.

#### O Le Saite e Mafai ai e Tagata o le Ekalesia ona Faasoatatu Taleni e Fausia ai le Ekalesia

O le Fesoasoani i le Tovine, o se uepisaite fou a le Ekalesia ua fatuina e tuu i ai le anoano o galuega faatino volentia e mafai ona fesoasoani i ai tagata o le Ekalesia. O galuega faatino e aofia ai faaliliuga, aoina mai o faamaumauga a le FamilySearch, puega o ata, faaigoaina o vitio ma ata, ma galuega faatonutonu, ma e maua mai i soo se nofoaga e mafai ona faaaoga ai le Initoneti.

Ua faamoeomoe i latou na fatuina le Tovine, ia maua le 10,000 o tagata volentia e lesitala ma auai i galuega faatino e faia i le initonet i le 2011. E mafai e tagata

o le au paia ona saini e auai ai i le vineyard.lds.org, e na o le Igilisi o loo maua ai i le taimi nei.

#### Tatala e le Fale Mataaga ia Faaaliga [Faatufugaga] Fou a Tamaiti

Ua tatalaina e le Fale Mataaga o Talafaasolopito a le Ekalesia i le Aai o Sate Leki, ni faaaliga fou se lua e faaali ai siosiomaga fatufatuai faaleaoaoga ma faatufugaga a tamaiti.

*The Gospel Blesses My Life* ua faaalia ai faatufugaga na saunia e tamaiti mai atunu u 42 i le lalolagi atoa, ua faaalia ai le ala ua faamanuiaina ai o latou olaga e se malamalamaaga o le talalelei a Iesu Keriso.

*A Book of Mormon Fiesta: A Latin American Celebration* ua faaalia ai vaega fesootai e faamanuiaina ai le talatuu o Latina i totonusi o le Ekalesia ma faaalia ai tala e uiga i le au paia Latina Amerika.

Mo faamatalaga atili e uiga i faaaliga, asiiasi i le churchhistorymuseum.org. ■

### Lototoa ina la Malosi Atili

O aso uma ou te mafaufau ai i fautuaga ma faalaeiauga ou te maua i le *Liahona*. E fesoasoani ia i a'u filifiliga i aso uma, ma ua ou iloa ua sili atu ona ou tuuto e ola i le talalelei. E aumai e le mekasini ia te a'u le lototoa ia ou faamalosi atili ai.

Ramon Cristopher Hipolito Villaluna,  
Filipaina

### Foia Ai Faafitauli Faigata

O savali i le *Liahona* e faatumuai ai lo'u malosi. A manaomia lo'u faia o ni faaiuga e foliga mai e faigata, ou te toe faiatua ia savali ma ou maua tonu ai le fofu. Faamolemole e aua nei taofia le faaaofia ai o Savali a le Au Peresitene Sili ma Leo o le Au Paia o Aso e Gata Ai.

Evelyn Forson, Ghana

### O Le Upumoni Lenei

O Le *Liahona* ua avea ma se tialala i lo'u olaga talu ona ou auai i le Eklesia i le 15 tausaga ua mavae, ma ua ou maua ai ni musumusuga malolosi mai le Agaga a o ou faiatua i ona itulau. O lo'u sulufaiga lea i taimi o faanoanoaga. A o ou faiatua i tala e uiga i le Au Paia i le lalolagi atoa, ma saunoaga a Pulega Aoao, ou te lagona le mafanafana, toafilemu, ma se faamautinoaga o le mea moni lenei.

Felipe Urbina, Costa Rica

Faamolemole auina mai lou finagalo faaalia po o fautuaga i le [liahona@ldschurch.org](mailto:liahona@ldschurch.org). E ono faapupuina tala mo le uumi po o le manino.

O lenei lomiga e aofia ai tusiga ma gaoioiga e mafai ona faaaoga mo afiafi faaleaiga. O nai faataitaiga nei.

### "O Le Ala Moni i le Fiafia," i. 28:

A uma ona faasoa atu le tusiga i lou aiga, mafaufau i fesili nei: E faapefea ona aafia lo tatou fiafia i le lumanai i faaiuga tatou te faia i le taimi nei? E faapefea ona tatou mautinoa o loo tatou faia faaiuga amiontonu?

**"O Le Mana o Aoaoga," i. 42:** Sa faagaeetia le tusitala o lenei tusiga i le saunoaga a Peresitene Gordon B. Hinckley e uiga i aoga: "E te manaomia aoaoga uma e mafai ona e maua. Ositaulaga . . . soo se mea e tatau ona ositaulagaina ina ia agavaa ai outou lava e fai le galuega o le lalolagi." la talanoaina o se aiga le ositaulaga ma faamunuiga e maua mai ai.

### "Aoao se Tagata

**e Fagota," i. 54:** Faitau faatasi ma lou aiga ma fai se aotelega o le tusiga lenei. Na faapefea ona sauna Ezra e fetaimai ma ona tofotofoga? Na faapefea ona fesoasoani le Tama Faalelagi ia te ia? la talanoaina mea e mafai ona fai e lou aiga e sauna ai.



**"Faalagolago i le Alii," i. 60:** Faitau faatasi o se aiga le tusiga. Ia mafaufau e fai atu i tagata o le aiga e fefaasoaa'i ni aafiaga i taimi na tali mai ai a latou tatalo. Talanoa i ni auala eseese e mafai ona tali mai ai le Tama Faalelagi i tatalo ma le taua o le faalagolago ia te la.

### O Fesili a Lo'u Afafine

I le avea ai ma se epikopo o le matou uarota, ou te uunaia ai lava matua e tuu atu ni avanoa i a latou fanau e faiaoga ai i afiafi faaleaiga. Sa tonu ia i ma'ua ma lo'u toalua e fai e pei ona ou ta'ua.

Sa faiaoga muamua lo ma atalii, ma sa matou fiafia i lana lesona e uiga i le tatalo. O le Aso Gafua na sosoo ai o le avanoa lea o lo'u afafine. Sa na o ni nai masina ua te'a atu na papatisoina ai o ia. O lana autu o le foafoaga a le Atua. Sa ia tuuina mai ni fesili, lea sa matou auauai i le taliina. Ona ia tuuina mai lea o lana molimau ma faauma loa.

Sa fai atu lo'u atalii, "O lena e te le'i aoaoina mai i matou; sa na o lou fai mai lava o

ni fesili." Ae sa ou ta'u atu i lo'u aiga, sa ootia au ina ua tali atu lo'u toalua i se tasi o fesili, ma faapea atu, e faafetai o ia i le Atua mo le foafoaina o iunite o le aiga ma le tuuina mai ia te ia o se aiga lelei ma se toalua agaalofa. Sa ou ta'u atu ia i latou, ua tumu lo'u loto i le faafetai ina ua taliina e lo'u afafine laitiiti le fesili, "O ai na foafoaina le lalolagi?" e ala i lona fai mai, "O lesu." E tele nisi tali sa ou iloa e maoae ai lo latou atamai.

E ui lava la e le'i "faiaoga" lo'u afafine e pei ona faamoemoeina e lo'u atalii, ae o lana lesona—ma isi lesona sa aoao mai e la'u fanau—o afiafi faaleaiga aupito sili ia ona ou fiafia i ai.

Richard Ikpegbu, Nigeria

# FAUSIA I LUGA O SE FAAAVE MAUTU

**Saunia e Joshua J. Perkey**

Mekasini a le Ekalesia

O loo taoto i tuaoi o Louisville, Kentucky e le mamao ese mai le eria tele o le Vaitafe o Ohaio se tamai nuu, ua ttau o Anchorage. Sa avea muamua o se nuu faifaatoaga lea na amata ai e se kapeteni o se vaa o le vaitafe lana malaga mulimuli, ua avea ma nofoaga o aiga o le tele o faatuatuga eseese.

O iina i le lotu, ma le aiga, ma a o mafaufau atu i le lalolagi matagofie i lalo o laau o le sukamolo, aruna, moapila, ifi, ma uilo, sa ou aoao ai e uiga i se tasi o faavae o le faakerisiano: na afio mai Iesu o le matai aoao, ma aoaoina i tatou i auala o le lelei ma le amiosa'o.

O ni tagata lelei ou matua, ma e faamaoni i le la lotu. Sa la aoaoina au ina ia avea ma se tagata lelei ma e i ai nisi o mea e lelei, e pei o le agalelei atu i isi, ma nisi mea e le lelei, e pei o le gaoi. I se isi itu, sa la aoao mai foi faapea o le mea e talitonu le tasi tagata e moni e tutusa lava ma le mea o loo manatu le isi tagata e moni, e tusa lava pe eseese na talitonuga i ala e faavae ai. O lenei la filosofia, e pei ona ou malamalamai ai, e leai ni mataupu faavae moni e faavavau mo tagata uma, na o ni vaaiga faaletagata e i ai le aia ttau ma matafaioi a tagata atamamai e fuafuaina ai pe moni mo i latou lava.

Ona o na talitonuga autu o faatatauga o aoaoga, o lea sa faigata ai lava ona ou talitonu i mea na aoaoina ai au e faifeatalai Mamona e uiga i le manaomia o le Togiola, pule o le perisitua, ma perofeta. E moni, o lau malaga i le liua e ono tausaga o le luitauina e le aunoa



*E mafai ona  
le maluelue se  
molimau.*

ma fesili po o ai au, o a mea sa ou talitonu ai, ma pe i ai moni lava, se Atua o le na faavaeina ia mataupu faavae faavavau o le upumoni ma le sese, agasala ma taunuuga.

O se mea e faagaeitia ai, sa ou maua se faamautinoaga faaleagaga, ae e lei oo mai vagana ai ua lava lo'u lotomaulalo e taliana ai. Na muamua oo mai se molimau o

le papatisoga, ona oo mai lea o le Tusi a Mamona, sosoo ai ma Iosefa Samita o se perofeta moni. Na mulimuli mai ni molimau faaopoopo, o lea mataupu ma lea mataupu, e tusa ai ma perofeta ma apostolo o le taimi nei.

Na iu lava, ina sa i ai se taimi i lou olaga na ou le talitonu ai e moni le talalelei—sa ou iloaina. O le tau-nuuga o le tele o nai molimau iti na fausia ai se faavae ma faamautu ai lou faatuatua, o se puipuiga mautu mai luitau e motusia ai se molimau.

O la tatou aia paia le sailia o ni tali mai le Alii. Ma e tatau ona tatou tumau i le tausia-in faaleagaga o i tatou lava i aso uma ina ia tumau malosi ai a tatou molimau. Ae ou te iloa foi i le faatulagaga a le Alii, e le o se tulaga lelei le faaauau pea ona fesiligia ia mataupu faavae e faatatau i mea na tatou mauaina o se molimau. E moni, e ono taitaiina atu ai i le liliuese.

Ou te le o toe tauivi ma le faatatauga o aoaoga i le taimi o lou talavou. Ou te iloa pe a saunoa mai le perofeta, o ana upu e a le Atua ia. Pe a tulai mai se faafitauli e luitau ai lau molimau, ou te faalagolago i le molimau ua uma ona ou maua, ona ou faia lea o le mea sili ou te ola ai. O le auala lena i le filemu; o le auala lena i le fiafia. ■

# O Le Fuafuaga o le Uelefea a le Ekalesia

FAAMANATUINA O LE 75 TAUSAGA O LE OLA FAALAGOLAGO O LE  
TAGATA IA TE IA IAVA MA LE GALUEGA AUAUNA ATU

*"O lo tatou uluui  
faamoemoega lava o  
le faatuina lea . . . o  
se faiga e le toe i ai le  
fetuu ona o le paie, le  
toe i ai le amioleaga o  
le maua fua o se mea,  
ae ua toe faatuina le  
tutoatasi, o le galulue,  
o le ola faasoasoa  
lelei ma le faaaloalo  
i o tatou tagata. O le  
faamoemoega o le  
Ekalesia o le fesoasoan  
lea i tagata ia  
fesoasoan ia i latou  
lava. E ao ona avea  
le galue ma mataupu  
faavae laualuga e  
taitaiana ai olaga o  
tagata o le Ekalesia."*

Peresitene Heber J. Grant  
(1856–1945), i le Conference  
Report, Oke. 1936, 3; tagai  
foi i Aoaoga a Peresitene o  
le Ekalesia: Heber J. Grant  
(2002), 121.

## ANOTUSI

- 82** O Se Tusi mai le Au  
Peresitene Sili
- 83** O Le Faia i le Ala a le  
Alii
- 84** Fitusefulu Lima  
Tausaga o le Ola  
Fuafua Lelei mo le  
Lumanai
- 85** Mauaina o le Vaaiga  
Mamao i le Ola  
Faalagolago o le  
Tagata ia te la Lava
- 92** Faateleina o a Tatou  
Auaunaga Agaalofa  
e ala i le Mulimuli i le  
Faaola
- 93** O Le Malosi o le  
Toatele
- 96** O Le Avea o Mataupu  
Faavae o le Uelefea o  
se Vaega o Lou Olaga



O LE EKALEΣIA A IESU KERISO O LE AU PAIA O ASO E GATA AI

O LE AU EPIKOPO PULEFAAMALUMALU

50 EAST NORTH TEMPLE STREET, SALT LAKE CITY, UTAH 84150-1300


1 Iuni, 2011

Uso e ma tuafafine pele:

O le tausaga lenei e atoa i ai le 75 tausaga talu ona faavaeina le polokalama o le uelefea a le Ekalesia. O itulau o loo mulimuli mai o le a folasia atu ai ia te outou se vaega o le talafaasolopito o le auala na amata ai le polokalama. O le a outou iloa ai foi nisi o taumafaiga a le uelefea faavaomalo a le Ekalesia, ma o le a faaalia ai le faatinoina o mataupu faavae o le uelefea i olaga o tagata o le Ekalesia i le lalolagi atoa.

E avea foi lenei faailogaina o se valaaulia ma se faamanatu mo i tatou uma ina ia atili ola faalagolago ai le tagata ia te ia lava ma mulimuli i le Faaola i le fesoasoani atu i tagata ina ia latou fesoasoani ia i latou lava. Matou te valaaulia outou ma o outou aiga ina ia mafaufau ma le agaga tatalo ma faatino ia mataupu faavae o le uelefea ma le ola faalagolago o le tagata ia te ia lava a o outou iloiloina lenei vaega faaptioa.

Ma le faamaoni lava,

  
Thomas S. Monson  
Henry B. Eyring  
L. Tom Perry

O Le Au Peresitene Sili

## O Le Faia i le Ala a le Alii


**O** se vaitaimi na tele ai le gau o maketi a le lalolagi. Na faaletonu faletupe ma isi faalapotopotoga o mea tautupe. Na faateleina le leai o ni galuega. Na leai ni fale o tagata. Na faaofoi mai e le Malo ni polokalama taugata e taumafai e foia ai le tulaga ua oo i ai. Na toatele tagata na faamalosia e liliu atu i faalapotopotoga lautele mo ni meaai ma isi mea e manaomia.

E mafai foi ona faatatau lenei faamatalaga o le vaitausaga o le 1930 i nei vaitaimi. I na vaitaimi—faapena foi i le taimi nei—o loo avanoa lava le fuafuaga faauelefea a le Ekalesia e “fesoasoani i tagata ina ia latou fesoasoani ia i latou lava,”<sup>1</sup> i taimi o mala ma faigata, i le pau o le tamaoaiga ma mea tautupe i le lalolagi, ma i se tulaga laititi atu, ma sili atu ona luitau ai aiga ma tagata taitoatas i lea e mafai ona feagai i soo se taimi.

E ui o le fuafuaga o le uelefea e pei ona tatou iloaina i le aso na faatoa faalauiloaina i le 1936, ae na faatinoina e Au Paia i *tisipenisione* uma le mataupu faavae o le ola fuafua lelei mo le lumanai aua o Iesu Keriso o le faapogai lea o le fuafuaga o le uelefea. Na saunoa mai Peresitene Thomas S. Monson: “Na saunia e le Alii le ala ina ua ia fetalai mai, ‘O le a tausia foi le fale teuoloa i faapaiaga a le ekalesia; e tausia foi tamaitai ua otia latou tane ma fanau ua otia o latou matua, faapea foi e matitiva.’ (MFF 83:6.) Ona sosoo mai ai lea ma le faamanatu, ‘Ae ao ina faia i la’u lava ala.’ (MFF 104:16).”<sup>2</sup>

Ina ia faia i le ala a le Alii, e tatau ona tatou atiina ae lo tatou lava tulaga o le faalagolago o le tagata ia te ia lava, ona saili lea e fesoasoani atu i isi ina ia latou ola faalagolago ia i latou lava. Na saunoa mai Peresitene Monson, “O loo fesoasoani alii ma tamaitai tuuto i le faafoeina o lenei polokalama tele ma le musuia. “O le mea moni lava, semanu e le mafai lava ona manuia le fuafuaga i le na o se taumafaiga, aua o lenei polokalama e faagaoioia e ala i le faatuatua i le ala a le Alii.”<sup>3</sup>

O le faamanatuina o le 75 tausaga o le fuafuaga o le uelefea—i lenei tausaga—na maua ai e le Au Paia o



Aso e Gata Ai se avanoa e tomanatu ai i mataupu faavae autu e pei o le avea o se tagata tutoatasi, tausia o e matitiva ma e le tagolima, ma le auauna atu i isi. Pe a tatou ola ai i nei mataupu faavae, ua tatou i ai i se tulaga sili o le faamamaina o le tulaga pagatia, fausia o uiga, ma le uunaiga o le lotogatasi.

### FAAMATALAGA

1. *Aoaga a Peresitene o le Ekalesia: Heber J. Grant* (2002), 121.
2. Thomas S. Monson, “O Le Ala a le Ali,” *Liahona*, Mat. 1978, 10.
3. Thomas S. Monson, *Liahona*, Mat. 1978, 10.

*“O le faamoemoega mamao moni o le fuafuaga o le uelefea, o le atiina ae lea o uiga auau mama i tagata o le Ekalesia, o e e foai atu ma e e talia mai, ma laveai mai ai uiga lelei uma ua ia i latou, e faafotu ae ai ma fua mai uiga tamaoaiga natia o le agaga, o le misiona ma le faamoemoe ma le pogai lea o le i ai i le Ekalesia lenei.”*

Peresitene J. Reuben Clark Jr. (1871–1961), Fesoasoani Muamua i le Au Peresitene Sili, i le Glen L. Rudd, *Pure Religion: The Story of Church Welfare Since 1930* (1995), 301.

*Na mulimuli  
le Au Paia i  
tisipenisione uma  
i faataitaiga a le  
Faaoala i le tausia  
o e matitiva ma e  
le tagolima.*

*Ata pue i le itulau  
81-Luga: O loo  
la’ueseina mai  
e tagata o le au  
paia ia uta meaai  
mai le Faaletuoloa  
Tutotonu o Epikopo  
i le Aai o Sate Leki,  
1937. Ogatotonu:  
O se talavou Filipino  
o loo totoina ni fatu  
laau i se togalaau.  
Lalo: O ni tagata o  
le au paia o loo ga-  
lulue i se faatoaga o  
le uelefea a se siteki  
i luta, 1948.*



## Fitusefulu Lima Tausaga o le Ola Fuafua Lelei mo le Lumanai

E ui e lei aloaia lelei le fuafuaga o le uelefea a le Ekalesia, ae na iloa e le Au Paia anamua le taua o le ola i se olaga o le faalagolago o le tagata ia te ia lava, tausia e matitiva ma e le tagolima, ma auauna atu i isi. Na faailoa mai e le Perofeta o Iosefa Samita, "O se tagata e faatumulia i le alofa o le Atua, e le faamalieina i le faamanuiaina na o lona lava aiga, a e ia faasalalau atu i le lalolagi atoa, e naunautai e faamanuia tagata uma lava."<sup>1</sup>

E lei leva ona faatulaga le Ekalesia, ae faatu loa tamai faleteuoloa a epikopo ma ofisa o le sefuluai e fesoasoani ai i e le tagolima. Na faavaeina e Iosefa Samita le aoina o le taulaga anapogi i Katelani, Ohaio, i le vaitau o le 1830<sup>2</sup> Na faalauiloa ai foi ma le mataupu faavae o le sefuluai i lena lava vaitau (tagai i le MFF 119). Na totogiina le sefuluai ma taulaga anapogi i le tulaga o galuega, fua o faatoaga, ma isi oloa. Na vaai e epikopo ma peresitene o paranesi le tufatufaina o nei punaoa i auala e talitutusa ma le taimi nei.<sup>3</sup>

Na tauivi le tele o tagata o le Au Paia anamua e lagolagoina i latou lava. Ina ia foia le paie, sa tuuafatasi ai taitai o le Ekalesia ma le au paia e saili ni auala e fatufatu ai ni galuega e tausi ai i latou. Na maua e nisi ni galuega o le fausiaina o fale a le Ekalesia ma faamaea ni galuega faatino lautele. O nisi na galalue i faatoaga ma faatau atu ni oloa e tausi ai i latou lava ma o latou lava aiga. A o latou galulue faatasi, na faamanuiaina le Au Paia i le lava o mea na latou manaomia.

E ui e eseese luitau o o tatou taimi, ae o loo faauau pea ona tausia e le Au Paia o Aso e Gata Ai i latou lava, faapea ma e matitiva ma lē tagolima e ala i le mulimuli i aoaoga a le Faaola ma le faataitaiga na faataatitia e augatupulaga anamua.

### FAAMATALAGA

1. *Aoaoga a Peresitene o le Ekalesia: Iosefa Samita* (2007), 353.
2. Tagai i le Howard W. Hunter, "Aso Anapogi," *Liahona*, Jan. 1986, 57.
3. Tagai i le Glen L. Rudd, *Pure Religion* (1995), 2, 4.

*Ofaamatulaga i lea augavaiteau e sau mai punaoa nei, sei vagana ua faamatulaina:*  
Susan Clayton Rather, Supporting the Rescue of All That Is Finest (2005); Glen L. Rudd, Key Moments in Church Welfare Services (2008); Glen L. Rudd, Important Events for Historical Church Welfare (1999); Glen L. Rudd, A Brief History of the Church Employment Program (1998); Glen L. Rudd, Pure Religion (1995).



1936

- 6 Aperila: Fofoga mai e Peresitene Heber J. Grant ma ona fesoasoani i le konafesi aoao le fuafuaga o le saogalemu a le Ekalesia.
- Oketopa: Faatulaga e le Ekalesia le Komiti Aoao o le Uelefea.

*"Pe a tatou anapopogi, . . . tatou te lagonaina le fiaai. Ma, mo se sina taimi puupuu lava, tatou te tuuina moni ai i tatou lava i le tulaga o le tagata fiaai ma le le tagolima. A o tatou faia faapea, ua ia i tatou se malamalamaaga tele i lagona o le le maua o se mea lea atonu o loo latou lagonaina. Pe a tatou tuuina atu i le epikopo se foai e tuumama ai mafatiga o isi, ua le gata ina tatou faia se mea lelei mo isi, ae ua tatou faia foi se mea matagofie mo i tatou lava."*

Elder Joseph B. Wirthlin (1917–2008) o le Korama a Apostolo e Toasefululu, "O Le Tulafono o le Anapogi," *Liahona*, lulai 2001, 90; *Ensign*, Me 2001, 73.



*Na galulue le Au Paia i Central Valley Kalefonia i le togavine a le Ekalesia i Madera, Kalefonia, ISA. Na maua mai i le togavine le faitau selau o tone o vine mamago mo le faaaogaina e tagata matitiva i le lalolagi atao.*

## Mauaina o se Vaaiga Mamao i le Ola Faalagolago o le Tagata ia te la Lava

**E**ono mafaufau le toatele o tagata o le ekalesia o le uelefea o se polokalama e fesoasoani ai i tagata o le ekalesia o loo i ai tulaga faigata le tumau. Peitai o le mafuaaga o le fuafuaga o le uelefea a le Ekalesia e sili atu le tele: e aofia ai foi le faalauiloaga o le ola faalagolago o le tagata ia te ia lava o se auala e ola ai. Na aoao mai Peresitene Thomas S. Monson o le ola faalagolago o le tagata ia te ia lava—"o le tomai, tautinoga, ma le taumafaiga ina ia maua mea e manaomia o le olaga mo ia lava ma le aiga"<sup>1</sup>—o se elemene taua lea i lo tatou soifua manuia faletino *ma le faaleagaga*.<sup>2</sup>

E le lava le na o le manao ia mafai ona ola faalagolago ia te ia lava. E tatau ona tatou faia se taumafaiga mataalia, ma lelei e maua ai mea tatou te manaomia ma mea e manaomia e o tatou aiga. Na faamanatu mai ia i tatou e Epikopo H. David Burton, o le Epikopo Pulefaamalumalu, pe a tatou faia mea uma tatou te mafai ia tatou ola tutoatasi ai, "ona mafai lea ona tatou liliu atu i le Alii ma le mautinoa ma ole atu mo mea tatou te le gafatiaina."<sup>3</sup> O le ola faalagolago o le tagata ia te ia lava e mafai ai ona tatou faamanua atu i isi. Na saunoa mai Elder Robert D. Hales o le Korama a Apostolo e Toasefululu, "Ua na o le taimi lava tatou te ola faalagolago ai ia i tatou lava e mafai ai ona tatou faaa'oa'o moni i le Faaola i le auauna atu ma le faamanuaaina o isi."<sup>4</sup>



Agavale, luga: *Nafafai ma uta e le Au Paia i Tenimaka ni pateta mo le Au Paia i Siamani i le 1947. Luga: O aoaoga i le gaosiga o meaai i Ekuatoa na fesoasoani lea i tagata o le ekalesia ina ia maua atili ni togalaau e fua tele mai.*



**1937**

- Faavaeina e le Ekalesia le uluai Fale Teuoloa Tutotonu o Epikopo, i le Aai o Sate Leki.



**1938**

- Faatauina le fanua o le Lotoa o le Uelefea i le Aai i Sate Leki, ma amata ai ona fausainaina.
- Aperila: Toe faaigoa le fuafuaga o le saogalemu a le Ekalesia i le fuafuaga o le uelefea a le Ekalesia.
- 12 Aokuso: Tatala le uluai faleoloa o le Falegaosi Oloa a le Tesareta mo oloa taugofie i le Aai o Sate Leki.



O le ola faalagolago o le tagata ia te ia lava e aofia ai le tele o vaega o se olaga paleni, e aofia ai (1) aoaoga, (2) soifua maloloina, (3) galuega, (4) gaosiga ma le teuina o meaai i le aiga, (5) o mea tautupe a le aiga, ma le (6) malosi faaleagaga.

### 1. Aoaoga

Ua poloaiina i tatou e le Alii ina ia "saili i le aoao, e faapea foi i le suesue ma le faatuatua" (MFF 88:118). Na aoao mai Peresitene Gordon B. Hinckley (1910–2008): "Matou te talitonu i aoaoga. E uunaia e le Eklesia lenei ia aoaoga. Ua faamauina i luga o tagata uma o lenei Eklesia, o se poloaiga mai le Alii, ia maua aoaoga uma e mafai ona outou maua. . . . Ua faamauina i luga o le Au Paia o Aso e Gata Ai se poloai mai le Alii lava ia ina ia aoao o tatou mafaufau ma lima."

O le mauaina o se aoaoga o le sini lena a Roberto Flete Gonzalez o le Ripapelika Tominika, o le na lesitala i le kolisi a o lei umi ona foi mai lana misiona. Sa malie lona tama e totogi le pili o le mea e nofo ai ina ia tulimatai atu Roberto i ana meaaoga, ae i se taimi mulimuli ane, na maliu le tamā o Roberto, ma tuua ai le aiga i se tulaga pagatia o mea tautupe.

Sa nofo Roberto mai le aoga ma amata ona faigaluega e tausi o ia, lona tina, ma lona tuafafine. Sa ia mafaufau pe o le a faapefea ona faauma ana aoga.

I nai vaiaso mulimuli ane, na fofoga mai ai e Peresitene Hinckley le Tupe Faaagaga mo Aoga, "o se taumafaiga matautia" lea o le a fesoasoani i tupulaga talavou i eria tau atia'e ia "o ese mai le mativa sa latou i ai faapea augatupulaga na muamua ia te i latou."<sup>6</sup> Na talosaga Roberto ma faamatuu mai ai se nonogatupe i le TFA, lea na mafai ai ona faaauau lana aoga. O lenei avanoa sa le gata ina fesoasoani i mea tau tupe sa vave manaomia, ae na fesoasoani foi ia Roberto ia maua le faatuatua e faaipoipo ai ma fausia se aiga e faavavau, aua na ia iloa o le a mafai ona ia tausia i latou.

Na faaiuina le aoga faafomai a Roberto a o avea o ia o se epikopo ma na avea ai ma uluai tagata o le Eklesia sa i ai i le Au Faatonu o Aoga Faafomai a le Malo o Tominika. Ae o taunuuga silisili, na ia fai mai ai, sa i ai lea i le aiga. "Ua i ai ni suiga i lo'u aiga ina ua matou mamao ese nei mai le li'o o le mativa," o

*"O mea moni uma lava e mafai ona tatou aoaoina a o tatou i ai i lenei olaga o le a tutu faatasi ma i tatou i le Toetutu. Ma o mea uma foi e mafai ona tatou aoaoina o le a faalauteleina ai lo tatou mana e auauna atu ai."*

Peresitene Henry B. Eyring, Fesoasoani Muamua i le Au Peresitene Sili, "Education for Real Life," *Ensign*, Oke. 2002, 21.



**1939**

- Amata le uluai fale teuoloa ma le gaosiga o meaai tuuapa i le Lotoa o le Uelefea.



**1940**

- 27 Aokuso: Faapaaina e Peresitene Tavita O. MaKei le lifi e faaaoga mo le sana ma le saito a le Lotoa o le Uelefea. Na ofoina atu e tagata o le Eklesia le silia ma le 70,000 itula faigaluega e fausia ai.

**1941**

- 20 Aperila: Amata ona faaaoga le fale tele gaosi susu a le Lotoa Autu o le Uelefea.



*Agavale i le pito:  
O tamaiti aoga a  
le Au Paia o Aso  
e Gata Ai o loo  
tulitulimataagauina  
a latou aoaoga, ina  
ia saunia lelei ai e  
fetaiai ma tulaga  
faigata o le lalolagi  
faatautauva i lenei  
vaitaimi. Agavale:  
O le faamalositino  
ma taumafa tatau o  
ni vaega taua lea o  
le tausia lelei ma le  
faaaloalo o o tatou  
tino.*

lana tala lea. “Ou te faafetai o le a le oo lo’u atalii i lea lava tulaga na ou ola a’e ai aua ua matou o ese mai lena li’o.”

Mo nisi faamatalaga, asiiasi i le vaega o le Education and Literacy i le [providentliving.org](http://providentliving.org) ma asiasi foi i le [besmart.com](http://besmart.com), o se uepsitaese fesoasoani i tagata talavou o le Au Paia o Aso e Gata Ai mo aoaoga e maualuluga atu.

## 2. Soifua maloloina

Ona ua foafoaina i tatou i le faatusa o le Atua (tagai i le Kenese 1:27), o o tatou tino o malumalu ma e tatau ona tausia lelei ma le faaaloalo (tagai i le 1 Korinito 3:16–17).

O le Upu o le Poto, o loo maua i le Mataupu Faavae ma Feagaiga 89, o le tulafono lea a le Alii o le soifua maloloina ma na faaalia ia Iosefa Samita i le 1833. O loo aoao mai ai e tatau ona tatou taumamafa i meaai lelei ma aloese mai mea e le lelei. Na aoaoina mai e aposetolo ma perofeta nei mea talu mai lena taimi, e tatau ona tatou tetee atu i mea po o faatinoga e faaleagaina ai o tatou tino ma mafaufau ma e ono taitaiina atu ai i le avea ma mea e fai ma vaisu.<sup>7</sup>

Na aoaoina e Sainimere Balenacagi o Fiti le lesona lenei i lona talavou a o ia auai atu i se faaipoipoga ma nisi o ana uo e le auai i le Ekalesia. O le toatele o tagata iina, e aofia ai ma uo a Sainimere, na inupia ma ulaula ma na valaaulia o ia e inu. “Sa aoaoina au i lou

olaga atoa e ola i tulaga faatonuina o le talalelei, ma o lea sa ou teenaina le ofo e aunoa ma le faatuai,” o le tala lea a Sainimere.

Na ia iloaina o faamanuiaga o le pipiimau i le Upu o le Poto e sili atu nai lo le soifua maloloina faaletino: “Sa ou mauaina le puipuiga faaopoopo i le tulaga o le mafai lea ona ou faia ni filifiliga sili ona o le latalata mai o le Agaga Paia. E manino lava la’u vaai e le o tuuitiitia e tulaga faatonuina lo matou saolotoga; o loo puipuia i matou mai taunuuga lea e ono taitaiina atu ai i se saolotoga faatapulaaina.”

Mo nisi faamatalaga, tagai i le vaega o le Soifua Manuia Faafetino i le [providentliving.org](http://providentliving.org).



*Ua iloa e Sainimere Balenacagi ia faamanuiaga faaletino ma le faaleagaga e maua mai i le mulimuli i le Upu o le Poto.*

*“E moni lava o o tatou tino faaletino o malumalu ia o le Atua. O lea la, e tatau ia te oe ma au ona mafaufau ma le faaeteete i mea tatou te tuuina i totonu o o tatou malumalu, mea tatou te tuuina i luga o tatou malumalu, mea tatou te faia i o tatou malumalu, ma mea tatou te faia ma o tatou malumalu.”*

Elder David A. Bednar o le Korama a Apostolo e Toasefululua, “Ye Are the Temple of God,” *Ensign*, Sete. 2001, 18.



**1948**

- 1 Mati: Faavaeina se ofisa faarisone o le Ekalesia mo galuega i le Aai o Sate Leki.



**1960**

- Mati: Maea le fale tele gaosi susu i le Lotoa Fou o le Uelefea.

**1963**

- Amata ona faaaoga le fale tele mo le faiga o pasta ma tuuapa ai meaai i le Lotoa fou o le Uelefea.



*Luga: O se tamai-tai talavou o loo fesoasoani atu i ai le nofoaga autu o punaoa mo galuega i Mekisiko. Luga: Fai mai Oséias o le nofoaga autu o punaoa mo galuega i São Paulo, Pasila, "e maua ai e tagata o le ekalesia e leai ni galuega se vaaiga sili atu i le olaga."*

### 3. Galuega

I le tele o uarota ma paranesi, o le mauaina o galuega o le manaoga aupito taua lea o loo feagai ma tagata o le ekalesia a o latou taumafai e ola tutoatasi. E mafai ona fesoasoani ia korama a le au perisitua ma tagata o le aufono a le uarota i nei tagata o le ekalesia. E tatau ona latou galulue vavalalata ma nei tagata, e faailoa atu i ai punaoa aoga o i ai i le lotoifale, avea o ni faufautua e mafai ona fesoasoani patino ia i latou e i ai manaoga, ma ni avanoa faigaluega o loo i ai. O le mana o tagata o le ekalesia e galulue faatasi i le faatuatua e faamanuia ai i latou e le tagolima, o le a tele lava ina taitaiina atu ai i se galuega faamanuainia.

*"Pau lava le mea o loo finagalo ai lo tatou Tama Falelagi, o lo tatou faia lea o le mea sili tatou te mafaia—ia tatou galulue e tusa ma lo tatou malosi atoatoa, pe o le a lava le tele po o le laitiiti foi e mafai ai."*

**Peresitene Dieter F. Uchtdorf**, Fesoasoani  
Lua i le Au Peresitene Sili, "O Mataupu Faavae e Lua mo Soo se Tamaoaiga," *Liahona* ma le *Ensign*, Nov 2009, 56.

### 1973

- Fatuina e le Ekalesia le Tautua Lautele a le AAG e fesoasoani i aiga.



### 1976

- Ua faateleina fale o le uelefeia i le lunaite Setete ma Kanata.
- 29 Mati: Maea le fale teuoloa o epikopo i le Lotoa fou o le Uelefeia.

### 1978

- Faatulaga e le Ekalesia le Komiti e Tali Atu i Faalavelave Faafuasei e fesoasoani ai i le faitau miliona o tagata i le salafa o le lalolagi e aafia i mala.

a tatou tuuina i ai se taumafaiga, e tatalaina e le Alii ia faitotoa."


Mo nisi faamatalaga, asiasi i le [LDSjobs.org](http://LDSjobs.org), [employment.lds.org](http://employment.lds.org), po o lo outou nofoaga autu e lata ane o punaoa mo galuega.

#### 4. Gaosiga ma le Teuina o Meaai a le Aiga

Na faaulioa mai e le Ekalesia i le 2007 se tamai-tusi *Ia Saunia Mea Tatau Uma: Teuina o Meaai a le Aiga*, lea e tuuina mai ai se metotia faigofie i le teuina o meaai a le aiga. Ua fautuaina e le Au Peresitene Sili ia tagata o le ekalesia i le lalolagi atoa ina ia tulimatai atu i le i ai o se sapalai masani o meaai ma vai ma sina tupe e teuina. E mafai e tagata o le ekalesia ona amata i le faatauina o ni nai mea faaopoopo ma tuu ese sina tupe laitiiti i vайасо taitasi pe a mafai. O le mulimuli i lenei mamanu i le aluga o taimi, o le a mafai ai e tagata o le ekalesia ona faavaeina se sapalai o meaai e teuina a le aiga ma se tupe faaleoleo e talafeagai mo mea latou te manaomia.<sup>8</sup>

Ina ua latou iloa lenei fautuaga, na musuia le aiga o Lugo i Valencia, Venesuela e amata ona teuina meaai a lo latou aiga. Sa amata ona latou tuueseina i vайасо taitasi se vaega laitiiti o meaai, vai, ma se tupe. E iu lava i le le lava o la latou faasoa, ae sa mafai lava ona latou faaputuina se vaega talafeagai ina ua mavae ni nai masina. I le faiiuga o lena tausaga sa i ai se solo tetee a tagata faigaluega i Venesuela ma na lama-tia ai galuega a tagata o le eria. O Uso Omar Lugo o se tasi o i latou na iu ina leai ni galuega.

Sa toeitiiti lava atoa le lua tausaga o saili e Uso Lugo se galuega fou. I lena taimi, sa ola Uso Lugo ma lona aiga ia latou tupe teu ma meaai na latou teuina. E ui i luitau faigata o le leai o se galuega, na lagona lava e le aiga o Lugo le toofilemu ma le mafanafana aua sa saunia i latou. Sa latou fafafetaiaia ma le loto-tele le lumanaiai le mautinoa, ma le iloaina sa latou



*E galulue faatasi aiga i le Ripapelika Temokalasi o Congo e toto le kasava o se meaai autu ma maua mai ai le falaoamata e faaaoga i aso taitasi ma teuina i se taimi umi.*

*"O le polokalama fou lenei [teuina o meaai a le aiga] e mafai lava ona fai e tagata uma. O le laasaga muamua lava o le amata. O le lona lua o le faaauau ai pea. E le afaina pe o le a le vave tatou te ausiaina ai, ae tau lava o le amata ma faaauau ai lava e tusa ai ma mea tatou te gafatia."*

**Bishop H. David Burton**, O Le Epikopo Pulefaamalumalu, i le "Teuina o Meaai a le Aiga: O Se Savali Fou," *Liahona*, Mat. 2009, 14; *Ensign*, Mati 2009, 60.



#### vaitau o le 1980

- Faavae uluai nofoaga autu mo galuega i fao atu o le lunaite Setete, i Atenitina, Chile, Parakuei, ma lurukuei.

#### 1981

- Fausia e le Ekalesia se faleoloa taugofie o le Deseret Industries i le Lotoa o le Uelefea.



#### 1982

- 10 Setema: Asiasi atu le peresitene o le I.S. o Ronald Reagan i nofoaga o le uelefea i Ogden, luta.



*Fai mai Devon ma Michaela Stephens o le faa o se paketi na fesoasoani ia i laua i le "puleaina mausali" o a laua tupa.*

mulimuli i fautuaga ia faasolosolo malie ona teu a latou meaai i le fale.<sup>9</sup>

Mo nisi faamatalaga, asiasi i le vaega o le Teuina o Meaai a le Aiga i le [providentliving.org](http://providentliving.org) po o le tagai foi i le tamaitusi *Ia Saunia Mea Tatou Uma: Teuina o Meaai a le Aiga*.

### 5. O Mea Tau Tupe a le Aiga

O le isi vaega o le ola fuafua lelei mo le lumanai o le puleaina ma le atamai o tipe maua ma tipe faaalu. Na fautua mai le Au Peresitene Sili:

*"O i tatou uma lava ua nafa ma le saunia o mea mo i tatou lava ma o tatou aiga, i mea faaletino ma le faaleagaga. O le tuuina atu ma le faautauta o mea e manao-mia, e ao ai ona tatou ola i mataupu faavae o le ola faautauta po o le faaso-soa tatau: o le ola fiafia i mea ua tatou maua, o le faamalieina i mea ua tatou maua, aloese mai le soona fai o aitalafu, ma ia faaputuputu ma le filiga ma saunia mo faalavelave faafuasei i aso leaga."*

**Elder Robert D. Hales** o le Korama a Apostolo e Toasefululuia, "la Avea ma E Tuuina Atu ma le Faautauta Mea e Manaomia Faaletino ma le Faaleagaga," *Liahona* ma le *Ensign*, Me 2009, 8.

"Matou te uunaia outou ina ia faautauta i a outou tipe faaalu; ia pulea lelei outou lava i a outou faautuga ina ia aloese ai mai le aitalafu. . . .

"Afai ua totogi au aitalafu ma ua i ai se tipe faaleoleo mo le lumanai, e tusa lava pe laitiiti, o le a lagona e oe ma lou aiga le faateleina o le saogalemu ma 'ae'ae ai i le filemu sili i o outou loto."<sup>10</sup>

O le manuia o mea tautupe a le aiga e amata i le totogiina o sefuluai ma taulaga. Pe a faamuamua e tagata o le ekalesia le Alii, ona mafai lea ona latou tausia i latou lava faapea ma isi.

O le isi vaega o le pulea manuia o mea tautupe e aofia ai le iloa o au tipe maua ma tipe faaalu ma le puleaina o tipe nai lo le tuu o tipe e pulea oe. Ina ua faia e Devon ma Michaela Stephens o Arisona, ISA, se paketi, sa le i manino i laua i le aofai o tipe na la faaluina i masina taitasi. A e o le faavaeina o se paketi ma ni vaega faapitoa na fesoasoani lea ia i laua "e o ese mai ai i ao a e o mai i lalo i le fogaeleele," o le tala lea a Michaela. Sa faapopoleina i maua ina ua iloa e itiiti a ma tipe nai lo le mea na ma mafaufauina, ae sa faagaetia malosi foi i le lagonaina faafuasei e mafai ona tatou pulea ma le mausali mea ua tatou maua."

Mo nisi faamatalaga, asiasi i le vaega O Mea Tautupe a le Aiga i le [providentliving.org](http://providentliving.org) po o le tagai i le tamaitusi *Ia Saunia Mea Tatou Uma: O Mea Tautupe a le Aiga*.

### 1983

- Ua tofia le Au Epikopo Pulefaamalumalum e faatonutonuina le polokalama o le uelefea.

### 1985

- Amatalia le polokalama o le Tautua o Galuega Agaalofa a le Ekalesia.



### vaitau o le 1990

- Faaoga e le Ekalesia Iona Nofoga Autu o Auauanga o Galuega Alofa e faavasega ai lavalava ma isi aitema e totoe mo le auina atu i le lalolagi atoa e tali atu ai i le mativa ma mala.

### 1996

- Faavae e le Ekalesia ia Auauanga Lima Foai a le Au Paia o Aso e Gata Ai o se faalapotopotoga e le lavea i le malo e faatautai gaoioiga agaalofa i atunu e filifilia.<sup>11</sup>
- Fausia e le Tautua o le Uelefea lana uluui fale teuoloa o epikopo ma nofoaga autu e teu ai meaai i fafo atu o le lunaite Setete, i Mekisiko.
- Amata galuega o le toefaafouga o le Lotoa o le Uelefea.

## 6. Malosi Faaleagaga

E taua le tulaga faaleagaga i lo tatou soifua manuia faaletino ma le faavavau. Tatou te oo uma lava i tofotofoga. O le taumafai e faateleina lo tatou faaleagaga o le a fesoasoani i lo tatou feagai ai ma nei tofotofoga ma aumaia ia i tatou le faamoemoe mo ni aso e sili atu.

O Nirina Josephson-Randriamiharisoa o Madagascar o loo nofo nei i Farani a o tulitulimatakgauina ana aoaoga. Ina ua ia faatoa taunu, sa ia tauivi ma le lagona tuua toatasi ma le toe fia foi i le aiga. “Sa ou saili mo se faamafanafanaga e ala i le tatalo, faitauina o tusitusiga paia, ma musumusuga lemu a le Agaga Paia,” o le tala lea a Nirina. “Na faatalataina atili au e nei mea i le Tama Faalelagi ma le Faaola, ma sa ou lagonaina ai le filemu.”

E le i leva ae faia loa e Nirina ni uo ma auai atu i gaoioiga i totonus ma fafo atu o le Ekalesia ma na ia mauaina le fafia. A e o ni tala faanoanoa mai lona aiga na luluina ai lona lalolagi. “Sa ou mauaina i se tasi taeao se feau na ta'u mai ai ua maliu lo'u tuagane. Ou te le i manatu ou te lagonaina sea ituaiga faanoanoa. I aso ma vaiaso na sosoo ai, sa ou tauivi ai i taimi o le tuua toatasi, ita, ma le leai o se faamoemoe. O le faia o se mea e sili ona taua o ni luitau ogaoga ia.”

O ni nai masina mulimuli ane, sa malu ai foi sa'u uo mamae. Na faateleina e lenei faanoanoa faaopopo le avega mamafa sa i ai ia Nirina. Na mafaufau Nirina mo sina taimi o le a le toe alu i le lotu, ae na ia toe manatuina o mea lava e tasi ia na fesoasoani ia te ia i ona faafitauli muamua e mafai ona toe faamalo-siauina o ia i le taimi nei.

“Faapei ona ou faia ina ua ou faatoa siitia atu i Farani, sa ou saili le toofilemu i le tatalo, faitauina o tusitusiga paia, ma le Agaga Paia. Sa ou mauaina ma le malosi e ala i nei mea, o le Agaga ma aoaoga faavae o aiga e faavavau e mafai ona aumaia ia i tatou le toofilemu ma o le Togiola a Iesu Keriso e i ai se aafiaga moni lava i o tatou olaga,” o lana tala lea.

“Po o a lava tofotofoga tatou te feagai, e ‘le tapunia fai toto’ a le Alii. O Lana fuafuaga o le fuafuaga o le fafia.”

Mo nisi faamatalaga e uiga i le ola faalagolago o le tagata ia te ia lava ma le ola fuafua lelei mo le lumana'i, tagai i le *O Le Faia i le Ala a le Alii: O Le Otootoga o le Taiala a se Taitai i le Uelefea*, o loo maua i le tele o gagana i le [providentliving.org](http://providentliving.org).

### FAAMATALAGA

1. *O Le Faia i le Ala a le Alii: O Le Otootoga o le Taiala a se Taitai i le Uelefea* (tamaitusi, 2009), 1.
2. Tagai i le Thomas S. Monson, “O Mataupu Taiala o Filifiliga Patino ma Faaleaiga,” *Liahona*, Fep. 1987, 3; *Ensign*, Sete. 1986, 3.
3. H. David Burton, “O Le Faamanuia o le Galue,” *Liahona*, Tes. 2009, 37; *Ensign*, Tes. 2009, 43.
4. Robert D. Hales, “O Se Vaaiga a le Talalelei i le Uelefea: Faatuatua i Lona Faatinoga,” i le *Mataupu Faavae Autu o le Uelefea ma le Ola Faalagolago o le Tagata ia te la Lava* (tamaitusi, 2009), 2.
5. *Teachings of Gordon B. Hinckley* (1997), 724.
6. Gordon B. Hinckley, “O Le Tupe Faaagaga mo Aoga,” *Liahona*, Iulai 2001, 62; *Ensign*, Me 2001, 52.
7. Tagai, mo se faataitaiga, Russell M. Nelson, “Ulufia po o 1 e Saolotoga,” *Liahona*, Ian. 1989, 6; M. Russell Ballard, “E O Le Togafiti Poto a Le ua Leaga,” *Liahona* ma le *Ensign*, Nov. 2010, 108.
8. Tagai *Ia Saunia Mea Tatau Uma: Teuina o Meaai a le Aiga*, (tamaitusi, 2007).
9. Tagai “Teuina o Meaai a le Aiga: O Se Savali Fou,” *Liahona*, Mati 2009, 12–13; *Ensign*, Mati 2009, 58–59.
10. *Ia Saunia Mea Tatau Uma: O Mea Tautupe a le Aiga* (tamaitusi, 2007).



Ua iloa e Nirina Josephson-Randriamiharisoa o le ola ai pe a e le aunoa i le talalelei e mafai ona siitiaina i tatou i luga e oo lava i taimi e sili ona faigata.

*“O se molimau malosi e aumaia ai le filemu, mafanafana, ma se faamautinoaga. Na te fatua’ia le talitonuga maumaututu e faapea, a usitaia pea lava pea ia aoaoga a le Faaola, o le a matagofie le olaga, mautu le lumana'i, ma o le a tatou maua le gafatia e faatoilao ai luitau e faasalaveia lo tatou ala. E tupu se molimau mai le malamalamai le upumoni, e faasolosolo mai e ala i le tatalo ma le mafaufau loloto i aoaoga faavae faatusi paia. E faateleina e ala i le ola ai i na upumoni faatasi ai ma le faatuatua e taulaina i le mautinoa maumaututu, o le a maua lava taunuuga folafolaina.”*

Elder Richard G. Scott o le Korama a Apostolo e Toasefululua, “O Le Mana e Liua ai o le Faatuatua ma Uiga Tauleleia,” *Liahona* ma le *Ensign*, Nov. 2010, 45,46.



1997

- Ausia e le Tautua Lautele a le AAG se matatia o le fuainumera o le aofaiga o tamaiti na vaetamaina i le tausaga e tasi, e 629—o se numera aupito i maualuga na ausia e le matagaluga i le seneturi lona 20.<sup>2</sup>



1999

- Mati: Ua amata e le Tautua o le Uelefea se taumafaiga tele mo galuega ina ia faavaeina e oo atu i le 50 nofoaga autu fou mo galuega i le lalolagi atoa.
- Toe faaigoaina le Tautua Lautele a le AAG o le Tautua a le AAG mo Aiga, ma ua faalauaiteleina ana polokalama.



## Faateleina o a Tatou Auaunaga Agaalofa e ala i le Mulimuli i le Faaola

**N**a aoao mai le Faaola, "Aua ai se fia faasaogalemuina lona ola, e maumau ai ia te ia, a o le faamau-mau i lona ola ona o au, e faasaoina e ia" (Luka 9:24).

Na saunoa mai Peresitene Thomas S. Monson e uiga i lenei apoapoaiga: "Ou te talitonu ua tau mai e le Faaola ia i tatou, sei vagana ua tatou faamaumau o tatou ola ona o isi, o le a itiiti se faamoemoega o o tatou lava olaga. O i latou o e ola mo na o i latou lava, e iu ina maanuminumi ma, maumau ai lo latou ola, a o i latou o e faaalu o latou lava ola e auauna atu ai i isi, e ola ma lausiusi—ma faasaoina ai o latou ola."<sup>1</sup>

E mafai ona faigata le mauaina o se taimi tatau ma le malosi e fesoasoani ai i o tatou aiga, tuaoi, tagata o le uarota po o le paranesi, nuu, e oo lava i tagata ese. O afea ma e faapefia foi ona tatou fesoasoani atu, aemaise lava pe a le lava o tatou taimi? E faapefia ona tatou auauna atu pe a tapulaa o tatou tulaga ma gafatia?

O lo tatou Faataitaiga Sili, o le Faaola o Iesu Keriso, o le na valaaulia i tatou e mulimuli atu ia te Ia (tagai i le Mataio 4:19). E ui lava tatou te le tauaveina Lona valaauga paia, ae e mafai ona tatou faasoa atu Lana galuega. O le faamatalaina o lena galuega, na faapea

mai ai le Aposetolo o Peteru e uiga ia Iesu "sa fema-liuai ma agalelei" (Galuega 10:38).

**Sa faamalolo e Iesu tagata mamai ma auauna atu i e na mafatia** (tagai i le Mataio 9:20–22; Mareko 8:22–25). Atonu o le a tatou le faia ia vavega maoae lea na Ia faia, ae e mafai ona tatou faamafanafana i e ua mafatia, mamai, pe faavauvau.

**Na fafagaina faavavega e le Faaola i latou na leai ni meaai** (tagai i le Mataio 14:15–21). E mafai ona tatou foai atu se taulaga anapogi limafoai, auauna atu i galuega faatino e gaosi ai taumafa o le uelefeea a le Ekalesia, ma fai ni o tatou sao i taumafaiga faale-lotoifale e fafaga i e le tagolima.

**Na silafia e Iesu tagata taitoatasi ma auauna atu i ai** (tagai i le Luka 8:45–48). A o tatou saili e mulimuli i Ana faataitaiga, o le a tatala e le Agaga o tatou mata ia tatou iloa ai tagata o puapuagatia, tuua toatasii, ma tuulafoaia. Ma e mafai ona taialaina i tatou e fesoasoani i le taulimaina o o latou manaoga.

**Sa faaaluina e Iesu le taimi e faatasi ai ma isi, e tusa lava pe Na te lei fuafuaina** (tagai i le Luka 24:29) **ma e ui ina sa feagai foi o Ia ma Ona lava**

### 2001

- Faalauiloa mai e le tautua o punaoa mo galuega se fale mo le aoaoina o matata fou. Na faalauiloa i le tausaga na sosoo ai ni mea e faaaoga i le fale mo galuega a le tagata lava ia.
- 5 Setema: Sa fajia se sauniga e toe faapai a le Lotoa o le Uelefeea, ina ua maea le toefaafouga.



### 2003

- 25 Ianuari: Na faalauiloa ai le uepisaite o le Ola Fuafua Lelei, providentliving.org.
- Faamaonia se fautuaga tele ina ia faateleina le aofai o faleteuoloa o epikopo i le lalolagi atoa.
- Amataina e le Ekalesia ni taumafaiga tetele se fa o auaunaga alofa: o aoaoga faamasani mo le faamanavaina o pepe fou, vai inu mama, tufatufaina o nofoa faataavalevale, ma le togafitiga o mata.

*Agavale i le pito:  
O Uso Chiroque,  
o le peresitene  
o Alii Talavou i  
Chulucanas, Peru,  
o loo galulue ma  
Aleki, o se tasi o le  
korama a aoao, i  
le faia o ni tootoo  
mo se alii o la latou  
paranesi na lavea.*



**lava atugaluga** (tagai i le Mataio 14). Ua fautuaina i tatou e tuuina atu auaunaga i le poto ma le auauai lelei, aua e le tatau ona “momoe vave le tagata ia silia le malosi [ua ia te ia]” (Mosaea 4:27). Ae o nisi taimi o o tatou avanoa sili e auauna atu ai ma faamanuiaina ai e oo mai ae ua le talafeauga [ma o tatou tulaga]. I le faataoto a le Faaola, na faasalaveia e le Samaria agalelei lana malaga, i lena lava taimi iina, ina ia auauna atu i manaoga o se tagata manua (tagai i le Luka 10:30–37).

**E lei i ai lava se tasi e lei silafia e le Faaola pe faatauvaa foi mo Lona aapa atu i ai** (tagai i le Mataio 9:9–13). E pei ona faia e le Faaola, e mafai foi ona tatou alolofa atu ma siitia isi, aoao i latou i se auala e lelei atu ma valaaulia i latou ia tatou i ai faatasi i le olaga faamanuiaina ua ofoina mai e le Faaola.

E silafia e le Tama Faalelagi o tatou tomai uiga ese, tulaga, ma manaoga, ma e Na te silafia le auala tatou te faaaogaina ai nei mea e faamanuia ai isi. A o tatou latalata atili atu ia te ia, ma saili mo Lona taitaiga, o le Ia fesoasoani ia i tatou ia iloa po o ai, po o fea, ma po o le a foi le auala tatou te auauna atu ai.

Asiasi ane i le vaega o Auauanga i le **LDS.org** mo ni manatu e uiga i auaunaga i le Eklesia, i lou alalafaga, i avanoa faafafeatalai, ma i auaunaga agaalofa.

#### FAAMATALAGA

1. Thomas S. Monson, “O Le A Se Mea Ua Ou Faia mo Se Tasi i le Aso?” *Liahona* ma le *Ensign*, Nov. 2009, 85.

*“O lenei lava le amio Atua e lelei  
ma le faamaoni i luma o le Atua  
o le Tama lea, ia tauasiati atu i e  
matua otia ma fafine ua otia a latou  
tane i o latou tiga, ia leoleo foi o  
ia ia te ia, ina nei pisia mai o ia i  
le lalolagi” (lakopo 1:27).*

*O taulaga anapogi,  
e pei ona aoina e  
nei tiakono, e taua  
mo le fesoasoani  
atu i e le tagolima.*

## O Le Malosi o le Toatele

#### O Le Tulafono o le Anapogi

Na faavaeina e le Alii le tulafono o le anapogi e faamanuia ai Lona nuu ma saunia ai se auala e tausai ai i latou e le tagolima. Na Ia poloaiina le Au Paia “ina ia tuuina atu ni au mea i e matitiva, . . . ma o le a tuuina atu i luma o le epikopo . . . e fesoasoani i e matitiva ma e le tagolima” (MFF 42:31, 34). O taulaga anapogi o se punaoa autu lea mo le fale teuoloa a le Alii. Ua uunaia tagata o le Eklesia e tuuina atu se taulaga ia tutusa ma le tau o aiga e lua e le’i tau-mafaina a o anapogi. Na talosagaina e Peresitene Spencer W. Kimball (1895–1985) tagata o le eklesia ina ia foai atu “ia sili atu—ia silia ma le faasefulu pe afai tatou te i ai i se tulaga e mafai ai.”<sup>1</sup>

Pe a tatou malamalamama ma ola i le tulafono o le anapogi, o le a faateleina lo tatou alolofa ma agalelei atu i e le o maua lea manuia. O le anapogi, faatasi ai ma le tatalo, o se ituaga o le tapuai moni. Pe a tatou usitaia le tulafono o le anapogi, o le a tatou

#### 2009

- Iuni: Na faalauiloa ai se uepisiaite fou mo vaetamaga, [ItsAboutLove.org](http://ItsAboutLove.org).<sup>3</sup>



#### 2010

- Aperila: Na faalauiloa ai se uepisiaite fou mo galuega, [LDSJobs.org](http://LDSJobs.org), o loo maua nei i le ganana Peretania, Sipaniolo, ma le Potukale.
- Ua faaopoopo le gaosiga o taumafa i taumafaiga agaalofa.

#### FAAMATALAGA

1. Tagai “Humanitarian Activities Worldwide,” [providentliving.org/content/display/0,11666,4600-1-2323-1,00.html](http://providentliving.org/content/display/0,11666,4600-1-2323-1,00.html).
2. Tagai i le C. Ross Clement, “LDS Family Services” (o talafasolopito e le’i lolomina na saunia e le Tautua a le AAG mo Aiga, 10 Me, 2000).
3. Tagai i le Kimberly Bowen, “LDS Family Services Launches New Web Site,” *Ensign*, Sete. 2009, 78.



*E faatusa i le malosi faaopoopo lea e oo mai pe a tatou auaatasi e auauna atu i isi, ua fesoasoani ai le usoga a le perisitua i Louisiana, ISA, e aveese se laau na pau ina ua uma le Afa o Katarina i le 2005.*



*O galuega faatino e pei o le gaosiga o taumafa mai le fualaaumaina o le peach ua maua ai ni taumafa tatau e tausia ma faafafiaina ai olaga o i latou na semanu e pagatia i le fiaai.*

maua le malosi faaleagaga, faamanuiaga faaletino, ma se naunautaiga sili atu e auauna atu i isi.

Na aoao mai Peresitene Thomas S. Monson: “O le mataupu o taulaga anapogi na i ai e amata mai i aso anamua i ona po o Isaia, ina ua tautala o ia e uiga i le anapogi moni, sa ia uunaia tagata e anapogi ma “ia tofotifo au mea e ‘ai i le ua fia ‘ai, ia . . . aumai i lou fale e ua matitiva ma faasauaina” [Isaia 58:7]. Sa faavaeina e le Perofeta o Iosefa Samita le faiga o le aoina o le taulaga anapogi mo e matitiva i Katediani i Ohaio; ma mulimuli ane i Navu i Illinois, sa auina atu e le Korama a Apostolo e Toasefululu se tusi faalauaitile i le Ekalesia e famalamalama ai ‘mataupu faavae o le anapogi,’ e faapea: “Ia avea lenei mea ma se faataitaiga i le au paia uma, ma o le a le i ai lava se le lava o ni mea e ‘ai: A fia aai e matitiva, ia tuu atu i e o i ai taumafa, e anapopogi i se aso e tasi ae foai atu taumafa na semanu latou te taumafaina, i epikopo e

foai atu mo e matitiva, ma o le a ola tagata uma mo se taimi umi. . . . Pau lava le mea ia ola le au paia i lenei mataupu faavae faatasi ma le loto fiafia ma le matafiafia o le a tele pea mea latou te maua.”””

#### Gaosiga o Taumafa

O le gaosiga ma le faagasologa o taumafa e fafaga ai e fiaai ua leva ona avea o se maatulimanu o le fuafuaga o le uelefea talu ona faatoa folasia mai. O se mea na amata o ni togalaau tutusolo ma galuega faatino na faatulaga i Iuta, sa avea ma se upega fesootai tele e silia ma le 1,000 o faatoaga ma galuega faatino e gaosi ai taumafa o loo faafoeina e siteki ma uarota o le Ekalesia. O loo faagaoioia faatoaga o le uelefea i Amerika Matu, Europa, Australia, ma le Atu Polenia. E oo atu i le vaitau o le 1980 ua tuufaatasia, faalauteleina, ma faaleleia atili nei faatoaga ma fale gaosimea. Na faatau ese atu nisi o galuega faatino laiti.

E pei o le vaitaimi ua te'a, na lagolagoina nei faatoaga ma fale e tagata o le Ekalesia o e na latou faia le tele o galuega—e fai fua uma lava. Na tuuina atu e tagata o le ekalesia le fia selau afe o aso i tausaga taitasi e seleselai ai, gaosi, ma tufatufa atu taumafa o le a faaaogaina e tausai ai e le tagolima. E silia ma le 100 miliona pauna (45 miliona kk) o sana, pi, aano o manu fasi, fualaau aina, fualaau faisua, ma isi oloa na gaosia i tausaga taitasi, ina ia mautinoa e i ai i

*“Pe a tausia e tagata uma o lenei ekalesia le anapogi ma tuuina atu se saofaga limafoai, o le a faamanuiaina—e matitiva ma e le tagolima—e le gata i na o tagata o le Ekalesia, ae faapea foi ma le toatele o isi.”*

**Peresitene Gordon B. Hinckley** (1910–2008), “Rise to a Larger Vision of the Work,” *Ensign*, Me 1990, 97.



O se vaega o le taumafaiga faifai pea ina ia taulimaina mea masani e tele ina manaomia e tagata, ua tuufaatasia ai e tamaitai talavou i Hong Kong ni fasimoli ma isi mea e manaomia mo le tumama mo tagata na aafia i faalavelave.



O galuega faatino e auauna atu ai i isi e faamalosia ai o tatou sootaga ma isi ma fesoasoani tatou te atiina ae ai uiga faaKeriso. O i, o loo aafia ai le autala-vou a le Au Paia o Aso e Gata Ai i Mekisiko, i le faamamaina o le alalafaga, i le fuluina o se fale.

epikopo ia taumafa e tausia ai i latou e le tagolima. I eria o le Ekalesia e le o i ai pe faigata ona oo atu i fale teuoloa, e faaaoga e epikopo ma peresitene o parnesi ia taulaga anapogi e tuuina atu ai mea e manaomia ma auaunaga.

### O Le Faleteuoloa a le Alii

Talu mai le faalauiloaga o le polokalama o le uelefea i le 1936, ua galulue faatasi ai tagata o le Ekalesia ina ia faaititia tulaga mafatia o i latou o e le tagolima. O le pau o le tamaoaiga, mala faalenatura, leai o ni galuega, ma'i ma le le atoatoa o le malosi, po o maliu e manaomia uma ai le galulue faatasi o le Au Paia i lalo o le taitaiga a le perisitua ina ia mautinoa e taulimaina manaoga ma faamanuiaina tagata taitoatasai ma aiga. I le aluga o tausaga, ua faiat miliona tagata o le ekalesia na tuuina atu ma le loto malie o latou taimi ma taleni ina ia faamanuiaina isi ma suitalaga, e pei ona saunoa Peresitene Monson, “i le tulaga vaivai o se tagata se toatasi o loo tu toatasi [i le] malosi o le toatele e auauna atu faatasi.”<sup>3</sup>

Ina ua saunoa mai Peresitene Heber J. Grant e uiga i le polokalama o le uelefea i le 1936, sa ia muai silafia “e leai se masini fou a le Ekalesia” o le a manaomia ae “[o le a] tuuina atu e faalapotopotoga a le siteki ma uarota, korama a le perisitua, le Aualofa, ma isi ausilali ni auaunaga sili e mafai ona [latou] tuuina atu mo le faamanuiaina o le tulaga aoao o le

uelefea a le Ekalesia.”<sup>4</sup> Ina ua uma ona faatulagaina e le Alii le faalapotopotoga e manaomia ia manuia ai e matitiva ma e le tagolima—na faatulaga ia korama a le perisitua, na faatulagaina Aualofa, ma na i ai le perisitua a le Atua i luga o le lalolagi.

Sa avea tagata o le Ekalesia, faatasi ai ma a latou galuega faapaiaina, o latou taleni ma tomai, o se vaega taua o le fale teuoloa a le Alii. E faaopoopo atu i taulaga anapogi lea e totogiina atu i tupe o le taulaga anapogi a le Ekalesia, ua mafai e taitai perisitua ona utuvai mai i taimi, taleni, tomai, ma malosi o tagata uma o le ekalesia ina ia faamanuia ai e le tagolima.

Tatou te faaalia lo tatou alolofa mo le Atua ma Ana fanau, i le taliaina o le avanoa e fesoasoani atu ai i isi i taimi o lo latou le tagolima. O le uelefea lenei i lona malamalamana sili ona mama, ma o lona faatinoina faamaoni o le a faaeaina uma ai le tagata na te foaiina atu ma le tagata foi na te taliaina, e pei ona muai oo i ai le silasila a perofeta i o tatou aso.

### FAAMATALAGA

1. Spencer W. Kimball, i le Conference Report, Ape. 1974, 184.
2. Thomas S. Monson, “Ia Fai Oe Ma Faaa’oa’o,” *Ensign*, Ian. 1997, 53.
3. Thomas S. Monson, in “Messages of Inspiration from President Monson,” *Church News*, 6 Feb., 2010, 2.
4. Heber J. Grant, i le James R. Clark, tuufaatasia e, *Messages of the First Presidency of The Church of Jesus Christ of Latter-day Saints*, voluma 6. (1965–75), 6:19; faalaugatasia faamataitusi tetele.



*"Ia i latou uma e lagona mai lo'u leo, ou te tautino atu o le fuafuaga o le uelefea a Le Ekalesia a Iesu Keriso o le Au Paia o Aso e Gata Ai, e musuia mai e le Atua Silisilise. Ioe, o le Alii o Iesu Keriso o Iona Tusiata Mamanu ia. O loo geno mai o la ia te oe ma au, 'Faauta, ou te tu atu i le puipui ma tu'itu'i atu; ai se tasi e faalogo mai i lo'u leo, ma tatala mai le puipui, ou te ulufale atu ia te ia' (Faaaliga 3:20).*

*"Ina tatou faalogo atu ia i Lona siufofoga, ina tatou tatala atu ia o tatou loto ia te la, ma ina avea ia o la ma a tatou soa tumau a o tatou taumafai e tautuaina Ana fanau."*

**Peresitene Thomas S. Monson**, "O Le Ala a le Alii," i le Mataupu Autu o le Uelefea ma le Ola Faalagolago o le Tagata ia te la Lava (tamaitusi, 2009), 13.

## O Le Avea o Mataupu Faavae o le Uelefea o se Vaega o Lou Olaga

**O**le ola ai i mataupu faavae o le uelefea o le faatinoina lea o lo tatou faatuatua ia Iesu Keriso—e ala i le faaitiita o aitalafu e le manao-mia, ola i mea ua tatou maua, ma faia se tulaga o le teuina o meaai a le aiga ma teu se tupe faaleoleo, mo se faataitaiga. O lo tatou faatuatua e taitaiina i tatou ia aaooina o tatou mafaufau ma lima e galulue i aso uma o o tatou olaga ia ola faalagolago ia i tatou lava. O le taulimaina o o tatou lava manaoga, o le a lelei ai lo tatou tausia o i tatou lava ma auauna atu i isi. Ia tatou mulimuli i fautuga e le na o le *faia* o le lelei ae ia taumafai *ina ia* lelei, e le na o le *faia* o le mea sili atu ae ia *avea* ma se e sili atu.<sup>1</sup> O le usiusitai i fautuaga a le Alii e aumai ai faamanuiaga faaletino ma le faaleagaga. E mafai ai ona tatou fetaiai ma luitau o le olaga ao faaauupegaina i le lototele ma le mautinoa nai lo le fefe ma le masalosalo.

Ua faamanatu mai ia i tatou e Peresitene Thomas S. Monson lo tatou tiute o le sii ae ma faamanua atu i isi:

"Ou uso e ma tuafafine, ia tatou fesili ifo i tatou lava i lenei fesili . . . : 'O le a se mea ua ou faia mo se tasi i le aso?' Ia tuia o tatou agaga i upu o se viiga masani ma maua se nofoaga i tototonu o o tatou loto:

*"Ua ou faia ea se lelei i le aso?  
Ua ou fesoasoani ea?  
Ua ou faafifiafa ea, i se ua faanoanoa?  
A leai, ua le aoga.  
Ua ou faamama i se ua mafatia  
Ma faamafanafana i ai?  
O e ua mamai, ua ou tausia ea?  
Ma faainu ma fasaga i ai?"*

"O lena galuega lea ua valaauina i tatou uma i ai, o le galuega a le Alii o Iesu Keriso."<sup>2</sup> ■

### FAAMATALAGA

1. Tagai i le Robert D. Hales, "O Se Vaaiga a le Talalelei i le Uelefea: Faatuatua i Lona Faatinoga," i le *Mataupu Faavae Autu o le Uelefea ma le Ola Faalagolago o le Tagata ia te la Lava* (tamaitusi, 2009), 1.
2. Thomas S. Monson, "O Le A Se Mea Ua Ou Faia mo Se Tasi i le Aso?" *Liahona* ma le *Ensign*, Nov. 2009, 87.

### PUNAOA FAAOPOOPO

E te fiafia e aoao atili e uiga i autu na talanoaina i nei itulau? O loo tele tamaitusi, DVD, uepisaite, ma isi punaoa e ono aoga ia te oe. Asiasi i le [75yearsofwelfare.org](http://75yearsofwelfare.org) mo nisi faamatalaga.



E LE MAFAI ONA KOPPINA

I Lana Tausiga e Le Aunoa, saunia e Greg Olsen

“E le faataulia ea manu iti e lima gafua i asari  
e hua, e leai foi so latou e tasi ua galo i luma o  
le Atua?

“A o outou lauulu lava ua faitaulia uma ia.  
O lena, aua tou te matatau ai: ua sili outou i manu  
iti e tele” (Luka 12:6–7).



**O** le tausaga 1829 na faaali atu ai Aposetolo anamua o Peteru, Iakopo, ma Ioane ia Iosefa Samita ma Oliva Kaotui ma faaee i o laua luga le Perisitua Mekisateko. E ala i le faagasologa lava e tasi o le faauuga, ua mafai ai e alii agavaa uma o le Ekalesia ona mauaina ma faaaoga le perisitua—o le pule e galue ai i le suafa o le Atua. Tagai i itulau e 14, 16, ma le 19.